

# WANAN

Wantok  
SSH Stacks  
UC San Diego  
Received on: 03-14-96

NIUSPEPA BILONG YUMI OL PAPUA NIUGINI STRET - 26 YIA NAU

32 pes                      Namba 1,132                      Wik i stat long Fonde, Mas 7, 1996                      50 toea

## Ol studen tok lukaut long stapim Wol Benk long givim dinau mani

### JOE KANEKANE i raitim

NESENEL Yunien bilong ol Studen (NUS) i salim wanpela tok lukaut i go long gavman olsem ol i no inap larim Wol Benk long givim namba tu hap dinau mani long Papua Niugini, inap gavman i givim K8 millien long baim skul fi bilong ol studen.

Na, ol i laikim dispela mani (K8 milien) long kam long dispela K64 milien em gavman i putim long wanpela tras fan, we praim minista na namba tu bilong em tasol-bai i skelim.

Presiden bilong NUS Matthew

Parep tokaut long dispela tingting bilong em dispela wik.

Long wanpela miting wantaim ol lain long Wol Benk las wik, Mista Parep i tok ol lain bilong Wol Benk i bin tokim em olsem ol bai sapatim ol studen long rausim polisi bilong gavman long sasim ol studen long baim skul fi.

Ol lain long Wol Benk i tokim Mista Parep olsem bai ol givim klia tingting long gavman olsem dispela kain polisi i nogat gutpela kaikai long bihain taim. Olsem na gavman i mas lusim na baim skul fi bilong ol studen.

Ol bikman bilong Wol Benk i mekim klia long gavman olsem sapos gavman i go het wantaim kain polisi bilong en, bai kantri i

nogat inap saveman.

Na tu ol i tokim gavman olsem stended bilong edukesen long kantri bai pundaun. Bikos nogat planti studen bai go long skul. Dispela em long wanem kos bilong skul fi bai go antap.

"Sapos Chan/Haiveta gavman i no laik givim mipela dispela K8 milien, NUS bai mekim hat long gavman long kisim mani i kam long Wol Benk," Mista Parep i tok.

Mista Parep i tok dispela kain giti pasin bilong gavman i wok long bungim ol kainkain hevi. Na i no long taim bai ol hevi i kamap klia.

Long Madang, ol wokman bilong wanpela stua i sasim pinis

wanpela studen long stilim sop bilong waswas. Na long kantri namba bilong studen i pundaun olgeta yia long skul em long mak bilong 20 pesen nau. Na dispela em i bikpela namba tumas.

Las wik Wol Benk i bin askim gavman long senisim tingting bilong em sasim olgeta studen long baim skul fi bilong ol yet. Wol Benk i givim dispela tingting long gavman taim ol i luksave olsem kain we bilong pulim mani i go long han paus bilong gavman i no wanpela gutpela pasin. Long wanem nogat planti pipel long kantri i gat gutpela wok long painim mani long baim skul fi bilong. Na kain polisi ken daunim namba bilong ol studen long go

skrui save long bikpela koles o yunivesiti. Ol studen i tok olsem ol bai paif hat wantaim gavman inap long taim dispela senis i kamap, long wanem sapos ol i no mekim nau bai planti ol studen i kam bihain i bai bungim bikpela heve.

"Mipela i laik toksave long gavman olsem mipela i no inap long malolo inap long taim gavman i givim mipela dispela K8 milien long baim skul fi bilong ol studen", em i tok.

NUS i bai holim wanpela bikpela bung neks wik we olgeta kolis long kantri bai i stap insait long kamap long wanpela tingting. Dispela em long wanem rot ol i mas bihainim sapos gavman i givim dispela mani.

# 7 memba jas bai mekim disisen long rifom

### YAKAM KELO i raitim

LO bilong Provinsal na Lokel Level Gavman i no bin winim 30 de long olgeta palamen memba i glasim na skelim long pasim i kamap lo, loya, Paul Paraka i tokaut long Surpim Kot long dispela wik.


Paraka loya i pusim dispela kot salens bilong Morobe Deputi Gavana, Titi Christian long Suprim Kot long tokaut olsem dispela lo i no bihainim gut mama lo na lo bilong palamen long mekim i kamap lo. Na tu Paraka loya i pusim yet olsem olpela sistem we Titi Christian i bin primia bilong Morobe i stap yet long luksave bilong lo.

Loya Paul Paraka i tokim 7-pela memba jas olsem palamen i bin salim notis bilong dispela senis long olpela provinsal gavman sistem long 21 de tasol. Tasol dispela samting i mas kamap long 30 de o wanpela mun olgeta.

Sief Jastis, Sir Arnold Amet i tok Mista Paraka i mas kamap wantaim nupela poin bilong toktok we i no wankain olsem disisen kot i bin mekim bipo long Deputi Gavana bilong Westen provins, Isidore Kaseng.

Mista Kaseng i bin kamapim wankain kot salens egens nesanel gavman long dispela nupela lo tasol em i lusim kot bilong em.

Tasol Mista Paraka i tokim kot olsem Titi Christian i no wanpela memba long dispela



□ Mista Christian.

disisen bilong Isidore Kaseng. Na dispela em i nupela aplikesen long dispela wankain kot.

Mista Paraka i askim kot olsem long Seksen 2.9 SabSeksen 1, lo i tokaut olsem kot i ken

lukluk na glasim gen olpela disisen bilong em na olsem wanem em i ken rausim disisen.

Em i tok bikos dispela em i nupela lo, i gat asua i stap long en. Olsem na namba wan disisen kot i mekim i gat asua tu i stap. Tasol dispela seksen bilong lo i oraitim kot long glasim gen na stretim disisen bilong em. Long dispela as, kot bilong Titi Christian i nupela kot we i ken stretim sampela bilong ol dispela asua long nupela lo em gavman i kamap, em i tok.

Mista Paraka i tok tu olsem palamen i bin nogat Stending Oda bilong strongim na kari-maut dispela notis bilong kamapim nupela lo. Mak bilong taim palamen i bin mekim samting i bin 21 de tasol we Seksen 14 long Sabseksen 2 i tokaut long en.

Palamen i bin kamapim dispela lo na pasim long 27 Jun long las yia, 1995 we ol memba i holim las vot na pasim.

Tasol loya bilong Titi Christian i tok long dispela taim, 27 Jun, 1995, dispela rifom i bin Bil tasol. Dispela inap kamap lo long 19 Julai, 1995 bikos taim bilong dispela rifom long kamap lo bai bungim stret 30 de.

Titi Christian i sanap strong tu olsem Spika bilong palamen i no bin givim setifiket long dispela lo (certified) we palamen inap luksave na pasim. Olsem na dispela rifom em i olsem Bil yet inap spika bilong palamen i givim setifiket long Bil ya long em i kisim luksave olsem lo stret.

Long dispela as, Mista Paraka i tok lo bilong Provinsal na Lokel Level Gavman i no bihainim mama lo na Titi Christian i sanap yet olsem primia bilong Morobe provins.

Surpim Kot long las wik i bin skrui taim long dispela kot i kam long dispela wik. Bikos loya bilong Titi Christian i askim kot long skelim na rausim olpela disisen bilong em.

Long dispela wik, Suprim Kot i sindaun wantaim Jastis Gibb Salika, Sir Mari Kapi, Sief Jastis Sir Arnold Amet, Kubulang Los, Jastis Doherty, Jastis Mark Sevua na Jastis Andrew.

Mista Paraka i tokaut olsem taim gavman i kamapim dispela Ogenik Lo, i bin nogat sapat bilong mama lo long strongim em taim lo ya i kamap. Bikos long ol dispela poin em i salens long en. Loya i makim gavman, Misis Mogish i tok i nogat gutpela as long dispela kot bai go bek na glasim na skelim gen olpela disisen bilong em. Inap apliken (Mista Christian) i ken soim kot ol hap bilong mama lo we dispela rifom lo i bin abrusim.

Em i tok sapos i gat asua long dispela lo, i mas gat luksave bilong em long wanem hap em i no wok gut. Na dispela inap larim kot i skelim na glasim gen disisen bilong em.

Mista Paraka i tok kot bilong Isidore Kaseng bilong Westen provins em namba wan kot na i ken i gat asua long en. Bikos i nogat arapela wankain kot olsem bipo, dispela kot i mas sekim gen disisen bilong em yet.

**TOYOTA LAND CRUISER**

**SAPOS ROT IBAGARAP NA YU PAINIM HAT LONG IGO... GO WANTAIM 4WD LAND CRUISER!**

**LUKIM MIPELA NAU LONG ELA MOTORS ISTAP OLGETA NAP LONG PAPUA NIUGINI!**

**Ela Motors**

TOYOTA

BPT (Pty) LTD

EM5354



**Plis RIPOt**



**Westen Hailens:**

Plis long Westen Hailens i bin holim pasim tripela man bihain long ol i painaut wanpela giaman K50 pepa mani long provins long dipela wik. Ol plis i bin painaut olsem sampela lain i bin potokopim dispela K50 pepa mani na kesim bilong baim ol samting long en long wanpela stoa we i stap longwe long taun. Provinsal plis komanda, John Wakon i tok ol bin keim K50 giaman pepa mani long baim ol samting long wanpela tret stoa long Wurup. Em i tok plis i holim pinis tripela man husat i wok long Dobil BP sevis stesen long wokim dispela long na potokopim K50 pepa mani. Ino long taim nau ol bai i sasim tripela man ya.

**Westen Hailens:**

Tupela meri i bin dai long las wiken long Westen Hailens taim paia i kukim haus we ol bin stap long en. Pli i autim nem bilong ol olsem Nali Tepu wantaim 15 krismas na Jobika Ake wantaim foapela krismas. Tupela em ol bilong ples Kulpena long Tambul eria inait long Westen Hailens provins. Provinsal plis komanda John Wakon i bin tok tupela gel ya i bin stap insait long haus taim paia i kamap na kilim dai ol. Dispela i bin kamap namel long 6.30 na 7 klok nait. Pli i ting olsem ampela lain i bin minin na kamapim paia we i kiim laip bilong tupela gel ya. Ol sampela lain husat i bin lukim birua i tok paia i bin stat long baksait bilong haus tasol tupela meri i no wokim wanpela samting long ranawe long birua ya. Ol neiba bilong ol i bin laik kilim dai paia tasol ol ino bin nap bikos paia i bin kamap strong tru. Mama bilong tupela pikinini i bin stap yet long maket taim birua ya i kamap, plis i bin tok.

**Kimbe, Wes Nu Briten:**

Plis long Is Nu Briten i bin holim pasim sikipela man long not kos eria long las wiken bihainim stilpasin we sampela stillain i bin stilim moa long K16 tausen long BP depa na sevis stesen long not kos eria. yet Provinsal plis komanda Gion Kawat i bin tok pikinini bilong wanpela plisman i wanpela long ol stilimanki. Plis i ripot olsem ol bin holim pasim tupela man long ples Ratung na ol arapela long ples lavakaka. Plis i bin kisim bek sampela mani long ol stil lain tasol i no olgeta. Ol ino tokaut hamas ol bin kisim bek.


**Lae, Morobe provins:**

Ol wok painimaut i go het nau long painim a bilong dai long wanpela yangpela man Garaina las wiken. Bos bilong metropolitan plis long Lae, Tony Wagambi i tok sikipela man i haitim pes bilong ol wantaim kios, karim wanpela gan na ol na go kilim yangpela man Garaina long las Fraide nait long Lae futbol Asosiesen klab. Mista Wagambie i tok ol lain ino bin stilim wanpela samting long klab. Mekim na i luk olsem ol bin wok long bihainim dispela man tasol long kilim em. Plis ino holim pasim yet ol lain man na tu painim yet as long ol i kilim dai dispela man.

# langalio tok ol lida i gat hait tingting

MEMBA bilong Wapenamanda, Masket langalio i tokaut olsem senis long lo bilong Papua Niugini i wok long kamap bikos ol lida na ol bikman i no tingting gut na lukautim gut lo. Na tu ol i gat hait tingting long mekim ol dispela samting. Mista langalio i tokaut long las wik kibung bilong Media Semina olsem em i bilip olsem mipela i go insait nau long taim nogut we fridom bilong lo i stap long hevi. Olsem lida, mi gat bikpela laik tru long mama lo bilong yumi we ol papa bilong dispela kantri i bin kamapim bipo. Dispela mama lo i tokaut long rait o laik bilong wanwan. Dispela ol rait o laik nau em mipela i lukim ol lida i laik senisim bikos ol i laik mekim mipela i bilip olsem ol i strongim ol dispela lo, Mista langalio i tok.

Em i tok nau gavman i laik kamapim moa senis long fridom bilong raitim nius o ritim nius (media). Dispela i soim ol lida husat i gat sampela tingting o bel nogut egensim wok bilong media. Mista langalio i tokaut olsem bikos i gat birua namel long media na ol lida, dispela i soim media i mekim wok bilong em long soim aut ol bikpela toktok o nius i go long pablik, soim aut ol lain husat i mekim asua na ol lain husat i mekim na gavman i no wok gut. "Nogat wanpela lida i laik kisim hat taim long wok bilong media. Tasol sapos yu no



• Masket langalio.

gat wanpela samting long haitim, watpo bai yu pret long media?, Mista langalio i tokaut.

Mista langalio husat em memba bilong Oposisen i mekim ol dispela toktok taim Media Kaunsil i askim em long toktok long hevi bilong raitim nius na ritim nius. Em i tok i tru olsem wok bilong raitim nius o

ritim nius i save abrus long planti samting. Tasol ol dispela em liklik hevi tasol bikos ol nius ripota i save traim long stretim dispela asua bilong ol.

Dispela gavman bilong Sir Julius Chan na Chris Haiveta i bin kamapim planti bikpela senis pinis. Planti bilong ol senis ya i sut long bisnis o ekonomi bilong kantri. "Long dispela as, media i kamap birua bilong Praim Minista na ol promis bilong em bikos media i mekim wok bilong em long raitim nius long ol wok bilong bisnis o ekonomi nau kantri i wok long go insait". Long ai bilong politisen lida, wok bilong media i nogat hap bilong go tasol em i mas banisim em yet insait long dispela lo bilong fridom long mekim samting, em i tok.

Mista langalio em wanpela bilong ol lida husat i save toktok egensim Praim Minista long palamen long dispela tingting bilong gavman long mekim senis long fridom bilong raitim na ritim nius.

Long las wik palamen, Praim Minista wantaim Deputi bilong em i laik kotim Sen Doney bilong ABC redio na Frank Senge bilong National niuspepa long Palamentri Privilis Komiti long nius bilong Wol Beng. Tasol spika bilong palamen, Sir Rabbie Namaliu i rausim dispela kot.

## Tripela plisman indai

LAS wik Fraide Eking Komisina bilong Plis Robert Nenta i tok raskol pasin i no bikpela tumas long sampela wik nau. Long wanem moa plis, ol risev plis na ol grup i helpim long daunim raskol pasin i pulap nau long ol bikpela taun na siti bilong kantri. Tasol ol niuspepa wantaim redio na televisen i ripot long planti stil pasin i kamap long kantri olsem long Westen Hailens, Is na Wes Nu Briten, Bogenvil ailan, Noten provins na Mosbi.

Wantok i painimaut olsem raskol pasin i kamap tu long ol arapela provins bilong kantri we i no kamap long ol niuspepa na redio. Dispela i soim olsem maski gavman i makim 1996 olsem yia bilong daunim hevi bilong lo na oda, we plis bai wokhat long mekim dispela i karim kaikai wantaim helpim bilong ol pipel, moa bikhet pasin i kamap yet. Nau yet tripela plisman i dai pinis -tupela long Gerehu, Mosbi na wanpela long Bogenvil ailan.

Plis long Mosbi i kisim pinis sampela man na askim ol nau long indai bilong tupela plisman long Gerehu las wik long Sarere moning.

Mausman bilong ol plis, Asisten Komisina Philip Taku i tokaut long Tunde Mas 5 olsem bihain long ol i givim ol askim, em i bilip plis bai sasim ol man ya long pinis bilong dispela wik.

Em i tok i gat ripot olsem ol raskol bilong Milen Be husat i kam long Mosbi long baim sampela gan i mas stap insait long dispela trabel. Tupela plisman husat i dai i bilong Wes Nu Briten na Galp provins. Plis ripot i tok wanpela man i bin ring i go long Gerehu plis stesin long Sarere 2 klok moning. Na ripot olsem em i harim kra i bilong gan klostu long Gerehu pilai graun. Na bilip olsem ol raskol i mas sut.

Tripela plis ka i go sekim na i no lukim wanpela samting. Orait ol i kam bek long stesin. Na narapela plis ka wantaim tripela plisman go sekim bihain long Naime Strit. Na 7-pela raskol sut long ol wantaim wanpela kain gan em ol soldia i save yusim. Plisman bilong Galp provins husat i

**LEO WAFIWA i raitim**

sindaun long fran sit wantaim draiva i dai taim em i kamap long bikpela Mosbi haus sik. Bikos i gat planti katres long bodi bilong em. Plis i givim nem bilong dispela plisman Sinia Konstebel Alex Api, husat i gat 30 krismas. Em i marit na i gat tripela pikinini.

Draiva bilong Wes Nu Briten i dai tu. Plis i givim nem bilong em olsem Sinia Konstebel Thomas Mota. Em i gat 38 krismas na i bilong Hoskins, WNBK. Em i lusim meri na 4-pela pikinini.

Namba tri plisman long beksait bilong plis ka i giaman olsem em tu i dai. Na i stap laip. Na ol raskol i teko-va long ka na draivim i go long ol maunten baksait long Moale Gabuna taven. Ol tromei ki bilong ka go insait long bus na ranawe. Tupela man husat i dai i wok olsem plisman moa long 10-pela yia olgeta.

Planti bikman bilong kantri olsem Galp provins Deputy Gavana Riddler Kimave, Gavana bilong Nesenel Kapitel Distrik Bill Skate, Memba bilong Lufa Mathias Karani na Oposisen Lida Roy Yaki i no amamas long bikhet pasin bilong ol raskol. Mista Skate i tok em bilip ol plisman i no inap pret long dispela. Na bai go het yet long daunim raskol pasin long Mosbi siti na kantri wantaim. Mista Yaki i tok em i sore long indai bilong tupela plisman ya. Tasol em i sutim tok long nesenel gavman long ol dispela hevi. Bikos gavman i no yusim gut mani long daunim ol kain hevi we i kamap nau. Memba bilong Lufa Mathias Karani

Mista Karani i askim tu Minista bilong Plis Castan Maibawa long painim kwik inap mani bilong plis fos long baim ol nupela strongpela gan we ol plisman i ken yusim long daunim raskol pasin. Bikos ol raskol i yusim ol nupela strongpela gan long kilim tupela plisman ya.

Mista Karani em i wanpela olupela plis opisa bipo em i joinim politik.

**PLISMAN INDAI LONG BOGENVIL - PES 4**

## Lukluk bilong sios long wok bilong midia insait long kantri

SIOS i lukim olsem midia we i karamapim ol niuslain long ol niuspepa, redio na televisen i mas tokautim tasol ol samting we i tru olsem em i kamap, isi long ol man i andastendim na ino gat samting bilong haitim na ino wansait.

Asbisop bilong Pot Mosbi Asdaiosis, Sir Peter Kurongku i bin mekim dispela toktok long wanpela semina we i bin kamap long Sir John Guise Stadium long Mosbi long Fonde na Faide la wik. Semina i bin glasim wok bilong midia na mamalo bilong PNG. Na wanem ol lo i karamapim midia insait long kantri.

Long makim Katolik Sios long kantri, Asbisop Kurongku i bin tok ol midia o ol niuslain i gat wok long givimaut ol nius na infomesen long ol samting we i kamap insait long komyuniti, ples na kantri na ol pipel i mas save long ol. Tasol em bin tok wantaim dispela wok long painim, raitim na autim nius na ol infomesen i go long ol pipel, ol i mas sekim gut wok bilong ol olsem wanem samting ol i raitim i stret tasol. Na ol i mas karim hevi sapos wanem ol i raitim i no stret.

Sir Peter i bin tok i gat planti samting i kamap nau long kantri we ol pipel i gat nit long save long ol. Na tu long ol lain i gat save long ol dispela samting long mekim klia i go long ol grasrut pipel na ol pipel insait long ol setelmen, ol lain i nogat wok na ol trangu lain i ken lia long ol. Long nau, yumi lukim ol bikman i tromeim nating mani na olgrasrut lain i no lukim wanem ol samting ol dispela mani i save go long en.

Sampela long ol samting we ol gasrut na ol liklik pipel long kantri i laik gat save long en na ol i lukluk long midia long save long ol samting em ol:

. Pasin bilong peim pastaim na yusim. Dispela rot nau i karamapim helt, edukesen na ol arapela sevis long kantri.

Sir Peter i bin tok dipela rot i givim hatpela taim tru long ol trangu lain bikos planti bilong ol bai ino inap long pei na ol ino kisim sevis we ol i laikim. Planti taim dispela i kamap long ol imejeni olsem long haus sik we ol wok manmeri long hau sik i no laik sevim ol sik lain bikos ol ino peim K10 fi.

. Wankain samting i kamap long sait bilong edukesen long kantri. Sapos ol papamama i no peim ol skul fi, ol pikinini bai ino inap go long skul. Tok long fri edukesen sistem we gavman i bin toktok long en i lus nating na ino karim kaikai.

. Pe bilong ol samting long kantri i go antap tru na ol grasrut wantaim ol dispela ino gat inap mani long peim ol samting i kisim taim tru. Tasol ol lain ya ino kisim ol gutpela toktok long klierim i go long ol watpo tru na dispela ol samting i kamap olsem.

Sir Peter i bin tok sios i tok midia i mas ansa pastaim long God na pipel na bihain long tingting long wanwan bilong ol yet. Dispela em long pasin bilong skelim wanem samting i tru o i giaman. Em bin tok long taim ol i autim wanem samting i tru, ol midia i mas tingim na rispektim, digniti, rait na kalsa long ol lain we ol i autim ol nius na infomesen long ol.

# WANTOK

All departments. Phone: 325 2500 - Fax: 325 2579  
P.O. Box 1982, Boroko, NCD, Papua New Guinea

Published Weekly, Thursday, for

**Word Publishing Company Pty. Ltd.**

Printed and Published by Anna Solomon of Bittern Place, Gordons, at Alotment 2, Section 209, Spring Garden Road, Hohola, for Word Publishing Co. Pty. Ltd.

Acting General Manager and Group Editor in Chief: Anna Solomon.

Advertising Manager: James Deisle

Editor of Wantok: Leo Wafiwa

Advertising Deadlines: Display bookings and Camera ready copy: Tuesday midday.

Classified advertising: Wednesday 2pm.

Papers distributed by air throughout PNG. Available by airmail subscription within Papua New Guinea and overseas

Australia and New Zealand Representatives: Tonkin Media Pty. Ltd. P.O. Box 101, Avoca Beach NSW, 2251 Australia. Sydney, James Tokin, (043) 851746. Melbourne, Glen Smith, (03) 8072311.

Word Publishing Co. Pty Ltd is owned by the four major churches of Papua New Guinea: Catholic 55%, Lutheran 25%, Anglican 10% and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms of acceptance are available at the office of Word Publishing Company Pty. Ltd. and are set out in full on the reverse side of its official Display Advertising Booking Form.



# AusAID givim K10 milien long Top-Ap skul

AUSTRALIA gavman aninit long AusAID progrem i givim K10 milien helpim i go long 23 komyuniti skul long Papua Niugini long dispela wik. Dispela helpim bilong Australia i karamapim ol samting olsem skul saplai bilong ol studen i yusim long lainim samting long klasrum.

Dispela helpim i makim pinis 23 komyuniti skul insait long Papua Niugini husat i gat dispela top-ap progrem long skul bilong ol. Ol skul we i gat gret 1 i go inap long gret 7 na 8.

Ol dispela helpim em PNG Gavman i bin kisim long dispela wik long Bavaroko Komyuniti Skul long Mosbi husat i gat dispela Top-Ap progrem long skul bilong ol. Skul ya i gat gret 1 i go inap long 7 na 8.

Mausman bilong AusAID progrem, Scott Dawson taim em i givim dispela helpim long PNG Gavman i tok dispela projek i sut long helpim ol rifom o senis long Edukesen sistem insait long Papua Niugini.

Mista Dawson i tok wanem hev em Edukesen sistem bilong

## YAKAM KELO i raitim

Papua Niugini i bungim em ol luksave.

"Rit na rait em bikpela hevi na planti meri i no save gat nem tumas long ol wok o stap insait long planti bikpela senis o wok long kantri. Planti studen i save lusim gret 6 na stap nating long ples na liklik lain tasol i save pinisim gret 10 na 12. Dispela em ol as bilong ol hevi i kamap long ekonomi na sosel developmen bilong dispela kantri".

Ol provins husat i gat nem long kisim dispela helpim long skul bilong ol em, Sentrel, Is Sepik, Isten Hailans, Enga, Galp, Madang, Milen Be, Morobe, Nu Ailan, Not Solomon, Oro, Simbu, Sauten Hailans, Wes Nu Briten, Westen, Westen Hailans na Nesenel Kapital Distrik (NCD) provins.


Mista Dawson i mekim tok amamas i go long PNG gavman long kamapim dispela bikpela senis long Edukesen sistem bilong kantri.

"Dispela senis em bikpela samting bikos em bai givim sans long moa studen i ken winim 9-pela yia olgeta long skul", em i tok.

Dispela helpim we AusAID i givim bai i go long ol eria olsem sains, spot, hom ekonomiks, indastriel ats (wud na metal) agrikalsa, ekspresiv ats na ol skul buk.

Dispela projek em wanpela bilong ol arapela progrem we Australia i save givim long Papua Niugini insait long Edukesen sistem. Arapela helpim em long nupela elementri skul, stretim na helpim ol tisa long wok bilong ol, menesim edukesen rifom, strongim wok bilong ol meri, stretim gut ol provinsal hai skul na teknikel edukesen sistem, na kamapim ol samting redi long givim ol nupela edukesen.

Edukesen sekta em bilong hap bilong Australia- Papua Niugini Developmen Kopresen Progrem na i gat rekot long 30 pesen (%) o \$35 milion, bilong \$118 milion projek na progrem long dispela yia.



**Kopex stail...** • dispela poto i soim wanpela lain femili bilong Tapo viles husat i save stap klostu long Tokua ples -balus long Kokopo i kambek long gaden bilong ol long kar. Ol i karim ol gaden kaikai na ol sospen tu long kar. Ol i bin stop long baim kerosin, loli-wara na ol kaikai long Romphil Treding klostu long Tokua ples-balus taim Wantok Niuspepa i bungim ol. Poto James Kila.

## Finsafen saptim lokal level gavman

MOA long 200 pipel i bin bung long Finsafen, Morobe provins long makim ples bilong sanapim Lokal Level Gavman het kwata bilong Kotte Konstituensi long 11 Februari, 1996.

Long dispela bung ol bikman husat i makim wanwan kaunsil eria i bin kamap. Ol bikman ya em Ambai Labi husat i presiden bilong Yabim Mape Komyuniti Gavman, Mista Suma husat i presiden bilong wok didiman (DPI), Zemo Biwa presiden bilong Komes, Mista Zozingao Fiseris, Misis S. J. Kembarang presiden bilong Kotte Interum Lokal Level Gaman, Geigu Mumengte presiden bilong Fores na ol arapela bikman bilong Distrik Edministresen. Ol presiden bilong 7-pela paris wantaim ol lain wokmanmeri bilong ol tu i bin kamap long dispela miting bihainim singaut bilong ol bikman ya. Insait long Finsafen eria, ol arapela komyuniti long wanwan konstituensi i kisim pinis Komyuniti Gavman tasol Kotte Konstituensi tasol i nogat yet. Em i save stap aninit long edministresen bilong Finsafen Distrik long olpela provinsal gavman sistem i kamap.

Kotte Konstituensi i no bin kisim wanpela Komyuniti Gavman long bipo. Olsem na nau em i namba wan taim ol i laik kisim Lokal Level Gavman olsem na ol i laik bung na painim wanpela ples bilong wokim het kwata bilong ol.

Lokal Level Gavman em nupela sistem we nesenel gavman i bin pasim long las yia long kisim ples bilong olpela provinsal gavman sistem. Dispela gavman i laik bai ol helpim na sevis gavman i givim i mas go stret long ol pipel long ples long rot bilong Lokal Level Gavman Kaunsil.

## upela bikpela projek long Aitape redi long stat

NESENEL gavman i givim pinis tokorait bilong tupela Timba Atoriti (TA) long tupela ovasis kampani (wanpela bilong Malesia na arapela bilong Singapo) long karim aut wok insait long Sandaun provins.

Tupela kampani ya em Damansara bilong Malesia na Lyani Invesmen bilong Singapo. Damansara bai karim aut wok long Aitape sentral na Aitape inlen eria long katim diwai na bihain planim welpam. Lyani Invesmen bai karim aut wok long Aitape wes kos inlen tasol i wok long wetim yet laspela wok bilong makim graun.

Maskim wok long redi long kisim tokorait bilong Nesenel Fores Atoriti na Lens Dipatmen i wok long go het yet, ripot i kam long ol mausman long Aitape i tok olsem sampela graun wok i stat pinis. Ol wok bilong klinim bus na eria bilong putim ol haus na ples bilong mekim wok i bin stat pinis long tupela yia i go pinis.

Damansara Fores Prodaks bai katim diwai na planim welpam long mak eria bilong graun inap long 40,000 hekta. I kam inap long nau yet, kampani wokim pinis 20 kilomita rot insait long eria bilong wok. Kampani redi tasol long statim wok long dispela projek sapos masin bilong statim wok i go kamap long Aitape. Siaman bilong papagraun kampani bilong Lyani Invesmen, Ignas Aro, i tokim Wantok olsem olgeta wok i bai pinis klostu. Na em bai givim ripot i go long Dipatmen Bilong Enviromen na Konsevesen long tokorait bilong dipatmen pastaim long ol i sindaun na sainim tokorait bilong TA.

# Sik taifoit bruk long Wau

BIKOS long wanpela sik ol i kolim taifoit, Divisen bilong Helt insait long Wau insait long Morobe provins i pasim pinis olgeta haus kaikai na ol mama husat i save kukim ol kaikai na salim long ol maket.

Long las wik, Helt dipatmen long Lae i salim sampela helt opisa i go long Wau long sekap long dispela hevi. Dispela em bihain long Helt dipatmen long Lae i kisim sampela ripot i kam long opis bilong Hidden Valley gol projek olsem i gat 50 wokman kisim sik taifoit.

Ripot bilong Helt dipatmen i tokaut olsem

## ARI GUH DANDEE i raitim

dispela 50 wokman bilong Hidden Valley gol projek i wok long kisim nau sampela kain marasin long pinis dispela sik. Ol helt atoriti painim aut long dispela 50 wokman husat i kisim taifoit bihainim wanpela askim bilong kampani long kisim blut bilong ol wokman na sekim long mun i go pinis.

Long nau yet, ol helt opisa i gat bikpela pret olsem sik taifoit i mas kamap bikpela pinis insait long Wau eria. Olsem na ol i stopim olgeta haus kaikai na ol mama husat i save kukim kaikai na salim

long maket. Na ol i wok long traim long sekap long luksave long sik i kamap long wanem rot tru.

Wanpela helt opisa long seksen bilong lukautim wara, Andrew Manase, i tok ol i no klia long dispela sik i kamap long wanem hap tru insait long Wau.

Em i tok taifoit i save kamap taim ol pipel i no yusim gutpela na klinpela wara.

Mista Manase i tokaut olsem insait long Wau eria ol pipel i no save yusim gutpela na klinpela wara. Em i tok planti pipel i save yusim

wanpela wara tasol we i gat ol pipel i stap antap long het bilong wara.

Ol helt opisa i wok long kisim wara long Wau taun wara saplai, Kaindi wara na Sandy wara na karim aut wok sekap long lukim sapos ol dispela wara i kamapim taifoit. Bikos long luksave bilong ol ol pipel i wok long yusim ol dispela wara we i doti.

Divisen bilong Helt insait long Wau i wok long wetim ol helt opisa long pinis wok sekap na putim kamap wanpela ripot. Na ol bai kamapim wanpela disisen long wanem samting long mekim long helpim ol pipel.





# WANTOK

NIUSPEPA BILONG OL PAPIA NIUGINI STRET

## Lusim opis na luksave long hevi bilong plis

LONG las wik Sarere moning, ol raskol i sutim indai tupela polisman long sotgan long Gerehu stes 2 insait long Mosbi siti. Orait long Sande, ol BRA paitman i sutim wanpela arapela polisman long Siara eria long not-is Bogenvil.

Dispela yia olsem Praim Minista Sir Julius Chan i tokaut em yia bilong karim aut lo na oda wok long daunim lo na oda hevi.

Bikpela wok bilong daunim lo na oda hevi stap long husat? Long luksave bilong mipela ol pipel bilong PNG, dispela wok i stap long han bilong ol polisman. Dispela em tingting na luksave mipela ol pipel bilong i save i gat.

Planti pipel na komyuniti amamas long dispela plen bilong gavman long pait egensim hevi bilong lo na oda. Na i laik givim helpim na sapot.

Tasol bikpela hevi olsem gavman i toktok na i no givim gutpela na trupela helpim na sapot. Bikpela samting gavman i ken mekim em long putim kamap moa na inap mani. Na givim i go aut long wanwan provins na ol atoriti i ken skelim dispela mani long karim aut dispela wok.

Long sait bilong ol polisman, planti nogat gutpela sindaun (haus, pei) na ol gutpela samting bilong mekim wok.

Ol raskol i no moa yusim ol naip, tamiok na spia. Ol i yusim ol kain sotgan we ol polis na ami yusim.

Gavman i mas luksave nau nau givim gutpela trening na ol arapela samting we bai helpim ol polisman insait long kantri long mekim wok. Pasin bilong givim wok i go long ol polisman na stap lukluk tasol i mas pinis. Gavman i mas kam ausait long opis na luksave long hevi na wanem ol samting polis fos i nidim long mekim wok.

# BRA pait i go nau long Buka eria

## VERONICA HATUTASI i raitim

OL wokman bilong gavman na ol pipel long Buka i stap wantaim pret nau. Bikos sampela paitman bilong Bogenvil Revoluseneri Ami i stap long not Bogenvil na i wok long kamapim trabel i go olsem long Buka distrik.

Ol ripot i kam long Bogenvil long dispela wik i tok long asde, Trinde Mas 6, ol pipel bilong ples Siara klostu long Buka pasis i bin lukim strongpela BRA komanda, Ishmael Toroama na ol paitman bilong em i go olsem long Kunua na Soroken eria long not Bogenvil long wanpela autbot 40 hospawa motobot bilong Tarlena Hai skul. Dispela motobot em ol i bin stilim long Tunde Mas 5. Na nau ol i yusim long raun long en.

Ripot i tok i gat bikpela pret nau namel long ol wokman na pipel long Buka taun olsem nogut ol rebel paitman i makim long bagarapim hetkwata bilong Bogenvil edministresen na Bogenvil Trengisenel Gavman opis long Buka. Mekim na ol atoriti long Buka i was gut tru i stap nau.

Ripot i tok tu olsem long Buka taun na ol

ples klostu, ol i wok long bihainim taim tambu o kefiu we ol plis na sekuriti fos long Buka distrik i bin putim kamap. Dispela taim tambu i kamap bihainim ripot bilong ol rebel paitman i stap long not Bogenvil eria. Maski long hetkwata ol bikman i tok ol i no bin oraitim na putim wanpela taim tambu long Buka distrik.

Ol toktok i sut long Toroama na lain bilong em long kamapim indai bilong moa pipel na bagarapim laip na sindaun bilong ol pipel long Bogenvil long nau yet.

Pastaim ol i bin stat long kamapim ol pait, inai na bagarap long ol pipel bilong ol kea senta na ples insait long saut Bogenvil, ol i muv i kam antap olsem long sentrel Bogenvil we long las wik, ol i bin kamapim bagarap long wanpela sekuriti fos memba na ol resisten paitman klostu long Arawa.

Ripot i tok ol rebel paitman ya i kam antap moa na long Kunua kea senta long not wes Bogenvil, na kilim indai tripela pipel long tupela wik i go pinis.

I gat bikpela bilip olsem long las wiken long Sande Mas 3, grup bilong Toroama gen i bin sutim indai wanpela yangpela

plisman klostu long ples Siara. Nem bilong dispela plisman em Robin Santania. Na em i bilong Vokeo ailan long Is Sepik provins.

Ol paitman i bin sutim em i dai bihain long em na narapela wanwok i go kism wara long tenk wara long Siara Komyuniti skul. Ol bin flaim bodi bilong dispela soldia na poroman bilong em husat i bin kism bagarap i kam long Mosbi long dispela wik Tunde.

Pait i bin kamap namel long ol paitman na ol sekuriti fos memba long Siara long Sande bikmoning inap long apinun we sampela lain long tupela sait wantaim i bin kism bagarap.

Nau yet ol arapela hap long bikailan Bogenvil i stap isi.

Ripot i tok tu olsem wanpela bung we i bin kamap long Paruparu we ol BRA lida olsem Joseph Kabui na Jonathan Ngati na sampela sief bilong sentrel Bogenvil i bin stap long en i bin tokim ol pipel olsem ol i les pinis long dispela pait bilong Bogenvil i kism independens. Na ol i laik wok wantaim BTG long kamapim bek gutpela sindaun long Ailan.

# 7-pela haus bungim hevi long Lae

PROVINSAL Plis Komanda, Ludwig Kumbu i lusim Hagen pinis na i stap nau long asples bilong em yet long Kimbe plis stesin long las mun.

Dispela em senis we plis dipatmen i kamapim long dispela yia long mekim senis long wok bilong ol plis we i ken go wantaim dispela nem, Yia bilong Lo Enfosmen long Papua Niugini.

Mista Kumbu i tok ol plisman bilong em long em long Kimbe bai mekim ol wok ol i save mekim long en. Tasol i gat planti ripot i stap yet we ol i mas stretim pastaim long ol i go insait long sampela nupela plen.

Mista Kumbu i tok planti ripot i stap yet we ol plisman i mas holim ol manmeri ya pastaim na bringim ol i

go long kot. Em i tok ol plen olsem fut parol o rot blok bai ol i kamapim bihainim long i go wantaim bikpela plen bilong gavman em long Lo Enfosmen Yia.

Mista Kumbu husat i bilong Wes Nu Briten provins i tok em i amamas long go bek long provins bilong em yet na wok long hap. Planti wok i stap yet na em bai wok hat wantaim ol plisman bilong em long stretim, em i tok.

Em i tok ol sampela plen o tingting ol i save mekim antap long hailans bai ol i kamapim bihainim wanem kain hevi o trabel i kamap long hap. Tasol Kimbe i no wankain olsem hailans. Tasol i gat ol hevi bilong lo na oda i save kamap na ol bai wok klostu long ol dispela.

Long dispela taim yet, Lae plis i wok long painim ol 6-pela lain husat i bin kilim wanpela yangpela manki bilong Garaina, Morobe provins long las wik.

Bos bilong Lae plis, Tony Wagambi i tok ol i askim nau ol pabik manmeri long helpim ol plis na givim ripot long dispela lain sapos ol i save long ol.

Mista Wagambi i tok dispela ol lain i no gat tingting long stil. Ol i

bin plen long kilim yangpela boi ya. Olsem na ol i kilim em long LFA soka graun long las wik Fraide taim LFA Klap haus i op yet. Sapos ol i laik stil, ol inap long stilim mani long klap haus ya.

Long las wik Sarere i kam long Mande, 7-pela raskel pasin i bin kamap long ol haus long Lae.

Mista Wagambi i tok i gat bikpela ren na ol raskel i brukim 7-pela

haus olgeta.

Bikos long ren, ol manmeri i stap insait long haus na i no was na dispela taim ol raskel i kism sans long brukim banis na go insait brukim ol haus na kism ol samting, Mista Wagambi i tok.

Dispela ol raskel pasin i kamap tasol long ol haus na i no long ol bisnis haus o stua long taun.

# Nupela trabel long Bogenvil pusim moa pipel i go long ol kea senta

NAMBA bilong ol pipel insait long ol kea senta long Bogenvil i stap antap tru winim mak long ol arapela yia taim hevi i stap long ailan.

Nau yet i gat 50 kea senta olgeta long Bogenvil. Na insait long ol, i gat moa long 78,000 pipel. Dispela mak i soim olsem moa pipel long ailan i stap nau insait long ol kea senta winim dispela i stap long ol ples stret.

Sentrel Bogenvil i go pas wantaim 30,000 long 12-pela kea senta.

Bana distrik long saut wes Bogenvil we i karamapim Nagovis, Baitsi na Torokina i ron bihain wantaim 26,000 pipel long 19 kea senta olgeta.

Telei distrik long Buin i ron long namba 3 ples wantaim 14,000 pipel long 9-pela kea senta. Na not wes distrik i ron las wantaim 4,400 insait long 7-pela kea senta.

Siwai distrik i gat moa long 2,500 pipel long ol senta long hap. Na Wakunai distrik i gat moa long 800 pipel long wanpela kea senta tasol long hap.

I gat ripot olsem moa pipel long Bana distrik i kam aut long bus na go insait long ol kea senta nau long hap.

Not Solomons edministretiv seketeri, George Lessi i tok em i tru olsem namba bilong ol manmeri na pikinini long ol kea senta i go antap winim ol arapela yia.

Em i tok bikpela as bilong dispela em pait namel long ol birua grup long ailan i go bikpela gen, we ol rebel paitman bilong Bogenvil Revolusineri Ami i statim.

Mista Lessi i tok olsem long daunim dispela hevi, Bogenvil Trengisenel Gavman wantaim nesene gavman i mas strongim rot na ol toktok long kamapim gutpela sindaun bek long ailan.

I mas gat moa toktok wantaim nesene gavman, BTG, na ol lida bilong

BRA na Bogenvil Interim Gavman long lukim olsem ol toktok long painim rot bilong pinisim ol hevi i go het. Na tu long abrusim pasin bilong sutim tok long wanpela arapela long ol bagarap i kamap long ailan, em i tok.

Long sait bilong ol kea senta lain long Bana i sot long kaikai, Mista Lessi i tok dispela i save kamap long taim ol pait i kamap gen. Na ol pipel i pret long go kism kaikai long ol gaden bilong ol. Na tu bikos long ol pait i save kamap, i hat long ol sip, balus na ka i bringim saplai i go long ol ples insait long bikailan Bogenvil. Olsem na dispela hevi long kaikai sot i kamap long ol kea senta.

Tasol long las wik, PNG nevi bot, MV Salamaua i bin go olsem long Nagovis wantaim ol helpim saplai. Dispela i kamap bihainim singaut bilong ol pipel husat i bin laikim helpim long kaikai na klos laplap.

Mista Lessi i tok long lukautim gut ol kea senta long wanem samting ol i laikim, edministresen bilong em i laikim moa long K2 milien. Tasol insait long 4-pela yia i go pinis, ol i wok long yusim K500,000 long lukautim ol senta pipel long wanpela yia.

Kea senta edministresen i save lukautim ol pipel, ol mani na saplai bilong ol. Stat yet long mun Oktoba las yia, ol i no kism mani bilong dispela wok. Olsem na ol i wok long yusim sampela mani bilong go hetim ol restoren progrem long lukautim ol kea senta.

Em bin tok tu olsem gavman nau i mas givim bikpela tingting na lukluk i go long ol kea senta. Na skelim inap mani long lukautim ol. Bikos moa pipel i go stap nau long ol senta.

Em i askim tu grup bilong ol sios, meri, yut, sief na ol arapela pipel long wokhat moa long rot bilong kamapim gutpela sindaun gen long ailan.

## WANTOK

NIUSPEPA BILONG OL PAPIA NIUGINI STRET

P.O. Box 1982 BOROKO  
 telepon Namba: 25 2500  
 Feks Namba: 25 2579

**PE BILONG WANPELA YIA**  
**52 NIUSPEPA**

PLES	AIR
Mosbi	K30.00
Arapela PNG eria	K60.00
Australia na NuSilan	K92.00
Esia pasifik na Japan	K123.00
Amerika na Yurop	K180.00





## Redio Morobe nidim K60,000

STESIN menesa bilong Redio Morobe, Peter Manau, i tokaut pinis olsem Redio Morobe i nidim moa long K60,000 olsem operesenel kos long ranim redio stesin long dispela yia.

Bikos long dispela hevi bilong nogat mani, Redio Morobe i pasim ol wok bilong en long las wik Sande inap long taim i gat mani redi long karim aut wok.

Aninit long ol polisi bilong nupela sisten bilong provinsal na lokol levul gavman sistem, ol provinsal redi stesin bilong Nesenel Brodkasing Komisnin, i mas kam aninit long wanwan provinsal gavman. Dispela i min olsem wanwan provinsal gavman i mas putim kamap operesenel mani bilong ol provinsal redio stesin long karim aut wok bilong ol.

Long sait bilong Redio Morobe, Morobe provinsal gavman i no givim yet mani bilong operesenel kos. Bikos long dispela as na redio stesin i pasim ol wok bilong en inap long wanem taim i gat mani long mekim wok.

Ekting edministreta bilong Morobe, Ainea Sengero, i tokaut olsem nesenel gavman i no bin tok klia gut long Morobe gavman olsem wok i stap long Morobe gavman long putim kamap edministresen mani bilong ranim Morobe Redio stesin.

Mista Manau long las wik i tokaut olsem Redio Morobe i nidim moa long K60,000 sapos redio stesin i laik karim aut wok bilong en long sevim ol pipel insait long ol rurel eria.

"Dispela em i astingting bilong i gat Morobe Redio stesin...long sevim ol rurel pipel," Mista Manau i tok.

Em i tok long nau yet, bikpela na planti sevis bilong Redio Morobe i go aut tasol long ol siti pipel. Redio stesin ya i no karim aut gut wok bilong en long sevim ol pipel insait long ol rurel eria long provins.

I gat luksave i stap olsem Mista Manau i givim pinis wanpela baset bilong operesenel kos bilong Redio Morobe i go long Morobe edministresen.

## Damansara mas bihainim lo long kisim arapela pemit

PAPUA Niugini Fores Atoriti givim pinis Timba Atoriti pemit (tokorait) i go long Damansara Fores Prodaks, wanpela Malesia kampani, long katim 5,000 hekta diwai na planim welpam insait long Aitape long Sandaun provins. Wok bilong sanim tokorait pepa na arapela samting i bin kamap long Mosbi namel long ol papagraun, gavman na kampani.

Tasol maskim PNGFA i givim pemit na Len Lis Taitel long Damansara Fores Prodaks (DFP), ol papagraun i no amamas tumas long dispela pprojek DFP i laik kirapim bikos i gat sampela hevi bai kamap. Jenerel menesa bilong PNGFA, Heith Dolman, insait long wanpela pas em i bin raitim na salim i go long Busgraun Komiti i bin autim dispela wari bilong em.

Mista Dolman i tok Fores Atoriti tu i no amamas long dispela projek na tu Damansara Fores Prodaks. Olsem na Fores Atoriti yusim olgeta strong biong en long mekim DFP i mas bihainim olgeta lo. Bikos bikpela astingting bilong dispela projek em long kamapim wanpela agrikalsa projek long planim welpam.

"PNGFA i givim tokorait long DFP long katim daun 5,000 hekta diwai long planim welpam. Tasol kampani mas bihainim olgeta lo pastaim long mipela i ken givim arapela timba atoriti. Ol i mas wokim neseri, developim plantesen, wokim somil na ol arapela liklik wok," Mista Dolman i tok long dispela pas em i salim i go long Busgraun Komiti long Aitape.

Long pas bilong em, Mista Dolman i go het na askim ol pipel bilong Aitape long was gut na skelim sapos DFP i bihainim olgeta lo we PNGFA i laikim long en. Sapos kampani ya i no bihainim ol lo, PNGFA bai no inap givim arapela timba pemit.

PNGFA i tokaut olsem Damansara i gat plen bilong wokim somil. Tasol mak bilong ol timba Damansara i gat plen long katim i no poromanim plen bilong ol. Wantok i kisim wanpela ripot olsem long kisim tokorait long PNG gavman long kirapim dispela projek, Damansara i bin grisim wanpela gutpela welpam kampani bilong Malesia ol i kolim Sime Darpy long wokim join vensa wantaim em (Damansara).

Ripot ya i tokaut olsem wanpela bikman bilong dispela kampani bilong Ebor Rises Senta long Malesia i bin kam na stap long PNG namel long Septemba 18-22 long las yia long givim tokorait bilong en long kamapim join vensa wantaim Damansara.

Maski kainkain toktok i wok long kamap long dispela projek, tupela memba bilong Sandaun provins, Paul Mambei (Aitape/Lumi MP na Minista bilong Envairomen na Konsevesen) na Gavana John Tekwie, i sanap bihan na sapotim dispela projek. Bikos tupela memba wantaim i tok kain wok olsem bai kamapim moa mani na wok insait long provins.

Long nau yet, ol pipel i wok long komplem long hevi dispela projek bai kamapim long Wara Raihu.

Plantu pipel husat i stap arere long Wara Raihu i tok long nau yet taim Damansara i wok long redim ples na ol samting bilong wok, Wara Raihu i save stap doti olgeta de. Arapela samting i olsem Damansara i kisim pemit bilong karim aut "klia feling" (clear felling) antap long Wara Raihu. Na ol pipel i wari nogut bikpela tait bai bagarapim ol pipel na ol sevis i stap arere long wara. Wantok i traim tasol i bin i no inap long kisim toktok bilong jenerel menesa bilong DFP.



**Kain samting olsem....**Wanpela singsing grup bilong Kokoda eria insait long Oro provins i bilas gut tru na sanap long fran bilong Kokoda Memoriel. Dispela em long taim wanpela televisen grup bilong Australia ol i kolim Channel Nine (9) i go long Kokoda long wokim wanpela piksa ol i kolim Dokumentari (Documentary). *Poto: John Rei.*

## Ol papagraun long Vanimo laikim K7.5 milien

### STAN RANGA i raitim

OL papagraun bilong ples Vanimo taun i wok long wetim yet gavman long bajim dispela hap graun we Vanimo taun i stap long en.

Insait long ol askim we ol papagraun i bin givim pinis long gavman bihain long kot i bin wokim disisen olsem ol pipel bilong ples Vanimo i papa tru bilong dispela hap graun, ol i askim gavman long bajim K7.5 milien stat long 1936 i kam inap long dispela yia (1996).

Long 1987 ol papagraun i bin kirapim toktok na kot bilong dispela hap graun long Vanimo taun we Lens Taitel Komisnin yet i bin harim dispela kot.

I gat tripela klen grup bilong tripela ples long Vanimo i bin wok long toktok pait na kot long dispela hap graun. Dispela tripela klen grup ya em Narimo klen long ples

Waromo, wanpela klen grup bilong ples Waropu long Aitapela wes kos na Vanimo viles komyniti grup.

Tasol bihain long kot i skelim na glasim ol toktok na stori tumbuna long dispela kot, kot i bin rausim askim na toktok bilong tupela klen grup-Narimo klen na dispela klen grup bilong ples Waropu.

Long 1992, kot i bin kisim tasol apil bilong ol papagraun bilong ples Vanimo. Na i bin wokim olsem dispela hap graun we Vanimo tauni stap long en nau i kamap Stet o gavman graun. Bihainim dispela, ol pipel bilong Vanimo i bin apil na winim dispela kot long gavman i mas bajim kompensesen. Pastaim tru ol papagrauni askim gavman long bajim K12 milien. Long wanem ol i tok gavman i bin yusim bikpela hap graun bilong ol pinis.

Aninit long dispela askim bilong gavman i mas bajim K7.5 milien olsem kompensesen, ol papagraun bilong Vanimo i laikim olsem gavman i mas skelim sampela bilong dispela mani long wokim gutpela rot, skul, haus sik, telipon na pawa saplai i go insait long ples. Na tu ol i laikim olsem ol i mas karim aut sampela bisnis wok insait long Vanimo taun.

Long nau yet, i gat luksave i stap olsem Lens Taitel Komisnin i bin raitim wanpela pas i go pinis long Provinsal Lens Opis long stretim toktok bilong dispela hap graun. Na komisnin i makim namba 25 de bilong dispela mun (Mas 25, 1996) long harim ol toktok long Vanimo kot haus.

Wantok i traim tasol i no inap long kisim toktok bilong ol opisal bilong Lens dipatmen na tu Lens Taitel Komisnin long Mosbi.

## Jaminan givim nupela ka long Yangoru polis stesin

OL polisman bilong Yangoru polis stesin insait long Is Sepik provins long dispela wik i bin amamas taim ol i kisim wanpela nupela ka. Dispela nupela ka em ol i kisim i wanpela Toyota Hailaks (Hi-Lux) Dabol kebin na 4 wil draiv (4x4).

Nesenel memba bilong Yangoru/Saussia, John Jaminan, i bajim dispela nupela Toyota Hailaks long K35,000 na givim i go long Yangoru polis stesin. Dispela K35,000 Mista Jaminan i yusim long bajim dispela ka i kam long mani bilong Ilektoral Developmen Fan akaun bilong em. Taim em i presentim dispela Toyota Hailaks i go long ol polisman bilong Yangoru polis stesin, Mista Jaminan i askim ol polisman long yusim long karim aut wok bilong ol.

Em i askim ol tu long lukautim dispela ka. Mista Jaminan i tokaut olsem ol bilong long Yangoru polis stesin bai yusim dispela ka long karim aut wok bilong lukautim lo na oda insait long Yangoru/Saussia eria na tu long Sepik Haiwe.

Memba bilong Yangoru/Saussia i kisim dispela taim tu na putim wanpela bikpela askim i go long gavman, bikpela tru long Polis minista, long putim kamap mani long stretim Yangoru na Tangori Namba 1 polis stesin. Em i putim kamap dispela askim bikos long nau yet, dispela tupela polis stesin ya i bagarap olgeta. Na i mekim hat long ol polisman long yusim long karim aut wok bilong ol.

# DOKTA WONG SOP BILONG KASKAS



Use to wash hands and parts of clothes after contact with bacteria to prevent infections and diseases.



Use to limit the spread of germs for people with colds and influenza in the home, bus and shops.



Use an air sleeping net to reduce germs.



Use to wash feet before and after meals.




Use for treating patients and home germs to prevent infections from scabies, dandruff and fungus.

WORD/SULP-SOAP/2383/28 0296-JAD

FOR MORE COMPLETE PROTEC-

Daily use on skin will help fight

- \* Bacteria (Germicide)
- \* White spots, kaskas (Fungicide)
- \* Scabies sores (Parasiticide)




WHOLESALEERS: CB Chee, Cheong Supermarket, City Pharmacy, Daru Trading, Garamut, Johnston Pharmacies, Morobe Pharmacies, Spirit of Kokopo, PriceRite, Rabtrad, SCS Trading, S&N Trading, Tangmow, Tropicana, TST.



## TU MINIT TINGTING

## NO WARIS!



FRANK MIHALIC i raitim

kaukau o banana o taro bilong tude - na i no bilong tumora. Long tumora bai ol i mekim gen. Long

LAS taim yumi bin stori long wanpela balus i bagarap. Tude yumi wokim narakin stori bilong balus.

Orait. Long wanpela de wanpela liklik meri i flai insait long wanpela traipela Jambo Jet o smok balus. Balus ya i go insait long ol bikpela klaut i boil nabaut na em i kalap nogut tru. Tasol liklik meri i no pret liklik.

Wanpela lapun i go sindaun klostu long liklik meri na i askim em, "Liklik meri, osem wanem na yu no pret long flai antap tumas long graun? Nogut yumi olgeta bai kapsait na bagarap."

Liklik meri i smail tasol na i bekim tok olsem: "Nogat. Mi no pret liklik. Long wanem, papa bilong mi em i pilot bilong dispela balus. Em i save lukaut gut long mi."

Ating yumi jeles long dispela liklik meri em i no gat wanpela wari olgeta. Yesa, yumi save pinis long God Papa em i pilot husat i stiam dispela graun. Tasol sampela taim yumi save pret na wari.

Yumi bin harim planti taim dispela tok bilong Jisas i stap long Matyu 6:25 na i go. "Maski long wari na askim: 'Bai mi kisim we kaikai na dring na klos?' Papa bilong yupela i stap long heven, em i save pinis long yupela i nidim ol dispela samting. Yupela lukim ol pinis. Ol i no save planim kaikai na bungim long bakstua. . . . Na yupela lukim ol plawa nabaut ol i no save samapim naispela klos. Papa long heven i save lukautim ol na em i save lukautim yu tu."

Yesa, God i save lukautim yumi. Tasol em i no save putim kaikai insait long maus bilong yumi. I gat kaikai; tasol yumi mas go painim. Em wok bilong yumi. Nogut yumi sindaun nating na wet bai God i mas givim ol samting long yumi. Sore, em i no save mekim olsem.

Em i no pasin bilong Papua Niugini long wari long tumora. Nogat. Taim ol meri i kam bek long gaden long apinun, ol i pulapim bilum bilong ol wantaim

taim yumi stap long taun, yumi mas lainim pasin bilong redi long tumora. Tasol em i nupela aidia.

Long PNG, yumi save wari long ol samting i go pas pinis. Tasol dispela em i wanpela long-long pasin. Yumi no inap senisim wanpela samting i go pas pinis. Maski, larim i stap.

Na yumi no ken wari tu long ol samting i laik kamap. Planti kain samting olsem i no save kamap olgeta na yumi westim taim nating.

Pasin bilong wari em inap mekim ol man/meri i go longlong. Pasin wari em inap wokim wanpela sua i save kaikai insait bilong bel.

Ol i stori long wanpela save-man i bungim wanpela rabisman long rot. Saveman i givim gutde long rabisman, na em i bekim: "Tenkyu. Olgeta de bilong mi i gupela."

Saveman i askim: "Yu min wanem?"

Rabisman i tok: "Long olgeta de mi hepi tasol. Taim san i lait, mi tenkyu long God. Na long taim bilong ren, mi tenkyu gen. Sapos mi kaikai gut, mi tenkyu long God. Na sapos mi sot long kaikai, mi tenkim God tu. Mi save pinis God yet i bosim olgeta samting long laip bilong mi na olsem mi hepi."

Nau saveman i askim rabisman, "Yu husat?" Na rabisman i tok: "Mi wanpela king."

"Tru a? Na kingdom bilong yu i stap we?"

Nau rabisman i daunim het na i tok: "Kingdom bilong mi i stap hia insait long lewa bilong mi."

Dispela rabisman i win tru. Bikos em i bihainim gut dispela hap tok bilong Jisas: "Yupela i mas wok long painim kingdom bilong God pastaim, na em bai givim olgeta arapela samting long yupela." (Mat. 6:33)

No waris!

## Bikman bilong ol sios long wol bai kam long PNG

WANPELA bikman bilong ol sios long wol bai mekim wanpela wik lukluk raun bilong em i kam long Papua Niugini stat long Sande Mas 10.

Man ya em Reveren Konrad Raiser husat i holim wok olsem jenerel seketeri long Wol Kaunsil bilong ol Sios (WCC).

Jenerel Seketeri bilong Papua Niugini Kaunsil bilong ol Sios, Reveren Kila Pat i tokaut long dispela. Em i tok insait long wanpela wik bilong Reveren Konrad Raiser long kantri, em bai lukluk raun long Lae na Mosbi. Na toktok wantaim ol bikman bilong gavman na ol sios wantaim.

Long Fonde Mas 14, Reveren Raiser bai go pas long wanpela forum o bung we ol bai kamap long Bikpela Leksa Tieta (MLT) bilong Yunivesiti ov Papua Niugini long Waigani, Mosbi. Dispela bung i bilong glasim wok bilong WCC na ol arapela samting we i kamapim wok bilong WCC na ol sios long olgeta hap bilong graun.

Askim i go long olgeta pipel long kamap long dispela bung

Hia em ol plen long wokabaut bilong Reveren Konrad Raiser:

- Long kamap bilong em long Mosbi Jacksons ples balus long Sande, Mas 10 long 3 klok apinun (3.00pm), Gavana bilong Nesenel Kapitel Distrik, Bill Skate na ol bikman bilong ol sios bai welkamim em.

- Long 30 minit i lusim 4 klok apinun (4.30pm), bai olgeta sios memba i kam bung long wanpela lotu long Marimari Luteran Sios long Godens;

- Long 9 klok moning (9.00am) long Mande Mas 11, bai lida bilong olgeta sios i bung long Yunaited Sios Asembli Hol long Mosbi dauntaun. Na long 30 minit i lusim wan klok apinun (1.30pm), Reveren Konrad Raiser bai bungim Praim Minista Sir Julius Chan. Orait, long 6 klok nait, bai gat wanpela publik lekse i kamap long Sen Mary's Katolik Katidrel long Mosbi. Dispela bung bai lukluk long wok bilong ol sios long pasin bilong kamapim gupela sindaun;

- Long Tunde Mas 12 long 6 klok moning (6.00am) bai Reveren Konrad Raiser i lusim Mosbi na go long Lae. Em bai slip wanpela nait tasol long hap na kam bek long Trinde Mas 13 long moning;

- Long 30 minit i lusim 9 klok moning (9.30am) long Trinde, bai em i go pas long wanpela publik lekse we bai kamap long Holi Famili Engliken Sios long Hohola;

- Long Trinde yet long 2 klok apinun (2.00pm) bai em i bungim ol bikbos na wokman meri bilong Word Publishing Kampani long Spring Garden Rot, Hohola;

- Long 30 minit i lusim 3 klok apinun (3.00pm) bai em i bungim ol lain Non Gavman Ogenaisesen long opis bilong Melanesien Environmen Faundesesen long Hohola yet; na

- Long Fonde Mas 14, bai em i holim bikpela bung long Yunivesiti ov PNG MLT long Waigani.

## Sios Medikel Kaunsil askim PM long makim nupela helt minista

SIOS Medikel Kaunsil (CMC) i askim nau Praim Minista Sir Julius Chan long makim wanpela ful taim nesenel helt minista.

Kaunsil i bin mekim dispela askim i go long praime minista long tupela wik i go pinis bihain long wanpela bung bilong en. Kaunsil i tok sapos gavman i mekim olsem, dispela bai soim olsem gavman i givim bikpela tingting long wok bilong helt insait long Papua Niugini.

Kaunsil i tok dispela askim i no bilong daunim wok we eking nesenel helt minista, Sir Albert Kipalan. Tasol ol sios helt sevis lain i wari long wanem minista ol i givim long lukautim helt i gat narapela ministri long wari long en. Na bai i no inap wari tumas long wok bilong helt long kantri we i wanpela bikpela samting long laip bilong olgeta manmeri na pikinini.

Sir Albert em minista bilong Lens. Long las yia, Rijonal Memba bilong Madang, Peter Barter i yesa long wok olsem gavana bilong Madang. Na lusim wok olsem helt minista na kabinet i makim Sir Albert olsem eking minista. Nau yet kabinet i no makim wanpela nupela minista.

Dispela em wanpela long ol 7-pela tokorait we kaunsil i bin kamap long en long bikpela bung (AGM) bilong en. Bung i bin kamap long wanpela wik long Mosbi. Na bin stat long Februeri 19 na pinis long namba 23 de long las wik tasol.

## Maria Hayes amamas long kibung bilong ol Katolik meri

MEKIM kamap olgeta samting i nupela na Wimen, Rikonsiliesen na Hop em i bin as long bung bilong jenerel asembli bung bilong ol Katolik meri long wol long Kenbra, Ostrelia long tripela wik i go pinis.

Presiden bilong Nesenel Katolik Wimens Federesen long Papua Niugini, Maria Hayes i givim bikpela amamas long ol lain meri bilong em husat i bin go long bikpela bung long Kenbra, Ostrelia. Na makim gut tru Papua Niugini long hap.

Dispela em long bikpela bung bilong ol Katolik meri long wol, em i bin kamap long tripela wik i go pinis.

Misis Hayes i tok planti meri bilong ol arapela kantri i bin mekim ol gupela toktok long ol Katolik PNG meri long bung

long gupela pasin bilong ol. Na tu long stap insait ol grup na paitim toktok long sampela bikpela toktok em i bin kamap long kibung.

Bung ya i bin go het long wanpela wik, stat long Februeri 5. Na em i bin pulim moa long 700 Katolik meri long olgeta hap bilong wol.

Nau yet Katolik Wimens Federesen insait long PNG bai go hetim sampela ol progem we ol i bin toktok long en, pastaim long bung bilong meri long Beijing insait long Saina las yia, na nau long Kenbra bung.

Bikpela samting, Misis Hayes i tok ol bai lukluk long en em long kamapim pasin bilong rikonsiliesen we long Tok Pisin i min olsem pasin bilong pogivim wanpela arapela na kamapim belisi namel

long wanwan manmeri, famili, komyuniti, provins na kantri. Em i tok pasin long kamapim belisi em i wanpela bikpela samting. Na dispela i mas kamap namel long ol meri bai ol i ken wok i go het gut.

Mista Hayes i tok taim yumi wok long kamapim belisi pasin na wok pren, yumi wok long helpim gupela sindaun long wol. Na dispela em i ken strongim kristen pasin tu long komyuniti na kantri.

Long welkamim olgeta lain long bikpela bung long ol Kenbra, Presiden bilong Wol Yunien bilong Katolik Wimens Ogenaisesen, Marie Therese Hogenhuis i bin tokim ol lain i stap long bung olsem ol meri i gat bikpela wok long mekim insait long developmen bilong kantri. Na dispela em long sait bilong wok politik, sosel,

ista long putim narapela man long kisim ples bilong Mista Songo;

- Ol i laikim ol CMC eksekutiv long taim dispela askim bilong ol i go long praime minista na eking helt minista;

- Long CMC fainens komiti long lukluk na mekim wok painimaut long ol haus sik fi bilong lukluk, glaim na givim tingting bilong ol long dispela samting;

- Ol sios helt seketeri na husat arapela lain moa i gat ol sampela tingting na tokok long dispela samting long salim i go long fainens komiti bilong lukim, glasim na givim tingting bilong ol long en;

- Bikos long ol nupela provinsal gavman rifom long kantri we gavman i go hetim nau, ol i strongim ol sios helt seketeri long ogenaisim ol yet gut long povinsal na distik level bilong lukim olsem ol i stap insait long ol bod bilong tupela level; na

- CMC i amamas long pasin we ol gavana bilong hailens rijon i mekim long stongim komyuniti helt na sanap stong long stapim stongpela dring i go long ol hailens provins. Ol bin askim ol atoriti long provins long noken harim tok long ol lain husat i tingting tasol long pulim mani, na i no laip na gupela sindaun bilong ol pipel.

Kaunsil i singautim tu ol arapela povins long bihainim ol hailens povins na tambuim ol strongpela dring long provins bilong ol.

## VERONICA HATUTASI i raitim



• Peter Barter, lusim sia bilong Helt minista long kamap gavana bilong Madang.

Ol arapela tokorait em kaunsil i bin kamap long en long kibung em:

- CMC i wari long pasin we nesenel helt seketeri, Paul Songo i bin mekim longi no toktok gut o wok bung wantaim ol lain bilong CMC long ol bikpela samting we i karamapim helt sevis insait long kantri. Olsem na CMC i no moa gat bilip long Mista Songo. Na askim praime min-

ikonmik o wok bisnis na long sait bilong lukautim tumbuna pasin.

Em i tok bung ya i pulim ol long askim, glasim ol plen na painimaut wanem kain wok bilong mekim insait long 4-pela yia i go pinis. Na opim lewa bilong ol long ol samting i kamap nau. Na redim ol yet long ol samting inap long yia 2000.

Sampela long ol bikpela toktok i kamap long kibung ya em long lukluk long ol insait long ol pogrem bilong wanwan kantri i mekim long daunim sik AIDS, helpim ol trangu manmeri na pikinini, wok bilong lukautim bus graun wantaim solwara na ol abus insait long en, na stapim pasin bilong pait na kilim man na bagarapim ol samting.



## St Anslem Katolik haus lotu strongim wok bilong singsing

JAMES SAKUL i raitim

SANTU Anslem Katolik haus lotu insait long Banz peris long Westen Hailans provins i kamapim pinis wanpela musik ministri grup. Grup ya bai helpim long wok bilong singim gut ol singsing na autim gutnius. Dispela em long lotu bilong olgeta Sande, na tu long ol bikpela pestode bilong peris.

Bipo i kam inap nau ol i save makim wanwan fel-sosip haus long mekim ol dispela wok. Tasol nau bai dispela Musik ministri i lukautim olgeta wok bilong autim gutnius na singsing wantaim misa.

Peris pater bilong Banz yet, Pater Mark wantaim tripela katekis bilong em, Peter Malts, Peter Yekes and Philip Pel i lukim olsem i bin gat bikpela askim o laik tru long dispela kain ministri bilong haus lotu. Olsem na ol i bin putim toksave long husat yangpela i gat laik bai stap insait long dispela wok bilong sios.

Na 80 yangpela manmeri wantaim sampela papama i bin harim dispela singsing. Ol binstap long wanpela ritrit long tripela de olgeta long Februeri 5 i go inap long namba 7 de.

Astingting bilong dispela ritrit em long strongim bilip bilong ol pastaim bai ol i go insait tru long dispela wok. Dispela ritrit i no min bai ol i stat yet. Na ol dispela lain bai go bek na i stap wan wik olgeta long wanpela musik kos bipo ol i ken go het yet long wok bilong ol.

Pater Mark i tok amamas na em i wanbel tru long ol taim ol i pinisim dispela tripela de ritrit bilong ol.

Tasol em i tok moa olsem dispela em i stat tasol na ol i mas wok strong long givim ol yet tru long bikpela. Na praktis gut tru long kamapim gutpela singsing wantaim wok bilong autim gutnius long misa.

Em i tok dispela em bikpela wok long sios na bai ol i go pas long lidim ol manmeri long taim bilong misa. Olsem na ol i mas sanap strong long bihainim olgeta lo na wok bilong Katolik sios.

# Ol sios tok ol niuspepa, redio na TV i stiam kantri

VERONICA HATUTASI i raitim

Ol sios i lukim wok bilong ol niuspepa, redio na televisen olsem wanpela grup husat i gat bikpela tingting long stiam kantri long kamapim ol gutpela senis we pipel i laikim.

Olsem na ol niuspepa, redio na televisen i gat gutpela save long rot we dispela ol senis i mas kamap.

Siaman bilong Papua Niugini Kaunsil bilong ol Sios (PNGCC) na man i makim ol sios long Sios Media Kaunsil (CCM), Reveren Wari Kwara i bin tok olsem long tupela de semina o kibung bilong glasim wok bilong ol niuspepa, redio na televisen (media).

Dispela semina i bin kamap long Sir John Guise stadium aninit long het tok long inglis olsem: The Media at the Crossroads-Media Freedom and the Constitution. Long Tok Pisin dispela het tok i min 'Wok bilong ol niuspepa, redio na televisen long rotbung-Wok bilong media long ripot fri na mama lo bilong kantri.

Kibung i kamap long Fonde Februeri 20 na Fraide Mas 1, 1996. Planti bikman meri i bin kamap long dispela kibung.



□ Reveren Wari Kwara, siaman bilong PNG Kaunsil bilong ol Sios na mausman bilong Sios Medikel Kaunsil. Em i sapot olsem gavman i noken bosim wok bilong ol niuspepa, redio na televisen.

Reveren Wari Kwara i tok PNGCC na CCM i mas sanap olsem nek o maus bilong ol profet i go long ol pipel. Olsem na em i bikpela samting long ol i telimautim trupela toktok. Na autim olgeta infomesen o ripot we bai i stiam ol pipel long mekim ol gutpela disisen o

tokorait long kamapim gutpela sindaun namel long ol yet.

Sios i sanap olsem hap long komyuniti wantaim histri na kalsa bilong em yet. Olsem tasol na PNGCC na CMM i mas kisim gutpela na kliapela save long glasim na skelim ol samting i kamap long wanwan

komyuniti na kantri, watpo ol i kamap na rot bilong stretim ol hevi na kamapim ol senis bilong kamap gutpela sindaun, Reveren Kwara i tok.

Em i tok PNGCC, CCM na media long wok bilong tokim nius long ol pipel i mas strongim na stiam tu gutpela tingting bilong ol pipel long save long ol bikpela samting we i karamapim laip na sindaun bilong ol.


Long skelim ol toktok na tingting bilong ol lida insait long kantri na komyuniti, Reveren Kwara i bin tok PNGCC na CCM i helpim ol pipel long kisim gutpela luksave long ol samting. Tasol long wankain taim, ol i mas bihainim gutpela Kristen pasin. Na kisim stia bilong God long helpim ol mekim ol stretpela tokorait.

Em bin tok tu olsem sapos ol niuspepa, redio na televisen mas sanap olsem wanpela strongpela grup long kamapim ol senis insait long komyuniti, senis i mas kamap long sait bilong tingting long ol media lain.

Long wanem ol dispela senis i tingim wanem ol samting ol pipel i laikim, ol hevi, ol pen na hatpela taim na ol hop bilong ol pipel, Reveren Kwara i tok.

# YU NO INAP WINIM

## TOYOTA HILUX 4x4 DABOLCEBIN



Dispela kar tasol em i bikpela na strongpela 1 tonne 4 wil draiv kar long Papua Niugini Toyota Hilux i givim yu nambawan 2800cc disil pawa na i gat 5 pela gia, nambawan ples bilong sindaun bilong 5 pela man. Na i gat ol arapela samting olsem ol TJM Bulba, em bilong pasim ol bulmakau na ol bikpela wil. Yu no inap mekim wanpela samting sapos yu no gat dispela Toyota Hilux 4WD. Bikpela spea pat na sevis divisen bilong Ela Motors long olgeta hap insait long Papua Niugini i sapotim dispela nupela kar.

 **TOYOTA**

**Ela Motors**



## Ol Oiyarip pipel long Sauten Hailans stopim wok bilong rot

OL papagraun bilong ples Oiyarip insait long Mendi long Sauten Hailans provins i stopim pinis ol wokman bilong Nesenel Woks dipatmen long karim aut wok bilong wokim rot long ples bilong ol.

Ripot Wantok i kisim i tokaut olsem ol lidaman bilong ples Oiyarip i tok olsem ol i stopim ol wokman bilong Nesenel Woks long wokim rot bikos gavman i mas baim ol pastaim long wok i ken stat na go het.

Ol lidaman i tok ol i no amamas long gavman na stopim wok long go het bikos gavman i no baim gut sampela samting bilong ol olsem haus, gaden, stua, bus, diwai na tu ol arapela samting.

"Mipela i askim na tu laikim olsem gavman na Nesenel Woks dipatmen i long luksave long hap graun bilong mipela na baim kompensesen long ol

### NYPHILL JACKSON i raitim

samting mipela i gat long dispela hap graun bilong mipela. Bihain long gavman i baim ol samting bilong mipela orait wok i ken go het," ol lidaman bilong ples Oiyarip i tok.

Ol i tok sapos gavman i no givim ol gutpela sevis i go long ol rurel eria insait long kantri, gavman i mas luksave long ol kain hevi olsem na baim ol samting bilong ol pipel pastaim long ol wok bilong ol bikpela projek i ken stat na go het.

Dispela rot ol papagraun i stopim ol wok long go het em long stat long ples Oiyarip na i go olsem long ples Kisenepoi.

Wantok i traim tasol i bin i no inap long kisim ol toktok bilong Nesenel Woks long Mendi na tu long hetopis long Mosbi.

## Wanpela bikpela kampani long Mendi pasim wok

WANPELA bikpela lokol kampani insait long Mendi long Sauten Hailans provins i pasim pinis olgeta wok bilong en.

Nem bilong dispela bikpela lokol kampani ya em Gilson Melpa.

Gilson Melpa i bin stop long karim aut wok stat long mun Novemba long las yia i kam inap long nau yet.

Gilson Melpa i stopim ol wok bilong em bihainim wanpela komplem ol siaholda i putim kamap.

Astingting na ol siaholda i putim kamap komplem olsem papa bilong Gilson Melpa, Jim Melpa, i laik salim kampani go long wanpela arapela bikpela kampani insait long Mendi taun. Nem bilong dispela kampani ya em Maju Pty Limited.

Maju Pty Limited em i wanpela bikpela kampani husat i gat ritel aut let stua, haus kaikai, holsel na supamakot long lalibu na Mendi taun.

Toktok i stap olsem Mista Melpa i laik hait long ol siaholda na salim bisnis bilong em long Maju Pty Limited. Tasol wanpela wokmeri bilong Gilson Melpa, husat i holim wok olsem wanpela menesa, i painim aut long hait plen na tingting bilong Mista Melpa. Na em i tokaut long pipel, wokmanmeri na ol siaholda bilong Gilson Melpa.

Ol wokmanmeri na ol siaholda i tok Gilson Melpa em i wanpela bikpela kampani na i save givim sevis i go long ol pipel bilong Sauten Hailans na ol arapela Hailans provins tu.

Ol siaholda i no amamas na tok olsem bai moa gutpela sapos Mista Melpa i mas paitim toktok wantaim ol na tok klia long ol long plen na tingting bilong em long salim kampani.

Wantok i traim tasol i bin i no inap long kisim sampela toktok bilong papa bilong Gilson Melpa, Jim Melpa.

# TPA kamapim turisim progrem

"LUKIM PNG Yia 2000" em i bikpela astingting na wok redi Nesenel Turis Promosen Atoriti long kantri i gat long dispela taim inap long yia 2000.

Tokaut bilong dispela bikpela astingting i bin kamap long wanpela Nesenel Turisim Awenes Woksop i bin kamap long Goroka, Isten Hailans provins, long namba 17 de i go inap long namba 18 de bilong las mun (Februari).

Kevin Bryne bilong hetopis bilong Papua Niugini Turisim Promosen Atoriti long Mosbi bin go pas long opim dispela woksop.

I bin i gat ol risos manmeri husat i makim Turisim Promosen Atoriti (TPA), ol non gavman oganaisesen (NGO), sampela savemanmeri na tu ol bisnis manmeri long wok turisim wok i bin kamap na stap insait long dispela woksop.

Dispela woksop i tokaut olsem TPA bai kamapim wanpela gutpela progrem long dis-

### STAN RANGA i raitim

pela yia. Astingting em long kamapim gutnem long developim turisim industri insait long wanwan provins. Dispela progrem ya ol bai kolim olsem "Turis Motivesen Progrem" we bai lukluk strong na karim aut ol wok long promotim turisim industri insait long Papua Niugini.

Aninit long dispela progrem, Turisim Promosen Atoriti bai givim sampela kain awod o prais insait long ol dispela eria: (1) gutpela na klinpela taun, (2) gutpela ges haus long ples, (3) gutpela hotel/motel, (4) gutpela provinsal senta we ol turis bai amamas long stap na i gat ol spot olsem trekking, daiving, sefing na ol arapela na (5) provins we i gat gutpela hap longol turis i go lukluk raun.

Turisim Promosen Atoriti bai lonsim dispela Turis Motivesen Progrem long wanwan provins sampela taim long dispela yia.

Sandaun provins i bin i gat tupela opisa bilong Komes opis husat i bin stap insait long dispela woksop long Goroka. Tupela opisa ya em Chris Robin na Martin Arket.

Dispela tupela opisa ya i save mekim wok long helpim na promotim Sandaun provins long sait bilong turisim indastri.

Bihain long tupela i stap insait long dispela woksop, tupela opisa ya i laik lukim olsem Sandaun provins i mas kamap olsem wanpela provins we ol turis i mas amamas long go na stap. Tupela i gat bilip olsem Sandaun provins i ken pulim planti turis bikos Sandaun i stap moa klostu long Esia rijon.

Long nau yet, TPA bai holim kos na woksop bilong Rijonal Turisim Awenes progrem insait long wanwan rijon. Long sait bilong Mamose rijon, ol i bin tokaut olsem rijonal konprens bai kamap long Vanimo long dispela yia.

## MV Koonwara stap nating

OL pipel bilong Grin Riva insait long Sandaun provins i no amamas bikos ol i nagat rot long salim ol kaikai na arapela samting long kisim mani.

Memba bilong Yabal Hai Komyuniti Gavman, William Seriamo, i wari tru bikos dispela sip MV Koonwara i no moa mekim ol ron bilong en long sevim ol pipel.

Dispela sip MV Koonwara i no mekim ol ron bilong en bikos i gat hevi long sait bilong mani long salim sip ya i go long sevis long stre-

tim. Na sip ya i ken karim aut ol ron bilong en gen long helpim ol pipel bilong Grin Riva.

Mista Seriamo i tokaut olsem dispela pasindia sip olpela Sandaun provinsal gavman i bin baim na givim i go long ol pipel bilong Grin Riva, husat i stap i stap arere long Sepik wara. Sandaun provinsal gavman i bin baim dispela sip long K64,000 bihainim wanpela askim bilong Mista Seriamo.

MV Koonwara i bin mekim laspela ron

bilong en i go daun long Sepik wara long mun Novemba long las yia. Nau sip ya i slip i stap nating long Vanimo.

Ripot i kam long kepten bilong MV Koonwara, Paskal Yali, i tokaut olsem olgeta samting long dispela sip i orait. Tasol i nogat mani long baim em yet na arapela 6-pela wokman.

Kepten Yali tok kos bilong ronim MV Koonwara long wanpela yia em samting olsem K20,000. Olsem na ol i askim Sandaun

gavman long givim helpim tasol i kam inap nau ol i no kisim wanpela gutpela bekim na wok long wet yet.

MV Koonwara i ken karim ol kago inap long wan tausen ton na i save sevim bikpela eria long Is Sepik na Sandaun bihainim Wara Sepik. Olsem na long nau yet, planti bilong ol dispela pipel i painim hat tru long salim ol samting olsem raba, kakao, skin bilong pukpuk na ol liklik bisnis.

Oloman! Husat i giaman? Sir Julius Chan, Chris Haiveta o ol niuslain bilong ABC na *The National* niuspepa? Yupela ol lain husat i ritim niuspepa las wik i mas save pinis.

Long palamen las wik, wanpela memba i bin askim Sir Julius sapos ol niuslain i bin tok tru olsem gavman i rausim ol lain bilong Wol Beng long kantri. Sir Julius i tok strong olsem ol niuslain i giaman. Tasol taim Sir Julius i o wok long mekim dispela toktok long palamen, ol lain bilong Wol Beng i bin kalap long balus na lusim kantri. I luk olsem Sir Julius i no bin save olsem ol dispela lain i lusim kantri.

I bin gat wanpela pas long man husat i makim gavman na i go pas long toktok wantaim ol Wol Beng, Morea Vele, olsem gavman i les pinis long pasin Wol Beng i mekim long pulim tok i go i kam. Mista Vele i tok olsem em i les long toktok wantaim ol dispela lain. Olsem na i klia olsem gavman i no amamas long Wol Beng.

Wanem nem bai yumi kolim man o meri huat i save long wanpela samting tasol em i tok strong olsem em i no save? Em i giaman. Praim Minita bilong mipela i mekim dispela kain pasin las wik. Olsem wanem. Bai yumi larim wanpela giaman man i go pas long kantri bilong yumi o wanem?

## Husat i giaman?



Ol opisa bilong Wol Beng i bin stap long kantri long givim sampela dinau mani long stretim sampela hevi i kamap nau long kantri. Nau i luk olsem nupela mani i no inap kamap. Ol hevi bai stap yet na i kamap bikpela moa.

I gat gutpela na nogut long dispela. Long nogut sait, em bai yumi nogat mani long stretim ol dispela hevi bilong yumi. Long gutpela sait, em bai yumi nogat wari long bekim dipela mani bikos mipela i no kisim. Na gavman i mas lukluk long ol arapela samting long stretim dipela hevi.

Sir Julius, olsem wanem long dispela K64 milien em yu na deputi bilong yu i

haitim na yupela putim kamap ples klia i no longpela taim i go pinis. Dispela mani inap long stretim sampela hevi bilong kantri.

Nau mi harim olsem ol opisal bilong Wol Beng i lusim kantri bikos ol i pinisim wok bilong ol. Tasol las wik ol i no tok olsem. Ol i tok olsem gavman i les long ol. Bilong wanem na ol i senisim toktok bilong ol nau?

Bai yumi gat hevi tu long kisim helpim mani long Australia. Ol Liberal Pati i winim ileksen na lida bilong ol John Howard bai kamap nupela praim minista bilong Australia.

Mi bin toktok wantaim wanpela bikman bilong Liberal Pati, John Downer, las yia. Mista Downer i tokim mi olsem em i no amamas long pasin sampela kantri i save yusim ol helpim mani ol i save kisim long Australia. Em i tok Papua Niugini em i wanpela bilong ol dispela kantri. Helpim mani Australia i givim Papua Niugini i winim helpim mani em Australia i save givim long ol arapela kantri. Sapos toktok bilong Mista Downer i bihainim tingting bilong Liberal

Pati, i luk olsem bai yumi kisim taim long Australia tu.

Tasol Chris Haiveta i go het na tokim yumi olsem i luk olsem klostu ol hevi bilong kantri bilong yumi bai pinis nau. Olsem kantri i wok long kamap strong gen. Em i wokim wanem samting long pinisim ol dispela hevi? Ating em i mas bilong narapela ples ya.


Mista Haiveta i bin mekim wankain toktok namba wan taim long mun long Septemba 1994 taim divaluesen i kamap. Las yia em i mekim gen. Nau, long Mas, 1996, em i mekim yet dipela toktok. Tasol wanpela samting i no senis liklik. Ol hevi i stap yet. Na i wok long kamap bikpela moa.

Yupela ting wanem? Gutpela senis bai kamap o wanem? Man. Mipela les pinis long ol dispela giaman toktok.

Las wik mi tokim ol niuslain long tokaut moa long rong bilong ol bikman na ol kampani. ABC na ol niuspepa i mekim dispela pasin taim ol i autim giaman bilong ol bikman. Tasol olsem wanem long ol rong bilong ol bikpela kampani olsem BHP na PJV? I gat planti asples i komplem long wok bilong ol dispela kampani. Wanem taim bai yumi harim kra i bilong ol asples? Mi askim tasol.




# SUPREME GUTPELA PRAIS



# ISTAP NAU





# Tok sori

Ilektorel Komisina bilong Papua Niugini Mista Reuben T. Kaiulo, MBE, i makim maus bilong famili bilong em na ol wokman meri bilong Ilektorel Komisen na salim bikpela toksore i go long

**Misis Jennifer na pikinini meri Chimolen Thompson, ol famili na pipel bilong Manus**

long indai bilong man, papa na memba bilong ol, the late

**HON. MARTIN THOMPSON, LLB, MP  
OPEN MEMBA NA GAVANA BILONG MANUS PROVINS**

MAY HE REST IN ETERNAL PEACE

**REUBEN T. KAIULO, MBE  
ILEKTOREL KOMISINA**

# Howard tok lukaut long ol bikhet lida

NUPELA AUSTRALIA Prait Minista, John Howard i putim bai aut nupela ministri bilong em long dispela wik.

Howard i kisim luksave long 44 nupela memba long palamen bai i go long Kanbera long miting bilong Leberel na Nesenel Pati palamen memba-na tu wantaim seneta.

Dispela kolisen ileksen i kamapim 36 nupela Liberel memba, tripela em nupela Nesenel memba na tripela nupela Liberel seneta husat i joinim palamen.

Howard i redi long tokaut long nupela ministri bilong em long dispela wik wantaim liklik senis we kolisen grup i gat long oposisen sait.

Planti tok ausait i bin kamap olsem Howard i mas lusim ministri bilong em olsem Foren Ministri i go long Robert Hill bilong Saut Australia, tasol Alexander Downer i gat bilip long kisim dispela posisen bilong Foren Ministri.

Howard i tokaut olsem kabinet em bai tokaut long Fraide tumoro o Mande long neks wik i mas larim lek bilong ol long graun na wet.

"Sapos mi lukim ol lida i mekim nabaut na amamas long dispela pawa bilong ol, bai ol i no inap go longpela hap bikos Australia pipel i no laikim ol dispela kain lida long ol politikel pati", Howard i tok.

Dispela toktok bilong John Howard i kamap bihain long olupela Prait Minista, Paul Keating i mekim tok

amamas bilong em i go long ol wokmanmeri bilong Leba ministri.

Keating i mekim dispela tok amamas i go long ol nupela wokmanmeri ya long bikpela haus bilong palamen. Planti manmeri i bin go bikos dispela em las taim bilong em long toktok long dispela hap. Dispela bung tu i bungim arapela memba husat tu i bin lus long ileksen long las wik.

Dispela em las taim tu bilong Mista Keating long stretim ol samting bilong em na rausim long mekim rum long nupela Prait Minista, John Howard long muv i go insait gen.

Long dispela taim, John Howard i tok em i gat bikpela sapot bihainim mak em i bin winim ileksen long en long las wik Sarere.

Wanpela bikpela mak na tingting bilong em, em long strongim wok bilong Industriyel Rilesen. Dispela em wanpela samting em i laik kamapim gutpela senis long en na mekim i wok gut long Australia. Em i bin bihainim dispela long 10-pela krismas i kam na planti vot bilong em i kam long ol lain bilong wok indastri.


Tasol Howard i tok dispela i no bilong bagarapim Tred Yunion Muvmen. Dispela i no makim woa egens Tred Yunion Muvmen, em i tok.

Wanem kain tingting bilong stretim wok bilong Industriyel Rilesen i no bilong kamapim hevi long wok bilong Tred Yunion, em i tok.

-AAP

# why buy EVINRUDE

It must be **EVINRUDE**  
If fishing is your daily  
business  
**EVINRUDE**  
is your right partner for  
cost effectiveness



**BOROKO MOTORS**  
THE GOOD GUYS FOR THE BEST BUYS

PORT MORESBY: 325 5255 LAE:421 144 RABAUL: 928 458 KIMBE: 935 566 MADANG: 822 433  
MT HAGEN: 521 433 HIGATURU: 297 175 TABUBIL: 589 061

**EVINRUDE**  
**OUTBOARDS**  
LEADING THE WAY™

DANBURY 0120



# Toktok wantaim na groa

OL MENESMEN buk i save go het taim ol i pulim ogenaisesen long soim klia lain bilong komyunikesen we bisnis i go antap na do daun. Taim dispela samting i gat ples, em bai kamap long mak o hap we em i no inap kamapim wampela samting. Tok piksa olsem, amas taim ol dipatmen het i save toktok long ol yet?. Na long ol liklik bisnis, em i no isi long holim ol kain toktok namel long mipela yet. Olsem na mipela bai mekim wanem?.

Ol lain long bisnis i mas toktok wantaim ol yet na arapela long olgeta taim. Toktok i stap olsem wok bung wantaim em as bilong kamapim kaikai bilong wok. Taim yumi lukluk long pilai spot, bai kosa i tokim ol pilaia bilong em long toktok long arapela taim ol i pilai. Ol i mas lukluk gut na taim wampela bilong ol i putim skoa, bai ol i bung na amamasim em.

Dispela i kamapim gutpela tim spirit. Na dispela em wankain tu long tim wok long sait bilong wok bisnis. Dispela i strongim na kirapim pawa bilong bilong amamas na gutpela wok. Toktok wantaim long sait bilong bisnis i mas go het moa. Ol lain long bisnis i mas toktok wantaim gut na klia.

Planti lain i save toktok tasol i no gutpela tumas bikos ol i no toktok gut wantaim. Nogat inap toktok wantaim (Komyunikesen) em as bilong ol hevi long sampela bisnis.

Tupela rot bilong toktok wantaim em long rait o toktok long maus. Rait i no wankain long toktok wantaim bikos rait i

## TOKTOK BISNIS

wantaim

EDGAR O'NIEL

no inap soim pes bilong yu we yu lap o toktok bilong yu i strong o i no strong. Tasol rait i ken karamapim sampela samting olsem toktok hat o toktok krangi we inap kamapim bel nogut long husat yu toktok long en. Skelim tupela toktok ya: 'Yu rong olgeta long mekim dispela toktok'. 'Yu ting bai i gutpela inap long mipela i bung na toktok long dispela samting long traim painim sampela wampela'.

Namba wan toktok i pasim dua long kamapim sampela kain toktok wanbel. Namba tu toktok i traim long brukim hevi namel long pasin bilong toktok bung wantaim. Maski no gat gutpela wanbel i kamap, gutpela prensip o poroman pasin i kamap pinis na i ken opim dua yet long toktok gut wantaim long bihain taim.

Yu mas was gut moa long taim yu toktok long maus. Taim yu raitim samting, i gat taim long yu ken sekim gut gen, raitim gut gen na salim. Yu toktok long maus em yu toktok yet taim yu wok long tingting tu. Na wanem samting yu givim em yu i no inap kisim bek na senisim. Na

sapos toktok bilong yu i kamapim sampela hevi, bai hevi ya i stap sampela taim inap long yu ken stretim o no gat bai nogat.

Skelim dispela tupela hap toktok.

'Oda yu wok long en i go daun olsem na bai menesmen i daunim ovataim'. 'Yu no inap kisim ovataim bilong yu long dispela wiken'. Dispela i klia olsem bai i gat tupela kain tingting long tupela hap toktok ya.

As bilong gutpela rot long toktok wantaim (komyunikesen) long bisnis em gutpela toktok bilong Inglis tokples na olgeta wokman na wokmeri i mas traim long stretim gut Inglis toktok bilong ol. Dispela i no min olsem tok pisnis na tok Motu i no gutpela long toktok wantaim arapela. I gat planti gutpela na strongpela wokmanmeri husat i no save toktok Inglis tumas. Tasol wok bai i go gut olsem wanem sapos yu no toktok long arapela we ol i no save toktok long en?. Toktok long ol kastoma long tokples bilong ol i orait tasol.

Wampela bikpela samting tu long sait bilong toktok wantaim arapela em long luksave long mak arapela i stap long en. Dispela em min olsem yu mas skelim gut mak na pasin man yu toktok wantaim i stap long en. 'Mekim gut long arapela olsem yu mekim long yu yet'. Dispela em mak yu mas sanap long en na bai yu i no inap abrus.

Sampela gutpela piksa bilong pasin bilong toktok wantaim em;

Yusim isi na klia toktok. Longpela na bikpela toktok bai paulim tingting. Yu wok long raitim o toktok long wampela we yu laik klia gut long en. Yu no rait o toktok long apim nem bilong yu long kain toktok Inglis bilong yu. Tok i stap olsem man i ken raitim tok wok bilong em wantaim mak long 100 toktok tasol. Yusim ol liklik na isi toktok na i no ol kain bikpela toktok we yu inap painim long dikseneri buk.

Supervision in Action (The Art of Managing) by Claude George and Kris Cole (Prentice Hall) i skelim 6-pela mak bilong C leta bilong komyunikesen.

Is it clear?. Em i klia?

Is is complete?. Em i pinis?

Is it concise? Em i inap?

Is it concrete? Em i strong?

Is it correct? Em i stret?

Is it courteous? Em i gutpela?

Las long en em harim gut em gutpela mak bilong gutpela toktok wantaim. Harim em hat wok. Em i isi tru long tanim aut taim yu gat arapela samting long tingting bilong yu o yu wok long tingim sampela samting i stap. Tru olsem taim yu harim na skelim gut taim arapela i toktok, yu inap klia long sampela samting.

Pe bilong gutpela komyunikesen em gutpela amamas bilong wok bung wantaim arapela long wok na yu ken lukim wok i go gut na kaikai bilong wok i ken go gut tu.

## Rot bilong lukautim sindaun long ples-liklik buai bisnis

LONG planti hap na liklik ples long Papua Niugini buai nau i kamap olsem wampela isipela rot bilong salim bilong painim liklik wan siling long halivim sindaun. Wanwan femili long ol ples bilong yumi tude i planim na i gat planti buai plentesne bilong ol yet. Sampela i save salim long ples long die na nait na sampela i kisim na slalim long ol maket long taun, taim sampela i salim i go aut long ol bikpela senta na hap we i no save planim buai long salim na sevim lain bilong kaikai buai i wok na stap long dispela ples.

Mi bin kam nambawan taim long Vanimo long 1984, mi kamdaun long Talair balus na skim ol manmeri, maket istap we? Na wampela brata husait i no klia tumas long mi i bekim, wanples yu bihainim rot i go na tanim i go olsem long lep han bilong yu na bai yu lukim ol man i pulap i stap. Mi holim liklik hanbek bilong mi na mi stat wokabaut bihainim rot. Samapela yangpela man tu i toktok amamas na bihainim rot i kam olsem long mi. Wampela namel long ol dispela yangpela i spet wantaim singaut, "mi no spak longmoni bilong yu, mi spak long moni bilong susa bilong mi stret ya."

M daunim het long graun i stap na hariap tru mi apim het bilong mi na lukluk long ol. Mi lukluk long lek i go antap long het bilong wanwan bilong tasol mi no lukim katen bia o botol bia long han bilong wampela bilong o.l. Ol i kam klostu na maus bilong ol i wok long stail bilong ol, i go antap, kamdaun na saitim saitim na repela mak i penim frnat bilong maus bilong ol olsem wampela meri i putim lip stik. Olgeta i lukluk strong long mi long wanem mi tu i nupela pes long ai bilong ol. Mi lusim ol i go liklik na tingim em i stret, bia bilong Papua Niugini stret ating? Mi no tingim ol moa na mi wokabaut raunim Vanimo taun maket. Mi lukim stret long ai bilongmi, long olgeta bet, long semen insait long maket i pulap tur long buai na daka. Mi baim liklik buai na sampela samting moa na mi go. Long arere bilong rot i go olsem long Vanimo Wes

### STAN RANGA i raitim

Kos, long ol liklik ples stat long Lido i go inap long lasples Wutung, ol yangpela meri, lapun na pikinini i sanap na salim buai na daka stap. Wankain olsem tu long olgeta liklik ples long PNG i stap klostu long nambis. Ol i save planim buai na daka.

Nau insait bilong mi ngim pini, trua ya buai i nambawan rot we i save halivim ol mama na ol lapun long lukautim famili ating? Dispela askim bilong mi i no krangi. Insait long Vanimo Wes Kos, planti mama i ksim bikpela helpim pinis. Long wanem plant of family i gat planti plentesne buai a long wan wan graun bilong ol. Olget taim yu bai lukim olsem olgeta de namel long wan wik na bikpela moa long olgeta sarere, planti mama na lapun i kam long maket long salim buai. Buai i no save sot long Vanimo long olgeta yia. Taim ol arapela hap bilong kantri i lus tru na sot, Vanimo buai i stap yet. Sapos yu go long ol les long Wes Kos, taun maket. Aigirs nambis maket na Ai slip maket long tawa, ol mama i sindaun long moning i go nap long sandaun i go daun wantaim buai long maket.

Sampela mama i tokim mi olsem sampela de ol i ken winim mak moni olsem K15 i go antap long K50. "Yu ting wanem? em i askim mi. Em i go moa na tokim mi olsem em i mamas tru logn wanem i no hatwork logn painim moni long dispela kain rot.

Sampela i baim liklik suga na karasin bilong gamili na sampela moni i go long pasbuk long benk bilong was long famili. Nau sapos yu askim wampela lapun mama, sampela i gat moa long K200 na i go antap i stap long pasbuk. Em mani i kam long salim buai tasol.

Long ol bikpela ples olsem Lido, buai kamap olsem blek maket wea yu ken kirapim manmeri long nait long baim buai. Olem na bia i isiple rot tru long pulim wan siling bilong baim suga na karasin."

## SOME PEOPLE DON'T TAKE STUDYING BY MAIL SERIOUSLY

Some people believe that you cannot get a good education through distance education. Some people believe that, because you are getting your education through a correspondence school, you don't have to work for your diploma or your degree. Some people confuse "phony degree mills" with legitimate distance-education schools. If you are one of these people, don't read any further.

ICS is looking for people who take their education SERIOUSLY, whether attending a traditional college or studying by mail. We are looking for people who will apply themselves and work hard to get the full value of the training that ICS offers: Diplomas and Degrees are issued upon successful completion of a course accredited by the Distance Education and Training Council...your guarantee of a quality education. If you take your education seriously and want to train for a new career or improve your job skills for advancement in your present job, ICS may have the right career training for you. Choose from 61 career courses listed below. Select the one career field you would like to train for and indicate that choice in the coupon below. Cut out this ad and mail it to ICS TODAY. We will send you a detailed course outline and tuition schedule by return Airmail. There is no obligation.



SEND FOR FREE FACTS—NO OBLIGATION

International Correspondence Schools, Dept. TTS46  
Box 1900, Scranton, PA 18501 1900 U.S.A.

Internet World Wide Web  
address: <http://www.icslearn.com>

**The World's Recognized Leader in Home-Study Training for More Than 100 Years.**

### ASSOCIATE IN SPECIALIZED BUSINESS DEGREE PROGRAMS

60 Business Management  
61 Accounting  
80 Business Management with option in Marketing  
81 Business Management with option in Finance  
64 Applied Computer Science  
68 Hospitality Management

### ASSOCIATE IN SPECIALIZED TECHNOLOGY DEGREE PROGRAMS

67 Electronics Technology  
63 Civil Engineering Tech.  
62 Mechanical Engineering Tech.  
65 Electrical Engineering Tech.  
66 Industrial Engineering Tech.

**Get FREE Information—MAIL ENTIRE AD TODAY OR FAX TO 717-343-8462**

Write the number of the one career that interests you \_\_\_\_\_

PLEASE PRINT

MR / MRS / MISS \_\_\_\_\_

AGE \_\_\_\_\_

ADDRESS \_\_\_\_\_

CITY \_\_\_\_\_

POSTAL CODE \_\_\_\_\_

COUNTRY \_\_\_\_\_


(PHONE) \_\_\_\_\_

### CAREER DIPLOMA PROGRAMS


01 Computer Programming in BASIC  
07 U.S. High School Diploma  
02 Electronics  
05 Hotel/Restaurant Management  
13 Professional Secretary  
35 Travel Agent  
14 Air Conditioning & Refrigeration  
32 Art  
59 Catering/Gourmet Cooking  
23 Medical Office Assistant  
51 Fashion Merchandising  
33 Motorcycle Repair  
52 Surveying & Mapping  
22 Wildlife/Forestry Conservation  
47 Animal Care Specialist  
260B Building Trades  
106 General Business  
16 Practical English  
89 Small Engine Repair  
50 Starting Your Own Business  
08 Legal Assistant  
48 Computer-Assisted Bookkeeping  
42 Dressmaking & Design  
87 TV/VCR Repair  
04 Auto Mechanics  
12 Interior Decorating

18 Bookkeeping  
06 Electrician  
03 Child Day Care  
38 Personal Computer Specialist  
29 Police Sciences  
10 Private Security Officer  
09 Legal Secretary  
55 Diesel Mechanics  
94 Fitness & Nutrition  
85 Drafting  
260A Architecture  
260C Machine Shop  
161 Engineering  
41 Journalism/Short Story Writing  
40 Photography  
70 Computer-Assisted Small Business Mgmt.  
79 Electronics Technician  
91 Cartooning  
25 Firearms Repair  
27 Personal Computer Repair  
26 Teacher Aide  
30 Floral Design  
53 Desktop Publishing  
39 Medical Transcriptionist






• Sition Passingan em i wampela nupela jas husat i holim buk baibel na em i wokim promis bilong em. Passingan bai wok olsem jas insait long Mosbi Nesenel Kot.



• Antap: Nupela dairekta bilong Fores Atoriti Guao Zurrenuoc long raithan i sanap wantaim gavana generel Se Wiwa Korowi (name!) na seketeri bilong fainens Rupa Mulina long Gavman Haus. Zurrenuoc i bin mekim promis long en long wokim wok bilong em olsem menesin dairekta bilong Fores long las wik long ai bilong gavana generel.



• Lephan: Masta ya, em lan Fry. Mista Fry i bin jenerel menesa bilong Wod Pablisin, mama kampani bilong Wantok Niuspepa. Mista Fry i lusim kantri i go bek gen long ples bilong em yet, Ostrelia. Piksa i soim Elizabeth Konga, wokmeri bilong Wod Pablisin i tok gutbai long en.



• Bruda Pat Howley em i dairekta bilong Foundesen bilong Lo, Oda na Jastis insait long Mosbi. Bruda Pat i paitim han long ol kalabu husat i bin pinisim wampela kos ol i kolim Konflik resolusen. Moa long 50-pela kalabus lain na tu ol woda i bin stap insait long dispela kos we Foundesen bilong Lo, Oda na Jastis i bin kamapim.



• Dispela em i ol nupela jas bilong kot. Faivpela ya i em i bin promis long ai bilong gavana generel long wokim wok long olsem jas we ol i bai bihainim lo bilong kantri na tu long nem bilong lesus.



• Dispela em i piksa bilong ol man bilong Gorroka i go wail olgeta taim ol i harim nek bilong Wali Hits. Wali hits i bin wampela ben husat i bin pilai long Goroka B&H Golden Tones musik tua. Foto Elizabeth Leny



## JAMES SAKUL i raitim

LONG olgeta hap bilong graun, i gat ol man i save wokim kainkain samting olsem ka na masin, planim ol kainkain gaden kaikai olsem ol prut samting o ol lukautim ol bulmakau, pik, sipsip, kakaruk na salim long kisim moni. Bikpela samting tru em mi ting sapos i gat planti pipoe i gat laik long wanem samting yu salim bai ol i baim hariap tru. Na ol samting bai pinis kwik-taim.

Sapos i nogat planti pipel i laik baim bai ol samting bilong yu i go bagarap o nogat bai yu daunim prais i go daun tru na salim. Namba wan tingting yumi mas kisim em sapos yumi laik salim wanem kain samting yumi wokim o planim o lukautim, bai gat ol manmeri long baim o nogat.

Yumi ken tok olsem sapos yumi laik salim wanem kainkain ol samting yumi wokim o planim o lukautim, yumi mas i gut gupela maket o ol pipel bilong baim.

Long planti bilong yumi, namba wan tingting i save kam pas olsem maket em wanpela ples we i gat haus na banis we bai mipela i go wetim wantaim ol samting long ol kastoma bai kam lukluk na baim. Em i tru. Tasol sapos i gat planti samting wan kan olsem bilong yu bai yu painim hat tru long salim. Wanpela we em yu ken daunim prais bilong yu tasol em bai yu lusim moa moni long kamapim gen dispela samting. Na yu no inap wokim profit mani.

Namba tu tingting em sapos i gat planti manmeri long baim wanem samting yu salim yu bai save olsem i gat planti lain bilong baim ol samting bilong yu i stap. Na yu i no inap wari long go westim taim long sanap long taim. Na wetim ol man bai baim long hap rot yet na bai yu go het long kamapim na salim dispela sem samting yet. Yu bai save olsem yu gat gupela maket. Long wanem i gat planti pipel bilong baim.

Long planti hap bilong Papua Niugini long ol ples, ol taun na tu long ol setelmen i gat planti manmeri i save lukautim kakaruk na salim. Ol i save karim i go long maket ples na salim wanwan long K10.

Sapos i gat toktok o pait samting, ol man bai baim planti. Taim nating ol i save salim wanpela o tupela na karim ol arapela i go bek long haus. Sampela taim sapos i gat planti ol lain bilong salim kakaruk bai ol no inap salim sampela tu. Sapos i gat planti kakaruk i stap yet, ol papamama bilong kakaruk i save painim

# Yu ken pilai dat nau long winim kakaruk

hevi bilong baim kaikai na lukautim ol. Ol i redi pinis tasol i nogat inap manmeri bilong baim kakaruk bilong ol. Olsem na ol i save spenim moa moni long kaikai long lukautim yet kakaruk i go inap ol i salim olgeta.

Mi i no save long ol narapela hap long kantri we planti manmeri i save lukautim kakaruk. Tasol long Banz insait long Not Wagi eria bilong Westen Hailans provins, i gat gupela maket tru bilong ol kakaruk lain. Dispela kain maket em we bilong pila dats na winim kakaruk.


Maski ol manmeri lukautim 50 o 100 kakaruk, ol i save salim insait long wanpela wik tasol. Hamas manmeri bilong salim kakaruk save karim bilong ol i kam tasol save pinis nating long dispela we bilong pilai dats.

Ol papamama bilong kakaruk save sanapim dats bod na salim 10-pela spia long 10t tasol long wanwan. Orait 10-pela man i save baim na sut long dats bod. Husat i skorim bikpela namba bai kuskus i putim nem bilong em i go daun. Dispela namba wan raun ol i pilai i kamap olsem K1 pinis. Olsem na i min olsem man wantaim bikpela skoa i betim K1. Dispela kain pasin bai go inap 10-pela raun. Taim 10-pela raun i pinis bai papa bilong kakaruk i save holim K10 stret. Nau 10-pela man tasol husat nem bilong ol i stap long pepa bai ol i pilai. Tu tu man bai holim 5-pela spia na tromoi long dats bod. Husat namba wan man i skoa moa abrusim 100 poin bai winim kakaruk.

Sapos tupela o tripela man em skoa bilong ol i abrusim 100 orait, husat man i go antap moa save win.

Long dispela kain we, planti manmeri save laki na winim laip kakaruk. Olsem na ol i save kam bek olgeta de long pilai kakaruk dats. Bikos ol i save olsem gupela taim bilong bai 10t tasol na winim kakaruk. Olgeta de long Mande i go inap Sande, dispela pasin bilong kakaruk dats i save kamap long Banz.

Tupela yangpela man husit i save lukautim kakaruk na kam salim long Banz long dispela kain nupela kakaruk maket bilong ol em Joe Baka ma Leo Bolye. Joe Baka bilong ples Eltimb na Leo Bolye bilong lpes Munumpa long Banz distrik yet. Tupela i autim tingting tupela i gat long dispela kain we bilong salim



## Nupela kain kopi baya nau long Banz...

• Ol kopi i redi nau long kisim na salim. Olsem na yangpela boi ya i sanap na aigris long ol jeri kopi bilong salim na kisim liklik mani bilong baim skul fi.

Lukim ful ripot long pes 15.

kakaruk. Bekim bilong tupela i wankain tasol. Tupela i amamas tru na tok bipo tupela save painim hat tru long salim kakaruk bilong tupela. Tasol nau tupela i ken salim hariap tru.

Tupela tok ol man i no save kea long wanem kain sais bilong kakaruk. Long wanem ol i save olsem 10t o 20t tasol bilong ol i ken laki. Na ol bai karim wan o tupela kakaruk i go long haus na kuk wantaim femili bilong ol. Tupela i tok tu olsem planti man i wok long salim kakaruk wantim dats. Tasol olgeta de hamas lain karim kakaruk bilong ol i kam save pinis nating. Bikos moa man yet save kam long traim laki bilong ol wantaim 10t.

Taim mi wok long tok tok na lukluk yet, planti taim mi save sanap long dispela ples bilong kakaruk dats, mi lukim 10-pela dats bod i sanap. Na baksait tasol i gat wanwan bokis kakaruk i stap. Mi lukluk i go tasol mi lukim sampela i bikpela na sampela i liklik, sampela i fatpela na sampela i bun nating. Bihain long sampela askim long ol papa bilong kakaruk na liklik wok painimaut, mi luksave olsem sampela kakaruk i gat 5-pela wik tasol, sampela i gat 6-pela wik, sampela i gat 7-pela wik, na samples i gat 8-pela wik. Mi luksave olsem sampela kakaruk em ol i salim long stretpela taim bilong ol. Na sampela

em ol i salim kwik taim ol i yangpela yet.

I tru olsem ol kakaruk mas i stap 7 o 8-pela wik, bai ol redi stret tru long kaikai. Tasol nogat nau long dispela kain maket. Ol papamama bilong kakaruk i salim nating nating. Bikos planti moa mani i amamas long tromoi 10t tasol na traim laki bilong ol.

Kakaruk dats i kamapim tru wanpela gupela na bikpela maket bilong ol lain i save lukautim kakaruk. Maski planti lain i lukautim na karim i kam salim, dispela kain maket i mekim na planti manmeri moa i wok long i go insait long wok bisnis bilong lukautim kakaruk long Banz.

## RAIT BILONG OL PIKININI


1. Yu save long **Konvensen long Rait bilong ol pikinini?** Long Tok Inglis ol i kolim, **Convention on the Rights of the Child.**

Dispela Konvensen o bikpela kibung i singaut long gavman i mas lukautim ol rait bilong ol pikinini. Em i tok gavman i mas redim ol kain

sevis we bai helpim ol pikinini long kamap gupela, strongpela na helti we bai no inap kisim sik sua.

Konvensen i tok tu olsem olgeta wanwan manmeri na papamama tu i mas sambai. Na givim ol dispela rait long ol pikinini.


182 kantri i sainim pinis dispela Konvensen. PNG i sainim long yia 1993. Na em i mas bihainim ol toktok bilong Konvensen. **Yu yet bai mekim wanem long lukautim rait bilong ol?** Tok i go pas, Konvensen long rait bilong pikinini.



**LUKIM MOA RIPOT LONG  
DISPELA LONG NEKS WIK**



# ON SALE EVERY THURSDAY THROUGHOUT THE NATION



# WANTOK

Established twenty six years ago, **WANTOK**, with local news and sport gathered from across the country, is Papua New Guinea's only Pidgin language newspaper.

**50t tasol**

**WANTOK**  
NIUSPEPA BILONG YUMI OL PAPAUA NIUGINI STRET - 26 VIA NAU  
Wik i stat long Fonde, Febreri 1, 1996  
50 toca

**Ol Makam laik blokim haiwe rot**  
*Ol i tok ol Goroka mas baim K200,000 kompensesen long dai bilong boi*

**WANTOK**  
NIUSPEPA BILONG PAPAUA NIUGINI  
Namba 1,125  
Wik i stat long Fonde, Febreri 1, 1996  
50 toca

**Gavman long ol...**

**WANTOK**  
NIUSPEPA BILONG PAPAUA NIUGINI  
Namba 1,125  
Wik i stat long Fonde, Febreri 1, 1996  
50 toca

**PROUDLY PUBLISHED BY WORD PUBLISHING COMPANY PTY. LTD.  
P.O. BOX 1982, BOROKO, NCD, PHONE: 325 2500, FAX: 325 2579.**





■ Kanage lusim Wewak na kisim smok balus na go daun long Vanimo, biktaun bilong Sandaun provins. Kanage i nupela long Vanimo. Olsem na taim em i lusim plesbalus kam aut, em paul olgeta na sanap lukluk i stap. I no longtaim tupela meri Sandaun i kamap na tromoi ai long em i stap. Tupela i glasim Kanage long het na go daun olgeta long lek.

Kanage i stailim long wanpela professional stokmen su na sanap isi i stap. Tupela su bilong Kanage i gat longpela hils stret. I no longtaim tupela meri i kamap klostu long Kanage na askim: Hei poro! Yu raitman stret ya! Su bilong yu em inap stret long mi ya, yu sais bilong mi ya. Kanage harim olsem na hai filings stret. Em tingting olsem nau tasol em pundaun long balus. Na olsem wanpela nupela pes, em autim pinis tiket bilong wanpela meri Sandaun.

Tasol i no longtaim meri ya i askim gen: Tasol em i no su bilong ol man. Em su bilong ol meri ya. Kanage harim olsem na bel kaskas nau. Em kirap na tokim meri ya: Hei meri Sandaun. Yu karim sais bilong yu go na traim sampela man. Mi em ovasais ya. Nogut yu singautim tumbuna bilong yu. And listen! This is a man's shoes and no ladies shoes!

Tupela meri Sandaun harim olsem na sem pipia stret. Taim Kanage lukim olsem, kwiktaim em kisim gen strong na smail i stap.

Chokes Creator  
VANIMO

□ Kanage i go long Kiunga taun na go insait long wanpela stua. Stua ya em wanpela stail meri stret wok i stap. Em wokabaut isi tasol i go long kaunta na askim meri ya: Wantok, yupela salim sampela soks tu? Tasol meri ya i no harim gut na askim: Mono! yu tok gen, mi no harim yu gut? Orait Kanage askim gen: Yupela save salim ol soks tu o nogat? Meri ya harim na kilim lap stret. Na bihain em go kisim tupela kondom i kam na givim Kanage. Isi tasol Kanage smail long meri ya na tokim em: Yu klia tumas ya, i no beng, em haus sik ya. Samting tu em kilim yu na yu karim stret ya.  
Papa Kanage  
TABUBIL

■ Kanage pilai wantaim Momase soka klab bilong Wewak soka resis long wiken. Na wanpela bruk botol long fil i katim lek bilong em. Man em kisim bikpela bagarap na lusim planti blut stret. Kwiktaim ol wan pilaia kisi em i go long Boram haus sik.

Em go insait long haus sik na wanpela yangpela nes meri kisim em i go long rum bilong sekim ol sikman meri. Nes ya laik holim lek bilong Kanage na lukim botol na rausim. Tasol Kanage pilim pen nogut tru na singaut strong stret.

Na nes meri ya belhat na hatim Kanage: Yu olsem wanem, yu mangi o! Slip isi na mi stretim sindaun bilong yu.

Kanage harim olsem na slip isi tasol. Orait nes ya go stretim ol marasin na sanap krangi liklik. Kanage slip i stap na Kanage lukim nes meri ya i go na aut olgeta. Em lus tingting long lek bilong em. Kwiktaim em tokim nes meri ya: Yupela kunai ges bilong nambis stret o? Nes meri i harim na bekim isi tasol: What do you expect, furthers a? Sapos yu laik save, sait sait em kela na namel pulap long ges ya!

Kanage sem pipia stret na bekim: Aiyo yu tu ya. Yu wokim na kus bilong mi i pundaun nating na bagarapim tingting bilong mi ya. Nes i harim na bekim: Yu ken putim bata na bred, tasol em bai hat ya!

Sem taim em planim sut long as bilong Kanage. Kanage kalap nogut na singaut: Aiyo mama, as bilong mi ya! Na nes i bekim isi tasol: Yu kisim nau. Nau yu tingim mama bilong yu.

Side Mero  
TABUBIL

LUKIM MOA TOKPILAI WANTAIM KANAGE LONG PLES 18

# Ol narapela kain kopi baya kamap long Bans

INSAIT long Westen Hailans provins, olgeta manmeri long ples i gat liklik blok kopi. Na dispela em wanpela rot tasol planti bilong ol i save kisim moni na lukautim ol yet.

Long wanem kopi i save gro na i stap longpela taim yet. Na planti manmeri i save klinim, lukautim gut na taim pikinini kopi i mau, ol i save pikim, masinim, wasim na draim gut pastaim long ol i save i go salim. Dispela em hatwok tru long ol manmeri long ples husat i save planim kopi na wok long en. Long tok inglis yumi ken kolim ol kopi groa.

Taim ol kopi groa i redim kopi bilong ol pinis, ol i save karim i go salim kopi bilong ol long ol papa bilong ol kopi fektori. Dispela ol lain em ol papa bilong moni tu. Na taim ol i baim kopi bilong ol manmeri long ples, ol i save katim i go grin bin na salim i go long ol ovasis kantri.

Ol dispela lain papa bilong kopi fektori wantaim moni i save salim ol wokman bilong ol, ol i save kolim ol kopi baya i go aut long rot na long ples na baim kopi na kisim i go bek long fektori. Dispela em stretpela pasin we i ol kopi groa i save laikim na salim stret kopi bilong ol i go long fektori. Na kisim gutpela moni long hatwok na mak stret bilong kopi bilong ol.

Wanwan taim ol liklik bisnismen husat i gat planti moni liklik i save raun baim kopi tu. Ol i save baim long stretpela pasin tu. Tasol ol i nogat fektori long katim kopi. Olsem na ol i save baim long rot prais na karim i go salim long ol fektori. Ol i save kolim ol dispela lain praivet baya (private buyers).

Tasol nau long dispela taim long liklik taun Bans insait long Westen Hailans provins, i gat ol narapela kain praivet baya olgeta. Ol i save kolim ol dispela lain ol 'graun baya' (ground buyers).

Ol dispela graun baya i nogat wanpela moni bilong ol yet. Na tu ol i no save wok long wanpela kopi fektori. Ol dispela lain graun baya wok bilong ol em long was long rot na ronim ol ka wantaim kopi na pulim kopi bilong ol kopi groa na salim i go long ol kopi baya bilong ol fektori stret. Long dispela hatwok bilong ol long ronim ol ka na pulim kopi long ol man, ol i save kisim liklik toea sapos ol fektori kopi baya i katim sampela toea long kilogrem bilong skel. Ol dispela graun baias i nogat wok bilong ol. Ol i save kirap long 6 klok moning na i go i stap long ples bilong kopi.

## JAMES SAKUL i raitim

maket na mekim dispela kain wok olgeta de.

Taim Wantok i toktok wantaim wanpela bilong ol dispela graun baya, em yet i laikim nem bilong em i stap olsem John. John i tok nau long dispela taim i hatwok tru long painim wok. Na dispela em wanpela rot tasol em i save wokim liklik moni long olgeta de na lukautim famili bilong em.

Em i tok em i no save sem o wari long planti manmeri lukim na bikmaus long em long ron i go i kam na pulim kopi nabaut. Sapos em i no mekim olsem bai em i no inap painim liklik mani long karim i go bek long haus.

Wanwan taim ol dispela graun baya i save kisim K50 o K60 long ol fektori baya stret na pulim kopi i go salim na traim long baim.

Ol i save traim katim sampela kilogrem long hevi bilong beg kopi bilong ol groa na baim. Sapos ol i laki na kisim dispela kopi, ol bai skelim hamas moni bilong hevi

bilong kopi ol i katim kilogrem long skel em i bilong ol nau. Na kopi bai ol salim gen long ol fektori baya long stretpela kilogrem bilong kopi beg.

Wantok i askim John moa long hamas moni tru em i save wokim long wanwan deina em i bekim olsem," yu save pinis olsem mipela i nogat wok na dispela em i wanpela wok bilong mi wantaim ol wanwok bilong mi long painim moni. Olsem na mipela i save mekim kainkain trik long wok bilong mipela." Taim i nogat planti kopi em i tok ol i save mekim K10 o K50 long wanwan de. Tasol long taim bilong kopi nau, John i lap na tok, "Ol kopi groa save kisim taim bikos mipela save katim kilogrem bilong kopi bilong ol na paulim ol gut tru na wokim planti moni. Em i tok ol i save mekim K40 o K50 long long wanwan dei. Tru tumas ol dispela graun baya i save hatwok tru long liklik mani bilong famili bilong ol long wanwan de. Tasol i gat planti trik na paul pasin namel long ol we i no luk gutpela tumas long kopi bisnis."

Taim ol graun bayabaim liklik hap kopi long ol groa, ol i save kapsaitim kopi i go long graun nating we i gat graun, wesana, pipia na kainkain samting. Na bihain ol i save miksim ol 3 na 4 kopi wantaim 1 na 2 long beg pastaim bihain ol i save kisim i go skelim long fektori baya. Ol i save mekim olsem long apim kilogrem o hevi bilong kopi beg i go antap na wokim sampela sait moni bilong ol. Tasol i gat wanpela bikpela samting rong we Wantok i no save ol i klia o nogat em ol i save gagarapim gutpela nem na kwaliti bilong kopi bilong ol groa long Wagi Veli stret.

Narapela bikpela samting Wantok i no klia em bilong wanem tru na ol lain long fektori i save kisim dispela kain miksi kopi yet. Ol fektori tasol bai katim kopi i go grin bin na salim i go long ol narapela kantri na i no ol graun baya. Sapos ol fektori lain i go slek long wok bilong ol, ol tu i asua long mekim kwaliti bilong kopi i go daun.


Long dispela taim yet mi bin go lukim bos bilong

Kopi Industri Kopresen (CIC) long Bans opis long dispela hevi. Em i tok em i save pinis long dispela hevi bilong ol graun baya wantaim ol fektori long Bans. I gat pepa na pas i stap pinis long het opis bilong CIC long Goroka long dispela hevi.

Em i tok taim toksave i kam long ol long wanem rot ol bai kisim, em bai lusim i go long han bilong Bans Taun Kaunsil, ol kopi inspekta na plis long mekim wok sek ap, stre-tim na daunim dispela pasin bilong barapim kwaliti bilong kopi. Sapos i tru olsem ol graun baya i kamapim planti bilong dispela krangi pasin, ating bai ol i mas stapim ol dispela lain na putim ol laisens baya tasol.

Long Goroka, Kundiawa na Hagen i gat ol kopi baya i stap. Na ol i save bihainim stretpela we na pasin bilong kisim kopi. I no olsem Bans we i ol graun baya i save draivim ka wantaim kopi na pulim kopi long han bilong ol groa. Ol i save mekim olsem na ol i gat gutpela nem long kamapim gutpela na klinpela kopi.

# THE GOOD EGG



## Gutpela Riau!

I STAP LONG OLGETA  
NAMBawan RITel NA HOLSEL  
STUA LONG PNG





# Bik Bro REBO

NAU OLGETA MONI BILONG MINISTA IGO BEK NA KLIAIM OLGETA DINAU!!!

TCH! TCH! TCH! WANPELA KLEVA MAN STRET! NAU YU PAIA!

KUNDI YANDE	
AKALINT	1996
MUN	BALANG
APRIL	5,000
MEL	15,000
JUN	20,000
JULAI	12,000
AGOS	30,000

LONG KUNDIAWA MINISTA APO LAIK RAUSIM SAMPELA MONI LONG GO SPIN LONG HAWAII!!!

EM NAU! MI RAUSIM MONI NA GO RAUN LIKLIK LONG HAWAII NA PANIM MERI!

ER. SIR..INAP YU WET LIKLIK, MI GO SEKIM AKALINT BILONG YU PASTAIM!

HARIAP! MI NOGAT PAIM LONG WET!!

UMN! MINISTA I NOGAT MONI STRET, YAH!

NIL BALANS

ER..SORI TRU MINISTA... YU NOGAT MONI..AKALINT BILONG YU I NIL BALANS STRET!

!?!?

!! OL HETKWATAS I TRANSFERIM OLGETA MONI I GO LONG BEKIM LOAN BILONG YU... SE!

OOH!!!



# Sipak MAIK

HEY, GUYS.. PLAN BAGARAP, YAH! MISIS KISIM MONI.. ANYWAY, MAI PEI-DE YOUR SAUT!

6-MUN OLGETA MISIS MAIK WOK LONGI KISIM PE BILONG MAIK LONGI BEKIM DINAU!!!

EM YAH, KISIM K20 IGO..OLGETA PE EM BILONG MI.. NA MASKI KOMPLEN

K20 TASOL!?! K20 INO INAP LONG BAIM BIA YAH.. K50 IKAM!

GO PINIS!

TARANGI MAIK INO CAT TOK MOA... EM I GO RAUN LONGI LAMANA HOTEL!!!

ATING MI TRAIM POKIES

TRAIM POKIS NA WIN BIG MONI

POKER MASIN I STAP INSAT

BAR →

EM I GO LUKLUK PASTAIM...

UMN! ISI, YAH!

RINGO

BLACK JACK

NAU EM TRAIM... EM PEIM LAS K20 NA PILAI!!!

OH SOR! LAS K20... EM PINIS, MI PINIS!

I LUK OLSEM MAIK WOK LONGI WIN I STAP!!!

CREDIT 7,000 PLAY 148 BET 25

HOI, BRO! YU LAIK KOLEKTIM OZ?

ATING MI WIN, OZ?



# Wali Hits bagarapim sindaun bilong ol manmeri

ELIZABETH LENY i raitim

**W**ALI Hits ben husat i bin pilai aninit long Tumbuna Supa ben bilong Madang i bagarapim sidaun bilong olgeta manmeri husat i bin stap long namba wan Benson & Hedges Konset long Mosbi long las wik Sarere.

Wankain samting tu i bin kamap taim ol i bin pilai long namba tu hap bilong konset long Goroka.

Dispela ol singsing olsem "Meri ya i Lewa" na "Frensip" i kirapim olgeta manmeri na pikinini husat i stap long danis bihainim dispela ol singsing. Long dispela de i luk olsem Wali Hits i bin katim stret lewa bilong olgeta manmeri.

Ol Japanis i kam long kisim piksa bilong wanpela bilong ol husat bin singsing wantaim Tarikana tu i no bin sindaun. Ol tu i rausim siot bilong ol na kilim long traipela san wantaim ol arapela manmeri husat i wok long kilim skin long danis.

Dispela Japanis singa husat i kam singsing wantaim ol lain Tarikana, nem bilong em Monta Yoshinori. Na tu i bin gat wanpela biknem musik atis bilong Ostrelia tu i bin kam pilai long dispela konset. Dispela

man em i wanpela top musikman insait long Ostrelia i ken pilai gita. Na tu em i ken singsing. Nem bilong em Diesel.

Dispela em i namba wan taim tru bilong Diesel long kam long Papua Niugini. Na em i bin tok em i amamas tru long kam na lukim na harim musik bilong dispela kantri.

Ol arapela atis tu i bin putim kamap gutpela so. Ol biknem ben olsem "Sagothons" wantaim singsing bilong ol "kol win i ron pukuk i kaikaim em" i pulim moa manmeri i kam insait long dispela konset.

David Andrew bilong Tarikana wantaim singsing bilong em "Fantasy" i mekim ol manmeri i salim tingting. Reks ben i stretim tingting bilong ol manmeri wantaim "Kantri bilong yumi". Na Sanguma wantaim ol kainkain musik bilong ol i soim gen ol pipel olsem musik em olgeta kain pairap yu harim na i no. gita tasol.

Rabbie Gamenu husait i no bin putim kamap so bilong em long Goroka i putim so bilong em long Mosbi. Liklik Betty Betty tu i stap na danis long singsing bilong mama bilong em.

Long dispela konset moa

long 6,000 manmeri i bin kamap long lukim ol namabwan atis bilong ol singim ol nambawan singsing ol i save laikim long en.

Namba bilong ol manmeri husat i kamap long dispela las hap bilong konset long Mosbi i daunbilo liklik long namba bilong ol manmeri husat i bin kamap long namba tu hap bilong konset long Goroka. Namba bilong ol manmeri long Goroka em moa long 7,000.

### MUSIC STORI

Tasol man husat i go pas long dispela konset, Maketing Menesa bilong Wills, Chris Williams i tok dispela namba wan Golden Tons Konset em i wanpela gutpela konset.

Long wanem i nogat trabel long ol tripela hap wantaim we dispela konset i bin kamap. Em i tok ol i bin lukluk long samting olsem 8,000 manmeri long kamap long dispela konset long Mosbi. Tasol i bin gat 6,500 tausen tasol i bin kamap. Em i givim bikpela tok tenkyu bilong em i go long ol Wali Hits ben husat i bin pilai aninit long long ol Tumbuna Supa ben bilong Madang.

Astingting bilong dispela musik konset em long apim na

kirapim musik industri bilong PNG. Mista Williams i tok em i amamas long wanem dispela astingting bilong ol i luk olsem i karim kaikai.

Bihainim dispela, man husat i go pas long taim bilong konset, Justin Kili i givim bikpela tok amamas bilong em i go long Benson & Hedges long putim kamap dispela konset we i bin kamapim planti gutpela samting. Em i tok dispela konset i bin givim gutpela sans tru bilong dispela ol PNG musik atis long lukim stret hamas manmeri i laikim singsing bilong ol.

Em i tok i nogat wanpela dispela kain konset long bipo. Na dispela em i namba wan taim tru na em i gutpela tru. Em i tok PNG musik i nogat maket bilong em yet. Tasol bihain long dispela konset i luk olsem klostu bai PNG musik bai kamap olsem wanpela samting bilong salim.

Mista Williams i tokaut olsem ol i lukluk long putim kamap wanpela wankain konset gen neks yia. Long dispela konset em i tok em i bai kisim tingting bilong olgeta atis na ol lain husait i save wok wantaim dispela ol atis long wanem hap ol i laik putim kamap so bilong ol.

# SINGSING BILONG MADANG KIRAPIM DAS

## BIRUA MAN

### MAN LONG GIVIM BIRUA LONG OL RASKAL

WANPELA HAP ISTAP KLOSTU LONG WE YUMI KEN SEF ISTAP. TAIM YUMI KAMMAP PINIS LONG DISPELA HAP YUM NOGAT BIRUA MOA ...



OLI RASKAL I KAM. MI TINGTING OLI BAI KISIM YUMI ...



OLOMAN!







□ Wanpela Fraide Kanage i go kirapim das wokabaut raun long Boroko na Tabari Ples insait long Mosbi siti. Bikpela san tu na Kanage wokabaut raun i go painim ples bilong hait long san na malolo. Em nau Kanage wokabaut i go beksait long Boroko pos opis. Em i go kamap na i go sindaun aninit long wanpela diwai. Em i sindaun i go na ai bilong em i lukim tupela yangpela (wanpela man na meri) i wok long holimpas na mekimsave long kain ol samting na stail bilong ol yangpela bilong tude. Tupela yangpela ya mekim olsem na ai bilong Kanage i no inap stret lusim tupela. Ai bilong Kanage i aigris stret. Bikos planti manmeri wok long lukim tupela yangpela ya tasol tupela i no sem. Tupela i mekimsave long laik olsem tupela i hait long bikbus na mekim. Kanage sindaun lukluk i go na bel kaskas olgeta. Na em i kirap singaut na tok olsem: Samting ya, Katolik sios i tambu long mekim long pablik ples bikos Adam na Eva i no hait na pilai pilai.

**Boroko Wanderer MOSBI**

■ Kanage em i man bilong ples. Em i no save raun long ol taun. Em i stap long ples i go na kandre bilong em i kisim em i go stap wantaim em long taun. Long taun, kandre bilong em i no save larim em i raun tumas. Bikos kandre i pret nogut Kanage bai paul. Wanwan taim tasol kandre i save larim Kanage i go raun. Stap i go na wanpela taim kandre i les liklik long wokabaut i go long stua na salim Kanage. Kandre givim mani long Kanage na tokim em long baim wanpela bret we i malmalum. Tasol kandre i no tok malmalum, kandre i tokim Kanage olsem: Kande, yu go long stua na baim wanpela soft bret. Kanage kisim mani na tekov i go long stua na baim wanpela bret na wanpela hap sop bilong wasim klos na mekimsave long wisil na wokabout i go bek long haus. Em i go kamap long haus na tokim kandre bilong em: Em ya kande, bret na sop yu tok long mi baim. Kandre lukim olsem na kirap mekimsave long lap. Na Kanage i askim kandre long em i lap long wanem samting. Na kandre i tokim Kanage olsem em i no tokim em long baim bret na sop. Em i tokim em long baim wanpela bret we i malmalum. Save pinis, manki long ples i no save long mining bilong haptok long Inglis ol i kolim soft. Kandre i tok soft na em i ting olsem sop.

**A Villager MADANG**

□ Kanage wantaim tupela poroman bilong em Kenex na Biabia i resis long mekim pani (tokpilai). Ol i pasim tok olsem husat bilong ol i mekim wanpela gutpela tokpilai stret bai kisim namba wan prais. Namba wan prais em 5-pela katen bia. Kanage daunim spet na tokim tupela poroman bilong em long mekim tokpilai bilong tupela pas. Tupela poroman bilong em pinis na Kanage i tokim tokpilai tupela long tokpilai bilong em long tokples masta (Inglis) olsem: Gentlemen, I have got a son whose name Mary. She is education my daughter John. He is educated. But not only that, the most important thins is my golden property which my wife keeps. This is a bonus to my wife. She is so special too because she is made of bush materials. Kenex na Biabia i kilim skin long lap stret na Kanage tekov wantaim 5-pela bokis kus marasin.

**Junior Karrage MADANG**



BIPO tru i gat wanpela tambaran i save stap long hap bilong Ngorongoro. Taim bilong draiwara, em i save go daun long rip na painim pis. Na long taim bilong em long kamaut long is na painim pis, em i save kisim ol sel bilong kokonas na pasim long susu bilong em na em i save pasim wanpela purpur tu. Na bai em i kamap olsem wanpela meri na go painim pis long solwara. Tasol em i no save painim pis tru. Nogat. Em i save go painim ol kukamba bilong solwara. Dispela ol samting i olsem pis bilong em. Olgeta taim, em i save mekim olsem

Na wanpela taim 12-pela meri long ples bilong mipela, Mambariwa, i go painim pis long nambis Ngorongoro. Na dispela tambaran ya i bilas olsem wanpela meri na

painim ol kukamba pinis na em i kam boinim ol long san i stap.

Ol meri bilong ples i go lukim em na ol i ting em i wanpela meri tru. Na dispela tambaran i giamanim ol na askim long paia. Na ol meri i givim paia long dispela tambaran.

Na tambaran ya i karim paia i go na wokim draipela paia tru. Na bikpela ren i stat long pundaun. Ol 12-pela meri i lukim olsem na ol i go hait long hul bilong wanpela draipela ston. Ren i pundaun i stap yet na banisim rot bilong ol long go bek nau long ples. Na ol i slip i stap long hul bilong ston.

Na long taim ol i slip i stap, dispela hul bilong ston i go pas na ol i nogat rot long kamaut. Hangre i kilim ol nogut tru na ol india i stap insait long dispela hul.

Longpela taim i go pinis na bodi bilong ol meri ya i sting pinis.

Nau dispela hul i op gen. Ol i kolim dispela hul bilong ston, Matawari Ngonza. Bihain ol sampela man bilong ples i go olsem na ol i paini ol bun bilong ol dispela 12-pela meri. Na ol i kisim bun i go bek long ples na planim long matmat.



Ol man long ples i save olsem ol tambaran i mas giamanim ol meri ya i go insait long hul bilong ston na ol i dai. Olsem na ol i pasim tok long kilim dispela tambaran.

Ol bikman bilong ples i pasim tok pinis na ol meri i go kisim kaikai long gaden i kam na ol i stat long kukim. Ol i redim pinis olgeta kaikai na ol man long ples i stat long patim kundu na singsing. Olget aman i bilas gut tru na hatim singsing i stap.

Man tambaran ya i lukim ol sus bilong ol meri ya na em i guria tru. Na ol i kirap na bilas gut tru. Man, ol i no pilia

long bilas. Kain kain paspas na purpur i og antap long skin bilong ol dispela meri.

Na tambaran ya i lukim ol dispela naispela bilas long skin bilong ol meri ya na em i mangalim ol tru.

Olgeta man na meri long ples i singsing i go inap biknait tru. Na bos bilong ples i winim mamabu na ol i kam kaikai na kisim win. Na dispela tambaran ya i go stret long bos bilong ples na i tok, "Pren, inap yu bilasim mi olse. Mi laikim tru bilas bilong yu."

Bos bilong ples i save pinis olsem dispela man tasol i mas wanpela

tambaran. Na bos ya i giamanim em i go long haus boi na tokim em long slip na bai em i bilasim em. Na bos bilong ples i kisim ol strongpela rop na pasim ol lek bilong em. Em i taitim tru rop long lek bilong tambaran pinis na em i tokim em long go aut na singsing.

Tasol tambaran ya i no inap long kirap. Na man ya i singautim olgeta manmeri bilong ples i kam lukim em pinis na ol i kukim haus na tambaran tu i paia wantaim haus.

**Jerry Nonny, Sio N o 2 Viles, Yumalos Tret Stua.**

# Ol tingting nogut long olupela prenmeri bilong man bilong mi bagarapim Kristen laip bilong mi



**Dia Laiplain,**

KRISTEN laip bilong mi bagarap bikos long ol pasin na tingting nogut bilong mi long olupela prenmeri bilong man bilong mi. Bikos em i save mekim ol giaman toktok long marit laip bilong mi wantaim man bilong mi. Sampela yia i go pinis, mi bin lusim ples bihain long mi kros wantaim mani bilong mi.

Nau mitupela i stap wantaim tasol mi tingting long bihain taim. Mi sem long tokim man bilong mi olsem mi save kros o i no save laikim dispela olupela prenmeri bilong em taim mi save tingting long em bungim em.

Arapela astingting na mi wari bikos Baibel i tok olsem em i rong long wanpela Kristen man/meri long i no laikim ol arapela manmeri o kros. Mi laikim olsem mi mas laikim dispela meri. Long aste mi smail long em tasol mi no save long wanem rot mi bai rausim ol tingting nogut bilong mi.

**JEALOUS**

**Dia Pren,**

Hevi bilong yu i wanpela kain hevi we, long planti rot, planti manmeri insait long wol i save bungim.

Yu no klia tumas long luv bilong man bilong yu i gat long yu. Olsem na yu jeles long olupela prenmeri bilong em. Planti

meri husat i save i gat kainkain tingting olsem i save rong. Bikos long jeles na pret pasin bilong ol, ol i no save laikim na luvim man bilong ol. Dispela i ken mekim man bilong ol long lusim ol.

I gat toktok i stap olsem jeles pasin i save stat taim mipela i skelim mipela yet wantaim ol arapela. Long skelim mipela yet wantaim Jisas Krai i gutpela tasol long skelim mipela yet wantaim ol arapela manmeri save kamapim ol pasin olsem spirituel praid. Long sait bilong wanpela Kristen, pasin bilong skelim em yet i mas lukluk long Jisas.

Arapela samting we i go wantaim hevi bilong yu, olsem wanpela Kristen, yu save olsem em i rong long i no laikim arapela man/meri. Yu go het yet long tingting long dispela arapela meri na yu pilim nogut bikos long ol tingting nogut yu gat long em. Long wanem rot yu inap senisim dispela pasin?

Namba wan samting, mipela i laikim olsem yu mas luksave long sampela samting long yu yet. Bikos yu givim laip bilong yu long Jisas Krai, Baibel i tok yu wanpela Kristen. Tasol yu gat yet dispela bodi we i wankain olsem ol arapela manmeri. Dispela i min olsem yu ken go het yet long mekim ol sin pasin wankain olsem ol arapela manmeri. Sin bilong yu i egens yu yet na egens God. Bai yu mekim wanem samting long en? Namba wan pas bilong John i tokim mipela long ansa insait long Sapta 1, Ves 8-10. Luksave na kisim olsem yu wanpela sin man/meri na konpes long sin bilong yu long God na em bai porgivim ol dispela sin. I luk olsem yu autim pinis dispela sin long God na em i porgivim yu pinis na i mekim yu klin-yu smail long dispela olupela prenmeri bilong man bilong yu. Tasol bikos long tingting nogut yu gat long em i bin stap longpela taim, dispela i mekim yu long go het long i gat ol tingting nogut long em na bai no inap pinis hariap. Ol dispela tingting i ken

pinis sapos yu go het long mekim ol gutpela samting-na tu soim ol gutpela pasin.

Baibel i tok: "I gat wanpela kros we i kam aninit long lo, rait na i nogat sin long en." Pasin bilong kros i ken produktiv taim dispela pasin i gat wari na sore long ol lain husat i kamapim dispela pasin. Inap yu senisim ol tingting nogut bilong yu i kamap olsem wanpela beten na askim Papa God long givim em gutpela tingting na em i ken lusim tingting long man bilong yu na painim arapela man?

Yu tok olsem yu sem long toktok long man bilong yu long dispela olupela prenmeri bilong em. Yu ting i moa gutpela long toktok wantaim em long dispela samting? Ating em i no save go lukim, na sapos yu toktok long dispela olupela prenmeri bilong em, dispela bai kamapim kros na ol arapela tingting, na bai no inap kamapim gutpela samting. Sapos i tru olsem man bilong yu i save lukim olupela prenmeri bilong em, yu ting em bai tokim yu. O yu ting em bai kros long yu?

Mipela i ting olsem gutpela rot long stretim dispela hevi bilong yu em long traim na lusim tingting long dispela meri. Yu ken lusim tingting long em sapos yu kamapim tingting long noken toktok long em o noken go long ol ples na eria we yu bai o i ken bungim em. I tru olsem dispela bai no inap stopim yu long tingting long em. Sapos tingting i kamap long em, yu ken rausim ol dispela tingting. Long ol taim yu tingting long em, yu mas kamapim ol arapela tingting-eksampel-Bai mi mekim wanem samting long amamasim man bilong mi tude? Inap mi kukim kaikai we em i save laikim tumas? Inap mitupela i ken go na mekim olsem wanpela famili we bai amamasim em? Inap mi mekim pikinini bilong mitupela i slip hariap na putim long bet na mi wantaim man bilong mi ken amamasim mitupela yet long bet?

**Laiplain**



## Ol meri Makam i save wok hat

**Dia Edita,**

Yes Edita, mi bin stap long Kimbe maket long wanpela Mande moning taim na mi painim buai i go na mi lukim foapela meri Makam ol i salim buai bilong ol. Dispela taim tu mi lukim olsem planti manmeri ol i wok long baim buai bilong ol meri ya.

Tasol mi harim long sait em i gat kros i kamap. Ol meri Talasia nau ol i kros na bikmaus na ol i tokim foapela meri Makam ya bai ol i mas rausim ol bek buai bilong ol i go ausait long maket.

Mi sanap mi harim na mi no wanbel tru long ol meri Talasia na tu ol foapela meri Makam ya i no bekim wanpela toktok. Mi sori nogut tru long tranqu ol meri Makam ya.

Tasol laki tru sampela meri Talasia husat i marit i go long ol man Morobe provins i kam na sapatim foapela meri ya na krosim bek ol meri wantok bilong ol.

Dispela i nogut tru long kain pablik ples long kros long samting we i nogat gutpela as long en. Tingting gut pastaim long yu toktok o mekim samting.

Ol meri Talasia sapos yupela i go pinis long Lae o nogat tasol mi laik tok klia long yupela liklik olsem, kisim sip nau na go long Lae. Orait kisim wanpela pmv na traim ron i go long haiwe na bai yu lukim stret long ai bilong yu na bai yu inap long kisim strongpela bilip olsem yes i tru olsem buai bilong Makam i no buai. Em olsem flaua bilong rot tasol.

Orait na bihain taim yu kisim sip na go bek long Talasia, em bai yu wok strong na planim buai olsem ol meri Makam i save planim. Taim buai bilong yu i redi, orait yu kisim long sip na go long Lae maket na salim. Yu bai lukim sapos ol meri Makam bai krosim yu o nogat.

Yu mas save olsem ol meri Makam i no save sindaun nating long as olsem yupela. Ol i meri bilong wok stret.

Em tasol na husat meri Talasia i laik bekim em laik tasol.

**Joe Boinai  
Kimbe**

## Not Waghi rot i no gutpela

**Dia Edita,**

Mi wanpela manki bilong Banz kauboi taun stret tasol nau yet mi stap long biktaun long Mosbi siti.

Olsem mi lukim sampela samting memba bilong mi i wokim na i no gutpela long ai bilong mi. Olsem na mi laik putim dispela long niuspepa inap ol Not Wagi manmeri na pikinini i ken lukim dispela.

- kisim dak glas ka na raun raun nating long siti
- Banz i go long Warakar o Fatima
- na ol liklik rot i stap insait long Not Wagi

Yu stap long Mosbi na palai i go long Kombulno o kisim ka long Kagamuga na go long Kudjip i go long Banz na bihain yu go long Kombulno tu o nogat?.

Yu save long ol rot i bagarap tu o no gat? Mi laik askim tu sapos yu save opim maus liklik long haus palamen na yu save tok pait long wari bilong ol Not Wagi pipel tu o nogat?.

Sapos yu no fit long bekim ol dispela askim bilong mi, mi ting olsem yu no fit long stap memba yet. Em tasol liklik wari bilong mi.

**Tasi Badui Gal  
Mosbi**

### **TOKSAVE:**

**Sapos yu laik long OL PAS bilong yu salim i kam long dispela Adres:**

**EDITA, WANTOK NIUSPEPA,  
P.O.BOX 1982, BOROKO, NCD.**

**Yu mas putim trupela nem bilong yu long dispela PAS bilong yu, sapos yu putim giaman nem mipela bai i no inap long putim long niuspepa**

# Gavman i no tingim bihain

**Dia Edita,**

Pas bilong mi i sut long ol bikman long nesanel gavman i lukim na givim sampela tingting long en.

Long lukluk na tingting bilong mi tude, mi ting olsem long gris bilong Wol Beng na ol arapela bikman i ausait lain moa olsem PNG i wok long developim hariap ol risosis bilong kantri na ol i no tingim bihain taim. Dispela em ol risos olsem bus, ol diwai,

wara, gol, kopa na wel. Mi lukim olsem gavman nau i no harim tumas tingting na laik bilong ol papagraun long go hetim binis long laik builong ol yet.

Mi laik askim westap mani ol i save kisim long ol bikpela maining prosek olsem Porgera, Ok Tedi, Kutubu na ol sampela arapela liklik prosek moa? Ol mani i kam long ol dispela prosek i ken helpim kantri na gavman long egen-sim laik na tingting bilong ol

strongpela mani lain long ausait. Sapos gavman i bin yusim gut dispela ol mani, kantri long tude ino inap long bungim dispela hevi wantaim mani.

Taim PNG gavman na pipel i kamap papa bilong ol bikpela prosek o ol kampani wantaim bikpela sea insait long kantri, yumi ol pipel yet bai i gat rait long toktok long pasin we wok ikononi bilong yumi i go long en. Na ino ol ausait lain i bosim yumi.

PNG bai i gat gutpela sosel stending na ol ausait kantri bai i laik long givim yumi helpim wantaim mani o salim ol save-man bilong ol long helpim yumi sapos kantri i gat wanpela gutpela lida huat i gat klia tingting na i gat pasin bilong kea na wari long yusim ol bus, solwara, graun na ol risosis bilong yumi wantaim gutpela plening.

**Bake Kezafong  
Mosbi**

## Ol Makam paulim ol hailans long buai

**Dia Edita,**

Mi laik komplem olsem pasin mi save lukim long ol manmeri save salim buai long ol liklik maket arere long Makam rot i no gutpela tumas. Bikos planti hailans save go baim buai long Lae tasol na taim Lae bai i sot, sampela i kam bek long Makam olsem long 40 Mail maket na Doti Wara maket.

Mi lukim olsem ol lain long hailans laik baim na taim o askim prais bilong buai em ol papa o mama bilong buai i save makim prais. Na taim ol hailans askim ol Makam long brukim wanpela

buai o sekim wanpela buai pas-taim long ol i baim bai ol Makam i tok nogat.

Ol Makam save pulapim ol strongpela na wara wara buai nogut long en. Na ol bin pulapim i kam antap na long maus bilong bek bai ol i giamanim long strong o mit buai tasol. Ol bai pasim maus bilong bek wantaim na giamanim mipela ol manmeri gut tru.

Taim mipela i baim buai pinis na i laik sekim, bai mipela i lukim olsem planti buai em wara wara nating. Ol lain i salim buai bai

kisim mani na tekov i go hait long lain buai na kokonas pinis.

Mipela karim ol dispela buai i go salim em no gat gutpela win moni tru. Mipela lusim mani nating tru.

Mi askim ol Makam long salim gut buai. Taim buai i redi gut orait kisim i kam long maket bai mipela i ken baim. Maski long giamanim mipela ol hailans lain wantaim ol wara wara buai nabaut. Em tasol komplem bilong mi na husat i laik bekim o egen-sim em laik tasol.

**Caspar Panga  
Hagen**

## Yumi mas tanim bel nau

**Dia Edita,**

Mi laik bekim pas bilong susa Yasi Naomi i bin kamap long Wantok long Septemba 2 1995.

Yes Naomi, mi laik save yu tanim bel pinis o nogat? Sapos yu no tanim bel orait yu mas painim god nau olsem baibel i tok long Aposel 17:27.

Tanim bel baptais na God bai rausim sin bilong yu na givim yu holi spirit.

Orait mi laik bekim toktok bilong yu. Long Jisas long buk bilong ol Aposel, em i no stap tasol em i kirap long spirit na go stap wantaim papa bilong em na em i salim holi spirit i kam long ol aposel. Long namba tu toktok bilong yu em kain ol samting olsem buai na simuk long buk bilong ol kolosis em God i tambuim na tu ol dokta tu i tambuim.

Long namba tri toktok sios i bihainim toktok bilong God tasol i gat ol giaman profet tu bai kam.

Yu mas lukim Baibel bilong yu gut pastaim long yu mekim ol kainkain toktok olsem.

Nau yet i gat o giaman pofet i stap pinis long ol sios.

Em tasol liklik toktok bilong bekim pas bilong yu.

**Jab pain  
Madang**

## Developim gut Wewak taun pastaim

**Dia Edita,**

Mi wok long lukim nau long Wewak taun planti ol meri olsem lapun na yangpela i wok long werim tausis olgeta taim na mi les long lukim ol stret. Olsem wanem yupela ol man o? Yupela sem tu o nogat?.

Yupela ol mama tu i laik soim tu olsem yupela i moa yet. Sapos yu wanpela man em meri bilong yu i save werim kat Red

Joe Gins, traim tokim ol meri bilong yupela long rausim na werim klos bilong ol meri stret.

Wewak tu i no develop olsem Hailens o Madang o Lae na yupela i save so op olsem. Sapos Wewak i gat sampela gutpela developmen olsem ol bikpela taun olsem Lae na Mosbi orait, yumi ken so op olsem na soim Sepik stail bilong yumi.

Traim na tokim memba bilong yupela long developim Wewak taun na stopim ol raskel pasin pastaim na bihain yupela werim trausis. Em tasol toktok bilong mi.

Husat i laik bekim o egensim em laik tasol.

**Chocko Badetove  
Wewak**

## Pik poket bikpela long Lae bas stop

**Dia Edita,**

Mi laik autim wanpela wari bilong mi long wanpela samting we mi lukim i kamap long bas stop long Lae long taim mi wetim bas long go wok.

Orait, bas stop ya i save pulap tru long ol man. Mi save ting olsem olgeta dispela ol man i wetim ba long go wok tasol nogat ya. Sampela i save kam long pulim ol bek bilong ol meri na wokim stil pasin.

Long ai bilong mi stret, mi bin luim wanpela man i pik poket long wanpela mama husat i karim Sepik basket. Mi lukim na mi bin tokim meri ya long lukluk gut na kalap long bas. Planti

pikpoket lain i save giaman long kalap long bas.

Dispela pain bilong raun nating long taun o bas top na pik poket i no gutpela pasin. Moabeta yu go bek long ples na wok gaden na ol arapela samting bilong pulim mani long en. Mani i stap long ples na graun bilong yu. Tasol sapos yu stap long taun na yu wokim dispela pasin, yu bai stap long trabel na tu go kalabus long en.

Em tasol komplem bilong mi na husat i laik bekim em laik tasol.

**Michael Howi  
Morobe provins**

## Ol man i bikheth long ol meri

**Dia Edita,**

Mi no wanbel long wanpela pasin we mi lukim long taim mi stap long Warangoi eria bilong Is Nu Briten provins na mi rait long autim tingting bilong mi.

Long nau, mi stap long Lae, Morobe provins. Tasol long taim mi stap long Warangoi mi lukim long ai bilong mi stret sampela yangpela man long hap i paulim ol marit meri na lusim ol bihain long ol i givim bel long ol. Tu ol i save paulim ol meri bilong narapela man na maritim ol.

Ol i save bungim tu ol meri long rot na askim long laik bilong ol na sapos ol

meri i tok nogat long ol, ol i save tok nogutim ol na ronim ol. Narapela samting tu em ol i save go askim papamama gen na sapos ol i no tok orait ol bai i suvum het yet na askim ol.

Dispela pasin mi lukim olsem i no stret long ai bilong mi. Em i samting bilong sem ya.

Husat manmeri long pablik i gat sampela toktok long dispela samting, rait i kam tasol long Wantok Niuspepa na mi bai amamas long lukim.

**Savep Kalako Lao  
Morobe provins.**



# Larim manmeri yet marit long laik

**Dia Edita,**

Mi wanpela manki bilong ples na mi laik autim wari bilong mi go long husat i save marit long laik bilong ol arapela manmeri.

Long mi yet, mi pilim i no gutpela. Mi save lukim planti hevi i save kamap ol kain kain hevi i save kamap long kantri bilong yumi.

Long wanem mi save lukim ol man i no gat laik long marit wantaim dispela meri. Tasol ol lain bilong dispela man yet i bin pusim em long marit wantaim dispela meri. Olsem na

long laik bilong man yet, em i les long maritim dispela meri. Olsem long dispela as, man i traim painim rot long lusim meri nau na yumi save lukim ol kain hevi i save kamap long kantri bilong yumi na tu yumi no sindaun gut.

Taim ol yangpela meri i prenim wanpela man, ol yet i gat laik na ol i tingting long pren o marit wantaim dispela man.

Tasol papamama bilong dispela meri ol i bin lukim wanpela man i gat planti mani na

pik na ol kain kain samting long haus o ples bilong em, olsem na ol i makim dispela man ya long pikinini meri bilong ol.

Tasol bipo taim meri ya i yangpela yet, em i no pren o toktok wantaim dispela man long maritim em. Ol lain famili bilong em yet i makim man long laik bilong ol.

Dispela i ken kamapim hevi long laip bilong meri ya na em bai tingting long lusim man ya bikos laik tru bilong em i no stap long dispela man. Ating

em i gat arapela boi pren bipo we em i laikim tru long maritim bihainim tasol laik na plen bilong em i bagarap long dispela kain fos marit.

Dispela pasin i save kamapim planti hevi na bagarap long sindaun bilong ol manmeri long tude.

Em tasol na husat i laik putim moa tingting antap em laik tasol.

**Philip Konspol  
Wabeg**

# Memba bilong Kabwum mekim gutpela disisen

**Dia Edita,**

Mi bin kisim *Wantok* niuspepa bilong 16 Mas, 1995 na mi lukim olsem i gat krangi tingting bilong Jayson Penau bilong Kabwum. Em i bin tok olsem memba bilong Kabwum, Ginson Saonu i save kalap kalap long pati.

Mi laik tokim yu Jayson Penau stret olsem, pati i no samting tru na pati i no wok. Man i stap memba insait long pati ol i wok. Olsem na sapos memba bilong Kabwum em yet i gat rait bilong skelim pati o wok bilong gavman na painim gutpela rot bilong bringim kamap ol hevi bilong Kabwum na bringim sevis i kam long Kabwum. Olsem na yu no ken bilip long pati. Yu bilip long rait bilong yu yet.

Wok ministri em memba i kisim pinis wok na yu painim wanem kain wok?. Sapos yu tok ministri orait yu tok "Wok". Wok em i gat pipel bilong Kabwum wantaim bikman antap i givim. Sapos yu stap long Lae o Kabwum, yu no laik go klostu na askim em na kisim save long wok na stretim tingting bilong yu gut. Nogut yu pulap long tingting bilong wanpela man na krangi tingting bilong tok beksait na komplem i bagarapim na daunim yu.

Memba bilong kabwum i gat rait long skelim na wok. Pati i no save wok: man i save wok. Olsem na yu no ken bilip long pait na kusai nabaut long niuspepa na bagarapim nem bilong memba. Memba yet i gat rait long skelim na bringim rait bilong Kabwum i go long palamen. Maski long yu hangamapim nating bel bilong yu. Moabeta yu sindaun isi na stretim tingting bilong yu na pasim maus bilong yu.

Em tasol na saos yu laik bekim pas bilong mi em laik tasol.

**Wongae Kwisal  
Madang**

# Pomio bus i stap yet long taim bipo

**Dia Edita,**

Mi gat bikpela wari tru long ol pipel bilong inlen Pomio insait long Is Nu Briten. Mipela i stap long pasin tumbuna yet bilong bipo taim long wanem i nogat wanpela developmen i kamap long eria bilong mipela.

Mipela i no save memba bilong mipela i stap long we? Ol i gat nem nating olsem nesanel memba bilong Pomio Open em Alois Koki na memba bilong inlen Pomio Camilus Tati i stap we?

Nau yet ol pipel i komplem long wanem ol i no lukim dispela tupela man liklik. Plis ol pipel i votim yupela long kamapim developmen long eria bilong yupela na i no bilong raun nating nating.

Olsem na mi laik tokim yupela ol pipel olsem taim bilong ileksen i kam klostu nau na mi laik tokim yupela ol pipel olsem i no ken tru harim gris bilong tupela man ya.

Ai bilong yupela tu i noken pas na givim vot long tupela man ya. Harim sapos yupela givim vot long wanpela gutpela man em bai developmen i kamap long inlen Pomio.

Yumi mas makim gutpela man nau long bringim gutpela senis long yumi.

**Mangi Pomio  
Kokopo**

# Yunifom bilong Woda i kik yet

**Dia Edita,**

Mi sapatim pas bilong brata Woda Boi we i bin kamap long *Wantok* Niuspepa i no long taim i go pinis.

Mi save lukim olsem yunifom bilong ol woda i gat moa kik long en. Bikos em i sain moa yet na i luk gut na long taim ol woda i putim na go wok long en. Mi lukim tu olsem yunifom bilong ol woda i kamap moa yet winim dispela bilong ol plis na ami.

Mi sapatim tok bilong Woda Boi husat i tok yunifom bilong ol woda i save mekim wari planti yangpela meri tu ya. Bikos taim ol boi woda i werim yunifom bilong ol na raun, planti manmeri i save lukluk strong tu long ol.

**Eks Woda  
Nain Mail  
Mosbi.**

# Plis i no sasim ol stilman long Kiunga

**Dia Edita,**

Mi wanpela kastoma bilong Progressive Traders stua long Kiunga na mi laik autim wari bilong mi long ol plisman long Kiunga.

Long Tunde 4 Epril, 1995, sampela liklik lain asples i go long stua ya na kisim nating ol samting olsem ol redio, bilas, bek, prisa, kakaruk na moni wantaim. Dispela samting i kamap klostu tasol long plis stesin.

Wanem samting i lukim i krangi long ol plisman em ol i stap klostu long stua ya tasol ol i no mekim wanpela samting.

Bihain long dispela, mi lukim ol manmeri i kisim ol samting ya na i go ausait long stua. Planti meri i kisim ol samting na go ausait long ai bilong plis tasol ol plisman i no mekim wanpela samting. Ol i go long setelmen bilong ol na mekim save long amamas i stap.

Mi ting ol plisman i mas stopim kain pasin olsem long kamap tasol mi luksave tru tru olsem ol diuti plisman i sapatim kain bikhet pasin long go het yet. I no gat wanpela plisman bilong mekim gut wok i stap long Kiunga long bipo yet i kam inap nau.

Dispela i no namba wan taim dispela pasin i kamap. Planti stil pasin i save kamap long Kiunga long planti arapela stua tu. Tasol no gat wanpela taim bai plisman i holim na sasim ol.

Dispela i mekim na ol pablik i no gat rispek long ol plisman nau bikos ol yet i lukim long ai bilong ol olsem plisman i no mekim tru wok bilong ol long stapim ol kain stil pasin olsem.

Wok bilong lo na oda i no kamap gut long Kiunga.

Em tasol komplem bilong mi na husat i laik bekim em laik tasol.

**Sine Kitu  
Kiunga**

# Gavman i no ken senisim ol lo nabaut

**Dia Edita,**

Yes mi wanpela grasrut manki na i laik mekim liklik hap tok tasol long dispela gutpela kantri bilong yumi na olgeta gutpela manmeri bilong Papua Niugini.

Bilong wanem na gavman i laik senisim lo? Ating gavman bilong narapela kantri i kam insait long Papua Niuginiu olsem na em i laik senisim lo bilong em?

Plis yupela ol lida bilong mipela, ol pipel i makim yupela long go long palamen kisim toktok na kam bek toksave long ol. Maski long yupela ol lida lusim tingting long mipela. Yu gavman i laik senisim nupela lo na maski long ol pipel. Planti bilong yupela i longlong pinis.

Taim Papua Niugini i kisim independens ol gutpela lida i kamapim lo bilong yumi na dispela lo i winim 20 yia pinis. Dispela ol saveman na ol yangpela skul long bikpela skul bilong yumi long Yunivesiti na ol i go bek long ples na sanap resis long ileksen na ol i win, ol tu i mas tingting long ol pipel. Maski harim gris bilong ol arapela lida na senisim lo nabaut.

Ating dispela kantri bilong yumi i stap long han bilong Wol Beng na IMF olsem na ol lida i kamapim kain kain lo bilong amamasim Wol Beng.

Yu lida i mas tingim ol pipel bilong dispela kantri na maski long senisim lo nabaut.

Long Independens de bilong PNG, gavman i wokim lo bilong dispela kantri i bihainim na dispela lo bilong yumi em God yet i givim long ol lida bilong yumi na ol yet i kamapim.

Wanem lo bilong Papua Niugini i stap pastaim i mas i stap na maski long senisim lo na bagarapim pipel bilong PNG.

Olgeta pipel bilong PNG i mas sapatim Masket langalio long noken senisim lo bilong dispela kantri. Mista langalio i mekim dispela toktok bikos wok bilong CRC i laik kamapim birua long mama lo bilong dispela kantri.

Sapos gavman i salim wokman i go raun long ol asples na askim ol pipel long sampela tingting, em ol i go grisim yupela olsem na yupela i mas sanap strong.

Mi lukim long *Wantok* nius olsem CRC i laik kamapim birua long mama lo bilong dispela kantri olsem na mi rait long autim tingting bilong mi. Mi lukim dispela pasin bilong senisim lo nabaut i no stret long tingting bilong mi. Em tasol wari bilong mi.

**Wes Dat  
Mosbi**

# Stretim pe bilong ol olupela tisa

**Dia Edita,**

Mi laik tok olsem Dipatmen bilong Edukesen i no lukluk long ol tisa bilong em long dispela kantri.

Planti tisa ol i stat wok long kantri bilong Papua Niugini long 1950 tasol Edukesen dipatmen i no lukluk na helpim ol long wokim gutpela haus o givim ol ritrensmen. Mipela karim bikpela hevi tru.

Mipela i wok wantaim Australia opisa inap long 15 na 16 krismas inap long 1975 taim bilong independens. Mipela i go insait tru long bik bus long kirapim ol skul i go het. Tasol pe bilong mipela em i liklik tumas.

Planti ol man nau ol i kisim gutpela wok olsem politisen, tisa, dokta na arapela moa. Ol i kamap long hat wok bilong mipela ol tisa. Mipela i statim namba wan Inglis long Papua Niugini.

Sapos Edukesen dipatmen i no stretim ol dispela hevi

bilong ol tisa bai God i ken helpim mipela.

Plis, Edukesen dipatmen i ken lukluk bek long ol yia i go pinis na helpim ol tisa long 1950 i kam antap long 1970s.

Tude mipela ol dispela tisa i painim hat tru long salim ol pikinini bilong mipela i go long skul o baim ol samting bilong ol na mipela yet. Ol arapela lain olsem plis fos, ami, dokta na arapela moa i wok long kisim gutpela helpim na mipela ol tisa i no gat yet. Ol i save gat pensen na arapela pinis pe bilong ol.

Mi askim ministri bilong Edukesen long lukluk gut long dispela samting na helpim olgeta tisa bilong dispela kantri.

Em tasol wari bilong mi na husat i laik putim moa tingting antap em laik tasol.

**Ex Tisa  
PNG.**

# Noken sikrap long marit hariap

**Dia Edita,**

Mi laik autim wanpela komplem bilong mi i go long *Wantok* Niuspepa bai ol man i ken lukim na givim tingting bilong ol long en.

Orait, wari bilong mi i go olsem. Long Buka nau, mi lukim olsem planti man i save lusim ol famili tru bilong ol na kisim narapela meri gen. Na dispela em ino wanpela gutpela pasin.

Mi laik tokim yupela ol dispela man husat i wokim kain pasin olsem yupela i givim bikpela hevi long ol meri na ol pikinini bilong yupela yet. Dispela pasin i no kamap tasol long Buka. Em i kamap long planti hap bilong kantri tu ya.

I moa beta long dispela ol lain man long noken marit hariap bikos yupela i save lukim ol


nupela pes na lusim ol famili bilong yupela. Mi no sutim tok long ol man tasol. Sampela ol meri tu i save olsem ol man i marit tasol ol i save go het yet na prenim man. Na dispela i save kamapim hevi long famili bilong man.

Plis tingim ol i nogut olsem AIDS na ol arapela sik STD we i wok long kamap bikpela long kantri na stap isi liklik. Ating sampela long yupela i save go nating long lotu tasol yupela i go hetim yet pasin paul na bagarapim marit bilong ol manmeri.

Plis stap isi na maritim wanpela man o meri tasol.

**Veronica Tirang  
Buka  
NSP.**





# WANTOK PABLIK NOTIS

Sapo yu laik advertais, telepon 325 2500 na askim long

Miri Aiori Ext. 214  
Jeffrey Maliou Ext. 215  
Joe Naime Ext. 218

## BUK BILONG OL SEVISIS

### CHRISTIAN BOOK CENTRE

#### LAE & MADANG

Educational/Christian books  
English/Pidgin/Tok Ples

Gifts & school stationery Nanulon St,  
Madang Phh: 82 2043 Fax: 82 3376

4th St Lae  
Ph: 42 4156 Fax: 42 7073

### HAIR & BEAUTY

#### *His N' Hers*

HAIR SALON

All Hair Care

Black Hair

& Beauty Products

42 1843


P.O. Box 1721, Lae. Central Arcade.



### NESENEL BRODKASTING KOMISEN

## TOKSORI


Long makim maus bilong bilong ol Bod memba  
na wokman meri bilong Nesanel Brodkasting  
Komisen, mi salim bikpela toksori i go long  
misis Doroley Thompson na ol pikinini long indai  
bilong man na papa bilong ol, late Martin Thompson,  
LLB, Memba.



*May His Soul Rest In Peace*

*Renagi R. Lohia*

**RENAGI R. LOHIA, CBE  
SIAMAN**



## Tok sori



Minista bilong Fores na Memba bilong Markham, Honorebel Andrew Baing na  
famili i salim bikpela toksori bilong ol i go long:

### **MISIS JENNIFER THOMPSON NA PIKININI MERI CHIMOLEN**

long indai bilong gutpela man na papa bilong tupela



**LEIT MARTIN THOMPSON, LLB, MP RIJONOL MEMBA NA GAVANA  
BILONG MANUS PROVINS.**

Ol pipel bilong Manus i lusim wanpela yangpela lida husat i mekim na kamapim  
planti samting long developmen bilong provins bilong em na Papua Niugini aninit  
long wok politik bilong em.

**Em i kenkisim malolo wantaim gutpela amamas**



## TOKSORI TOKTOK



Menesing Dairekta bilong Nesenel Fores Sevis, Guoa Zurenuoc, i makim Bod, Menesmen na ol wokmanmeri, na givim bikpela toksori na belwari bilong ol i go long:

### MISIS JENNIFER THOMPSON NA PIKININI MERI CHIMOLEN

long indai bilong gutpela man na papa bilong tupela

### LEIT MARTIN THOMPSON, LLB, MP RIJONOL MEMBA NA GAVANA BILONG MANUS PPROVINS.

Em i mekim na kamapim planti samting long ol pipel bilong Manus na tu Papua Niugini aninit long wok politik bilong em.


Toksori go tu long ol arapela famili memba na lain wanpisin bilong em.

Em i ken kisim malolo wantaim gutpela amamas.



## POST AND TELECOMMUNICATION CORPORATION

## CONDOLENCE MESSAGE



Siaman bilong PTC Bod, Darektas na Menejmen bilong Post na Telekomunikesen Koperesen i laik salim bikpela tok sore bilong ol i go long femeli na wantok bilong em long em i bin lusim ol.


Mipela i sore wantaim ol lain bilong Manus long lusim wanpela biknem lida bilong ol. Mipela bai tingim yet Mista Thompson hia long PTC long taim em i bin stap wantaim mipela olsem Minista bilong Komunikesen.

Ol wokman meri bilong Post na Telekomunikesen Koperesen i laik salim tok sore bilong ol i go long femeli na wantok bilong Martin Thompson, LLB husait i lusim ol pinis.

"Mi bilong kirap na bilong laip. Husait i bilip long mi i ken dai, tasol bai i stap laip oltaim." Proverbs 1:21

**Authorised by  
the PTC Chairman  
Mr. Stephen Eka**





Minista bilong Polis

# TOK SORI




Mi laik salim bikpela sore bilong mi i go Misis Thompson pikinini bilong em na ol pipol bilong em long Manus long indai bilong man bilong Hon. Martin Thompson, MP, Rijinol Memba na Gavan bilong Manus Provins.

Martin Thompson i wanpela trupela lida bilong Manus na bilong Kantri. I no ol pipol bilong Manus tasol i lusim em. Tasol ol pipol bilong Papua Niugini tu i lusim wanpela gutpela lida.

*Sol bilong yu i ken rest long pis.*

**Hon. Castan M. Maibawa, MP**  
Minista bilong Polis



## CONDOLENCE MESSAGE

By the Governor of East New Britain



Long makim ol femeli na ol pipol bilong Is Niu Briten, mi laik salim sori bilong mi i go long meri Jennifer na pikinini meri Chimolen, ol wantok na ol pren bilong Hon. Martin Thompson, LLB husait i bin dai.

Mi bin save long Hon. Martin Thompson husait i bin wanpela gutpela pren na brata bilong mi. Em i wanpela man i gat planti strong, gutpela pasin, man bilong wokim gut wok bilong em na em i man husait i save daunim em yet.


Long dispela sotpela taim Mista Thompson i bin stap Minista bilong Infomesen an Komunikesen i bin stretim planti ol Rurel Telepon Sistem insait long Papua Niugini na long Pomio Distrik tu. Ol Pomio pipol long Is Niu Briten i bin benefit long ol gutpela politikol disison bilong em.

Ol pipol bilong Manus i lusim wanpela gutpela lida bilong ol husait i save gat bilip long stretim Viles Sevises.

Pren bilong mi, brata na wanwok, yu ken rest aninit long gutpela greis na gutpela lukaut bilong bikpela papa bilong mipela inap mi lukim yu gen.

**Hon. Francis Koimanrea, MP**  
Gavana bilong Is Niu Briten





## MANUS PROVINSAL GAVMAN

# Tok sori



Deputi Gavana, Honorobel Stephen P. Pokawin, ol memba bilong Manus Interim Provinsal Asembli, provinsal administreta, Simeon Malai na ol wokman meri bilong Manus provinsal edministresen, ol gavman bodi, na ol arapela han bilong nesanel dipatmen, ol famili bilong mipela na ol pipel bilong Manus; i salim bikpela toksore bilong mipela i go long meri na ol wan famili long indai bilong gavana, Late Honorobel Martin Poposui Thompson LLB MP long Fonde Februeri 29, 1996 long Lorengau.

Long taim Manus provinsal gavman i bin kamap long 1979 i kam inap nau, nogat wanpela provinsal lida i bin dai taim em i holim yet opis. Olsem na Late Martin Thompson LLB MP em i namba wan lida bilong mipela long provins long indai taim em i holim yet opis, bihain tasol long me i holim opis olsem Gavana bilong Manus long Ogas 1995, taim Palamen i oraitim nupela ogenik lo long Provinsal Gavman na Lokol Level Gavman.

Late Martin Thompson i nogat sans long soim stret save long wok bilong em olsem gavana inap em i dai, long wanem em i gat sik.

Wanpela bikpela developmen em i kamapim em telekomyunikesen projek long Maunten Dramsel. Bikos long dispela developmen na ol pipel bilong mipela long ol ples kanaka i amamas nau long ring long kainkain hap bilong dispela graun o wol. Dispela projek bai stap yet long soim helpim em i bringim long developmen bilong Manus.

Mipela salim bikpela toksore long yu antaim planti pre.

*May he rest in eternal peace.*

### TOKSORE YA I KAMAP WANTAIM TOKORAIT BILONG

**STEPHEN P POKAWIN**  
DEPUTI GAVANA

**SIMEON M MALAI**  
PROVINSAL ADMINISTRETA



## PAPUA NEW GUINEA COUNCIL OF CHURCHES

The member Churches of the PNG Council of Churches welcome the visit of the General Secretary of the World Council of Churches,

### REV. DR. KONRAD RAISER

on the 10th - 14th March 1996, to PNG. Dr. Raiser will be mainly visiting the cities of Port Moresby and Lae. While in PNG he is scheduled to give a number of public seminars as prescribed in the programme below.

#### SUNDAY, 10TH MARCH

- 2:20 p.m. Arrival at Jackson's Airport,  
Welcome by the Governor of NCD Rt. Hon. Bill Skate and the heads of Churches.  
4:30 p.m. Combined ecumenical service at Marimari Lutheran Church, Gordons.

#### MONDAY, 11TH MARCH

- 9:00 a.m. Combined Church leaders meeting at United Church Assembly Hall, Port Moresby.  
1:30 p.m. Meeting with the Prime Minister of PNG the Rt. Hon. Sir Julius Chan.  
5:30 p.m. Public lecture on the role of the Churches in the peacemaking process at St Mary's Catholic Cathedral, Port Moresby.

#### TUESDAY, 12TH MARCH

- 6:00 a.m. Departure for Lae, overnight.

#### WEDNESDAY, 13TH MARCH

- 9:30 a.m. Public lecture on the ecumenical movement at Holy Family Anglican Church, Hohola.  
2:00 p.m. Meeting with Word Publishing Company.  
3:30 p.m. Meeting with the NGO's at MEF Centre, Hohola.


#### THURSDAY, 14TH MARCH:

- 12 - 1 p.m. Open forum at UPNG main lecture theatre on the role of WCC.  
Public and interested people are all welcome to attend any of the main seminars.

**Rev. Leva Kila Pat**  
General Secretary

**Major Tau Pala**  
Chairman





# TOK SORI



Ekting Dairekta Reveren. Oria Gemo na ol wokman bilong Infomesen na Komyunikesen Opis, ol woka bilong olupela Dipatmen bilong Infomesen na Komyunikesen na ol memba bilong Nesenel Infomesen na Komyunikesen Polisi Komiti i autim bikpela sori bilong mipela i go long meri Dorlie na famili lain bilong leit

## **HON. MARTIN P. THOMPSON, LLB, MP GAVANA NA MEMBA BILONG MANUS**

Leit Hon, Martin Thompson LLB. MP em man husat i gat driman long kamapim samting, pulap long strong na antap moa, man bilong daunim em yet na was gut long ol samting. Mi bin save long ol dispela pasin bilong em taim mi bin wok wantaim em long dispela sotpela taim we em i bin Minista bilong Komyunikesen.

Em i bin putim bikpela wok long kamapim Dipatmen bilong Infomesen na Komyunikesen Sevis olsem namba wan wok em i Minista long en. Dai bilong em i no kamapim hevi tasol long wok politiks bilong PNG, straksa bilong League For National Advancement (LNA) pati na oposisen sait tasol bikpela samting tru em ol pipel bilong Manus i lusim dispela strongpela toktok na maus bilong ol long pawa dua bilong Waigani.

Leit Martin Thompson em wanpela strongpela lida husat i save skelim gut samting na mekim na em i gat interes long ol pipel long

bel bilong em. Em i no slek long o go daun long ol ausait toktok o hevi i go antap long em taim em i bin stap olsem Minista na tu olsem Ekting Atoni Jenerel. Na em i no surik long karim aut ol dispela pawa em i kisim taim em i pilim olsem sekyuriti, gutpela sindaun na gutpela pasin bilong pipel i stap long hevi.

Maski ol samting i bikpela tru, i no gat wanpela disisen em i mekim i krangi long sait bilong em. Long taim nau we independens long fridom bilong pres i stap nau long ol pablik i toktok pait long en, bai i gutpela long dispela buk bilong National Information and Communication Polisi i mas dai tu.

Olsem man husat i papa bilong dispela NICP, yumi ken sanapim tingting tasol olsem ol gavman i go long Waigani bai holim yet paia long lait long strongim wok em Leit Hon Martin P. Thompson LLB, MP i bin statim. Dispela NICP i no pinis yet na em i no ken stop long hia. Dispela spirit na driman bilong Leit Hon. Martin P. Thompson i mas stap long dispela NICP.

God i Blesim Martin na sol bilong em i ken painim gutpela malolo.

**REV. ORIA GEMO**  
**Acting Director**





# Toktok sori

## I KAM LONG GAVANA NA RIJINOL MEMBA BILONG WSTEN HAILENS PROVINS, PAIAS WINGTI CMG MP

Mipela i kalap nogut long indai bilong Hon. Martin Thompson.

Mr Wingti i tok em i gat bikpela rispek na i save laikim na amamas long gutpela ol wok bilong Mista Thompson we bai em i tingim oltaim long yia i kam.

"Long makim ol femeli bilong mi na olgeta pipol bilong Westen Hailens, mi laik salim bikpela tok sore bilong mi i go long meri, pikinini na ol wantok bilong Memba."

"Ol pipol bilong Manus i lusim wanpela gutpela lida we bai i hat long painim. Papua Niugini tu i lusim wanpela yangpela, strongpela na husait i save go pas long kirapim kantri."

"Ol gutpela samting em i bin wokim long gutpela

wok bungwantaim bilong em wantaim ol arapela memba na ol man nating bai i hat long lus tingting.

"Long mi yet, taim mi stap wantaim memba, em i save givim strong olsem yu gat wanpela memba we yu ken i gat tras long em. Pasin na wok bilong em i gutpela na wanpela i no nap askim sapos em i wokim wok bilong em o nogat."

"Mipela olgeta bai misim em."

"Mi laik tokaut long ol pipol bilong Manus olsem mi tu mi sori wantaim ol long memba i lusim mipela. Em i gutpela olsem ol pipol bilong Manus i sanap wantaim na go het wantaim long wok Mista Thompson i bin statim."

"Long kamap wanpela

lida i no wanpela isi samting. I mas i gat gutpela na strongpela tingting bilong wok. Na mi bin lukim memba i bin gat dispela ol pasin . Em i save soim tu long nesenol level."

" Mista Thomson i bin stap insait long kabinet taim mi bin atap Praim Mlnista na mi ken tok olsem em i bin wokim wok bilong em gut tru."

Mista Wingti i tok "Dispela kain ol lida i hat long painim na mi laik tokim ol pipol bilong Manus olsem mi tu mi sore wantaim yupela long Mista Thompson husait i lusim mipela. Mi bin wanpela gutpela poroman bilong em."


**PAIAS WINGTI**  
**Governor & Regional**  
**Memba bilong WHP**





*Leader of the Opposition*

## Condolence Message



Lida bilong Oposisen, Roy Yaki, LLB MP i laik salim tok sori bilong em wantaim ol memba bilong oposisen na ol wok manmeri bilong ol i go long meri bilong em Jennifer na pikinini meri bilong Chimolen long indai bilong Papa bilong ol na Gavana bilong Manus, Martin Thompson.

Martin i bin kamap wanpela gutpela lida bihain edukesen em na i bin kisim bikpela posisen em i bin holim long pablik sevis na insait long polotiks olsem wanpela gutpela lida bilong ol pipol bilong em. Olsem Minista bilong Stet em i soim olsem em i wanpela man husait i gat save na gutpela tingting we dispela kantri i nidim tru long dispela taim bilong kainkain ol developmen.

Dispela kantri i lusim wanpela gen

bilong ol gutpela lida husait i gat save na tingting bilong ronim kantri.

Ol tingting na wok em i bin wokim long divelopim dispela kantri aninit long dispela posisen em i holim i bin helpim planti ol pipol bilong Papua Niugini i luksave long wanem gutpela samting i ken kamap aninit long gutpela lidasip. Mipela bai misim em.

Gutpela pasin bilong em long taim em i bain stap laip bai istap yet long tingting bilong planti manmeri.

Long brata, pren an wanwok, mipela i laik tok gutbai. Martin pis i go long yu na lod bilong yumi Jisas i ken stap wantaim yu oltaim.

**Hon. Roy Yaki, LLB MP**  
**Lida bilong Oposisen.**



Tim poto bilong Pot Mosbi sofbal resis bilong ol meri



• Antap: Mazda Carps A gret tim husat i bin lus long Wantok 13-8 . . . Raithan: Malangan A gret tim husat i winim Yokomo. Ol poto: Leila Gilchrist



• Yokomo A gret tim husat i bin lus long plet fainel egensim Malangan 9-5 long las wiken



• Chebu A risev tim husat i bin lus long semi fainel long divisen bilong ol



# Toksave bilong ol man meri istap long East New Britain

**Papua New Guinea Banking Corporation bai kam bek long Rabaul long niupela opis long Blanche Street.**

Rabaul opis bai bringim bek gen ol transaction banking sevis na Lending Manager bilong Kokopo, Mr Bert Szwaluk bai go pas long Lending sevis insait long Kokopo na Rabaul long East New Britain Province.

Toksave long taim bilong opim opis bai kam kolostu.





## Lae makim Nesenel sempionsip skwat

### LAE SOFBAL RIPOT

ALWIN GORDON i raitim

LAE selektas long sofbal i selektim sem squad bilong men's tim long las yia, sem ol pilaia bai ol i go resis long Kavieng, long Nesenel sempionsip.

seketeri Enoch Darios em i tok, bai i gat narapela 10-pela resevs tu bi ol i travel wantaim long Kavieng long Ista wiken, mipela makim 10-pela risevs bikos nogut bai sampela samting kamap long hap long ol dispela 17-pela pilaia, nogut bai ol i kisim bagarap.

Long wol sempionsip trening squad members long Lae sait em Saiani Turlom, bilong (Brown Eagles) Victor Bunbun, Julious Uvia, na Mark Sahin (Aviat) na Lindsey Pulu (Malangan). Foma Intanesianel na PNG hero long 1991 Saut Pasifik gems long Pot Mosbi James Tovue em tu bai representim Lae sait long softball.

Lae sait ol i selektim long 4-pela top na strongpela tim o klap long kompetisen, Eagles, Aviat, YMCA na Malangan na PNGBC, NGI, Gazelle, na Bismarck ol i makim wanpela pilaia tasol.

Darios em i tu dispela sait long las yia ol i pilai strong tru tasol ol i lus long semi final na dispela sem sait bai ol i go traime gen.

Dispela ol 17-pela pilaia ol i nemim ol pinis em, James Pinia, Tagaga Ngaungau, Siani Turlom, Thomson Tavua, (Eagles) Tovue, Paul Willie, Robert Danley (YMCA), Bunbun, Robin Kunai, Uvia, Shain, (Aviat) Pulu Judas Enos (Malangan) Samson Taken (PNGBC) Joel Wagira (NGI) Meldy Guere (Gaxelle) na Aguila Otto (Bisamark).

Na ol resevs em David Maira, (Eagles) Darby Laino (Aviat) Penias Eliakim (YMCA) Theopile Kehono, Betual Waking, (Malangan), Moris Ilamia, Justice Gav, (Bismark) Dickson Woiwoi (Taubar) Michael Paikara (Hawks).

## Ramu makim skwat bilong ol tu

### RAMU SOFBAL RIPOT

ALWYN GORDON i raitim

RAMU Sugar ol i nemim pinis softball squad bilong ol long go pilai long Kavieng long Nesenel sempionsip bai kamap long mun April.

Ofisa bilong Ramu Sugar Sofbal Assosiesen Orim Ramit em i tok tim em i redi pinis na ol i trening hat stret i stap redi tasol long go pilai.

Long men's squad ol i selektim 6-pela pilaia olsem long tim valley Hawks, Brown Eagles, Cats, 89ers ol i makim 3-pela pilaia, NGI 2-pela, na Westpac 1-pela.

Kosa em Ramit, na tim em James Robinson, Bailana Simon, Donald Lavur,

Andrew Sam, Joe Daera na Wani Pentu, Steven Kavanamur, Willie Levo, David Sumane bilong tim (89ers) Rondald Kenas, Terence Maso, Gabriel Aiden, Gabriel Luana, Solomon Kelly, na Rangrang Daou (Brown Eageles) Michael Isaac, Robinson Isacc, David Tonga, Tas Pomahuru, Eddie Miroi wantaim Ofae Hahari (Cats)

Allan (Hawks) Mary Silau, Lesley Surubian na Alida Samune (89ers), Hellen Kasare, Tena Sano, Velda Tom, Cassandra Sepoe, Regina Philip, na Susan Golawong (Brown Eagles) Melisa Bunawia, Nunua Alois, wantaim Rachel Steven (Karanas) Pilake Kenas, Gorethy Maso, Justina Kisoiai wantaim Dyna petts (NGI) Fiona Salangia, Joyce Baloiloi na Maryanne Nelson (Westpac).

Long squad bilong ol meri tu ol i selektim tu 6-pela long Brown Eagles, Valley Hawks, na Westpac na NGI ol i selektim 4-pela pilaia tasol, na ol i makim tu 3-pela pilaia long Karanas na 89ers.

Kosa bilong ol em Walter Benson, na squad bilong meri em Lucy Patrom, Lydia Akoi, Serah Elizah na Marilyn Daera bilong tim

Mensa em Allan Kisoiai bai menesim tupela tim wantaim.

## Madang bai lusim tripela intanesenel soka pilaia

RODNEY KAMUS i raitim

MADANG bai no nap lukim tripela intanesenel pilaia bilong ol i stap long eksen insait long tupela intanesenel tonamen long dispela yia bihain long ol i kisim saspensen i kam long ol bikpela lain bilong Spots.

Ol dispela tripela biknem pilaia ya em swipa bilong PNG Alfred Gabong, straika Trimo Topio na narapela beklain pilaia Ondo Bart.

Ol tripela yia wantaim ol narapela 5-pela moa pilaia bilong PNG soka tim husat i go pilai long Saut Pasifik Gems long Tahiti long las yia i bin mekim sampela kain rong pasin long hap we ol i kisim dispela saspensen.

Dispela ol 8-pela pilaia ya em ol opisals bilong Saut Pasifik Geims i bin painim ol i bin dring na mekim nambaut long geims viles long Tahiti olsem na tupela bikpela tonamen bilong dispela yia em long Melanesian Kap na Wol Kap pri kualifaia em ol bai i no nap long pilai.

Ol narapela 5-pela pilaia ya em Daniel Mota, Emmanuel tatau, John Panu, Jack Jonathan na Hans Gewabing.

Presiden bilong Papua Niugini Futbol Asosiesen Peter Mommers i tokaut olsem ol 8-pela ya bai i no nap long stap insait long dispela tupela bikpela tonamen em bai kamap long dispela yia.

Mommers i tok moa olsem

ol pilaia ya em ol bai toktok long bihain taim bilong ol long pilai soka long wanpela spesel miting bilong Papua Niugini Futbol Asosiesen (PNGFA) long Madang long Ista wiken.

"Long tokaut stret, dispela ol 8-pela pilaia bai i no nap long stap long tim tasol mipela i mas painim ol lain bilong senisim ol," Mommers i tok.

Mommers i tok moa olsem tim bai i stap wankain yet na tu ol bai lukluk gut sapos ol pilaia ya i holim gut fom bilong ol yet i stap wantaim ol.

Em i tok olsem PNGFA bai yusim nesenel sempionsip long Lae olsem selekseni graun bilong nesenel tim. Ol

bai salim aut ol selekta tu i go long ol arapela hap long painim ol pilaia husat i gat strong long pilai.

Long ol narapela stori, nesenel soka bodi i no makim yet wanpela man long kamap nesenel kosa bihain long Nesenel Kosa Kisakiu Posman i risain.

Mommers i tok olsem ol i wetim yet Nesenel Kosing dairekta Edrsi Kubruwah husat i stap yet long malolo long kam na mekim sampela kain pepa wok bilong nupela kosa long makim nupela kosa.

Nau yet Kubruwah i stap long malolo logn Ghana na i luk olsem em bai kam bek long Mas 18.

## Ol Hohola gat nem...

□ Pepsi op-sisen lig sempion Hohola Flies em is strongpela tim bilong dispela resis. Las yia ol winim taitel na nau ol wok long pilai strong yet long kipim dispela taitel. Ol i sindaun kisim pototo las wiken bihain ol i bin pilai wantaim Erom Tigers klab.

Poto: Joe Ivaharia.



## Vanimo lig strong long holim bek Albert Emil

FELIX RAMRAM i raitim

SANDAUN Ragbi Futbol Lig i no amamas tru long ol toktok i wok long kamaut olsem mama bodi bilong ragbi lig Papua Niugini Ragbi Futbol Lig (PNGRFL) i wok long traime kisim Kumul pilaia bilong Sandaun Albert Emil na putim em long wanpela provins we em i ken pilai strong moa yet.

Presiden bilong Vanimo lig Daniel Maskim i tokaut olsem sapos nesenel

bodi i laik transferim Albert Emil i go aut long provins, em wantaim ol lain bilog em bai mekim olgeta samting long holim bek dispela pilaia long asosiesen bilong ol.

"Em i taim nau long putim presa long opis bilong mama bodi we ol i mas lusim sia bilong ol na go autsait long ol provins long makim ol pilaia long wanem i gat planti ol gutpela sta pilaia i stap long ol provins.

Seketeri bilong Vanimo Lig Paul Samof tu i tokaut olsem ino longtaim bai PNGRFL i tingting long pulim em aut na

putim em long wanpela senta we ol i ken was gut long em.

"Sapos mipela i holim pas Emil, ol selekta bai i gat sans long kamap long Vanimo. Dispela rot em bai wanpela we bilong developim kod insait long provins taim ol selekta bai luksave long ol pilaia bilong mipela.

Albert Emil husat i gat 22 krismas em bilong Nu Ailen na em i wanpela pilaia husat i stap insait long Kumul tim we ol i go pilai long wol 9 resis long Fiji long las mun.

## Ragbi Yunien em kaikai bilong ol Morobe

MOROBE i winim kap fainel bilong Nesenel Ragbi Sevans resis long Ramu long las wiken we ol i winim gut tru tupela tim bilong Mosbi long mekim fainel em samting bilong ol Morobe tasol.

Ol lain nogut bilong Morobe Yelo i winim Morobe Grin long kap fainel long 24-22.

Ol lain Mosbi Boromas husat i bin winim dispela kap long las yia i no pilaia gut tumas we ol i winim hagen long 15-14 na bihain liklik autim tikek bilong Daru.

Morobe Grin i go pas long pul B taim ol i winim Kerema na Kavieng na Morobe Yelo i winim ol Babarians na bihain ol i winimol Popondetta long fofit long wanem ol i no bin kamap long dispela pilai.

Morobe Grin i kamaut wantaim olgeta kainkain stail bilong ol tru long tasol ol brata bilong ol Morobe Yelo i strong tru long winim dispela taitel we planti sapota na manmeri i tokaut nau olsem ragbi yunien sevans resis em samting bilong ol Morobe.

Dispela fainel i no bin gat kik tumas long wanem tupela tim bilogn Morbe yet i bin pait long pilaim dispela kap.

Morobe Yelo i bin winim Mosbi na tu Morobe Grin i winim ol Boromas bilong Mosbi tu.

Ol Morbe grin i bin pilai hat tru na long namba wan hap pilai ol i bin go pas logn skoa wantaim 12-0 na i luk olsem sapos ol i strong yet, ol i ken winim dispela pilai isi tasol. Bihain tasol long dispela ol putim moa trai long go pas olgeta long 19-5 tasol ol lain bilong Aiem Pilokos i pait bek gen strong tru.

Dispela olupela Pukpuk pilaia i putim han long tupela trai wantaim na i skorim tupela moa trai long helpim sait bilong em long winim dispela pilai long 24-22. Long ol narapela fainels pilai, long Bowls fainel, Goroko i sutim daun long daru long winim dispela prais na long Pleit Fainel, em olupela Pukpuk tu David Tiki i go pas long wanpela Ramu sait long winim ol lain nogut bilong Kavieng.

Ramu tu i soim strong bilong ol long Tiki na narapela pilaia bilong Mosbi Paul Joseph husat i bin skorim wining trai long taim pilai pinis insait long dispela Pleit fainel.



# RAGBI LIG

NIUS

## Hawks stat pilai gen wantaim bikpela win

### MOSBI LIG RIPOT

RODNEY KAMUS i raiti

HAWKS ragbi lig tim bilong Mosbi lig i kam bek gen insait long lig wantaim wanpela bikpela win tru egensim strongpela tim Mosbi West wantaim 32-6 long las wiken taim Mosbi i statim resis bilong em.

Ol lain ya Hawks long las yia, Mosbi lig i bin rausim ol long pilai long wanem ol i nogat sponsa na inap pilaia long pilaia long olgeta wiken. Tasol long dispela yia, ol i redi gut tru na kam bek gen.

Lok fowat bilong ol Hawks Lohia Ben Moide i putim 12-pela pions antap long bod long namba wan hap bilong pilai na ol i go pas long 14-0 long haptaim.

Na yangpela brata bilong Lohia, Daroa i lusim pilai graun wantaim K100 olgeta bihain long em i kisim namba wan awot olsem man-of the match.

Wanpela trai bilong West tasol i bin kam bihain tru klostu long pilai i pinis we olpela Kumul senta Joshua Kouoru i bin putim.

Narapela olpela Kumul Tuksy Karu na pilaia husat bai karim ol PNG i go long Kwinslen resis Tuksy Karu i kikim dispela trai i go insait.

Long dispela gutpela win bilong ol Hawks, kosa bilong ol Doura Rei i tok olsem i gat planti moa samting em ol i sapos long mekim i stap yet sapos ol i laik kamap olsem wanpela strongpela tim tru insait long dispela resis bilong siti.

Long ol narapela pri sisen pilai, Hawks i winim Defence 26-18 long na dispela i soim olsem pilai bilong ol long Sande i moa gutpela. Narapela fowat bilong ol Hawks Poki Kohu i bin pilai hat tru wantaim Moide. Seken rowa Tati Hore tu i bin pilai hat tru.

Long ol narapela pilai Paga i winim Kone Tigers 40-8 na Defence i dro wantaim tarangau. Long Sarere, Magani i winim Brothers 32-25 na Post Puma i kilim Souths 44-24 taim Royals i stap long bai.

## Vanimo lig sta Emil statim lig resis

LIKLIK taun bilong Vanimo i bin mekim Wol 9's ragbi lig sta bilong ol Albert Emil olsem wanpela bikman bilong ol long las wiken taim em i kikim op ragbi lig resis bilong Vanimo.

Taim Emil i go insait long pilai graun, em i werim namba 15 jesi bilong em long Kumul tim long wol 9s resis na olgeta lig sapota i paitim han na hamamas tru long lukim sta bilong ol i go insait long pilai graun.

Bipo long Emil i statim dispela pilai, em i givim bikpela tok tenkyu tru i go long olgeta pilaia bilong ol 6-pela klab husat i bin helpim em tru long karim em i go insait long Kumul tim.

Em i mekim bikpela singaut tu i go long olgeta pilaia bilong Vanimo lig long pilaia hat tru olsem em na ol tu bai i ken kisim kain namba olsem em i mekim pinis.

Emil em bin wanpela pilaia tasol bilong Vanimo Lig em ol selekta bilong Papua Niugini Ragbi Futbol Lig i bin makim i go insait long Supa Lig Wol 9's tim bilong Kumul husat i bin go pilai long Fiji long las mun. PNG Kumuls long dispela pilai i bin go olgeta long grenfainel we ol i lus long ol Nu Silan long kap grenfainel 26-10.

Albert em i liklik brata bilong olpela Kumul faiv-eit Aquila Emil husat nau i no save pilai tumas.



• IBS kera ragbi lig tim bilong Sogeri Valley resis husat bai bungim T.K long gred fainel dispela wik Sande. Foto Rodney Kamus.

## Tripela Kumul pilaia lusim kantri aste

TRIPLELA pilaia bilong Papua Niugini Kumuls i lusim kantri pinis long asdei Trinde long go pilaia long Inglen lig wantaim ol klab em Kingston Rovers na Hull.

Ol tripela pilaia ya em Marcus Bai, Stanley Gene na John Okul husat em ol memba bilong Wol Kap resis long Inglen long las yia.

Gene wantaim Okul i kisim gutpela kontrak wantaim Kinston Rovers klab tasol long helpim ol long kisim wok tasol i pasim ol i

stap nau. Bai husat i namba tri Kumul i kisim wanpela wan yia kontrak i kisim wok pemit bilong em pinis na bai joinim tupela long go long Inglen.

Nesenel kosing dairekta Ivan Ravu i tokaut olsem em i gat bikpela bilip olsem ol tripela yia bai pilai gut tru na mekim rot i op long ol narapela ol Kumul pilaia long go ovasis long kain ol hap olsem Inglen. Sisen bilong Inglis Ragbi Futbol Lig bai kirap long neks mun. Long

narapela stori, PNG Supa Lig kepten Elias Paiyo i sainim tupela yia kontrak wantaim nupela klab bilong supa lig Adelaide Rams long pilai wantaim ol.

Tasol ol wanem samting i stap antap long kontrak bilong Paiyo i no klia gut yet tasol bai i luk olsem bai i kam bek long Papua Niugini long wanem Supa Lig i no nap long stat nau bihain long kot i odarim ol.

Ravu i tok tu olsem em i toktok wantaim Paiyo long

las wik Fraide na Kumul huka ya i tokim em olsem Paiyo bai traim stap wantaim nupela klab bilong em tasol na lukim wanem samting bai kamap.

Ol Rams wantaim ol Hunter Mariners em tupela nupela klab Supa Lig i bin kirapim na ol i nogat loyelti agrimen wantaim Australian Ragbi Lig (ARL).

Supa lig husat i traim hat tru las wik i no nap long kirapim dispela resis bilong ol em kot i stopim.

## Minj lig presiden singaut long pilaia registresen

PRESIDEN bilong Minj Ragbi Futbol Lig, Jonah Aman i tokaut olsem long dispela wiken em bai laspela raun bilong ol pilai bilong pri sisen. Na wanpela samting em presiden i makim olsem dispela wik Sande em bai laspela dei olgeta klab bai i mas peim registresen bilong ol ful olgeta.

Na strongpela singaut bilong em tru em husat pilaia husat i no baim registresen fi bilong em long ful bai i no nap pilai long dispela sisen.

Em i mekim strongpela toktok tu olsem long sampela yia i go pinis, planti pila-

### ROBERT BOMA i raitmi

ia i save ranawe na pilai nating nogat registresen fi. Tasol dispela bai i no nap kamap gen long dispela yia long wanem ol bai lukluk gut

pilaia bilong ol bipo long detlain.

Amban i tok olsem em i wok bilong ol presiden bilong olklub longlukim olsem olgeta pilaia i mas rejista bipo long pinis bilong

### MINJ RAGBI LIG RIPOT

tru long wanwan pilaia bipo long ol i go insait long pilai graun. Amban tu i toktok long ol presiden bilong wanwan klab husat bai resis long dispela sisen long rejistaim ol

dispela wik. Ol pilai bai kamap sapos olgeta pilaia i rejista gut nau long nau yet i luk olsem Tigers klab tasol i rejistaim olgeta pilaia bilong ol pinis na ol narapela klab

olsem United, Raiders, Hawks, East, West na Brothers i no rejistaim planti ol pilaia bilong ol yet.

Long ol narapela stori, ol pri sisen salens bilong las wiken i bin ron gut tru we planti bikpela salens i kamap. Dispela ol bikpela salens em ol tim i laik redim ol yet tru long salens bilong sisen propa.

Long ol pilai i bin kamap, United na Highway Raiders, ol Raiders i strong moa yet na winim ol 1994 primia tim United long 20-6.



## 7's tas presiden panim sponsa-Lae

TONY LUKE i raitim

SPOTS em i wanpela kain rot bilong holim bek ol yangpela man husat nogat wok long noken kamapim trabel o hevi namel long komyuniti.

Long nau yet Presiden bioong Sevan Strit Rabgi Tas Assosiasen Mista Eddie Mel i mekim singaut i go long ol bisnis haus long Lae siti long kam insait na givim sapot bilong ol long Assosiasen bilong em. Tas kompetisen bai stat long pinis bilong mun Mas na bai ron i go pinis long mun Novemba long dispela yai. 15-pela Sinia na 18-pela Juria tim bai stap insait long dispela tas resis. Insait long ol dispela tim, planti ol yangpela man husat nogat wok na i save stap long ol ples olsem Saina taun, Kasowari rot, Angau komband na 1/2 strit i go inap long 12 strit i fomim ol kamapim.

Long pas yia Mista Mel i tok mi bin raitim sampela leta na salim i go long ol bisnis haus long ksim smapela helpim tasol i nogat wanpela gutpela bekim o toksave i kam long ol. Mista Mel i tok dispela i mekim na mi no amamas tumas. Em i sukurim tok olsem nau yet Nesenel Gavman i wok long spendim bikpela moni long pait agensim raskol pasin, olsem na yumi olgeta sitisen bilong Papua Niugini noken lukluk tasol na larim Gavman tasol i hatwok. Mista Mel i tok yumi husat stap long wan wan hap area mas panim smapela we long daunim raskol pasin. Mi yet i lukim olsem spots i gutpela rot bilong banisim ol yangpela long go aut na mekim trabel Mista Mel i tok.

Mun Febuari long dispela yia wanpel apes man husat i bin luksave long wari bilong sevan strit ragbi tas assoisen na i bai kam insait lon givim sampela helpim. Nem bilong dispela man em Jastis Timothy Hanscliff husat i wanpela Nesenel Kot Jas long Lae. Mista Mel i amamas long bekim bilong Jas, ya na i tromoi tok olsem mi laik lukim ol narapel bisninin haus long Lae long givim sapot tu.

## Mangi Lelefiru gat bikpela sans long lig

JOE IVAHARIA i raitim

PLANTI ol yangpela pilaia bilong ol kankain spots insait long kantri i wok long tingting long kamap ol bikpela spotsman long bihain taim. Long hamas taim bilong ol em ol i save putim i go insait long dispela spots, ol femeli bilong ol i save olsem dispela yangpela bai mekim i go antap yet.

Yangpela George Kaue i gat dispela kain strong bilong pilai i go antap na mekim biknem bilong em yet. Olsem wanpela yutiliti pilaia, George husat i gat 20 krismas na bilong Lelefiru insait long Galp provins i save pilai wantaim Hohola Flies Ragbi Lig tim long Pepsi Op Sisen resis. Em i ken pilai long wing, senta o fulbek. George i statim ragbi lig pilai bilong em long 1990 tai em i gat 15 krismas tasol wantaim lokel strit klab bilong em Club Paradise husat i save pilai long olpela Hohola Op Sisen resis.

Dispela Hohola Op sisen resis em ol tim bilong ol hap long Hohla i save pila na tu dispela hap em ol lainlong Mosbi Ragbi Lig i save kisim ol pilaia long hap.

Dispela resis em ol lain Taranga, West na Kone Tigers i save kisim ol pilaia bilong ol long hap. Dispela taim em sans bilong George husat em ol Tarangau i bin kisim em long pilai long anda 17 tim bilong ol. Long 1993, em i surik i go long pila wantaim ol Seagulls long anda 19 tasol long 1995 em i surik i go long pilai wantaim ol Post Puma na ol i promotim em i go long pilai long anda 21 divisen.

Dispela em i wanpela Long dispela yia 1996, George i gat bikpela tingting long surik i go antap long risev gret divisen wantaim ol Post Puma na tu long helpim Hohola Flies long kamap gen long gren-

# Wantoks bai bungim Malangan long grenfainel

TAIM bilong bikpela grenfainel bilong ol meri long Mosbi sofbal resis bai kamap long dispela wiken taim tupela biknem tim Wantoks bai bungim Gazelle long grenfainel bilong ol meri long Sarere.

Long las wiken, Wantok i soim strongpela salens tru taim ol i autim primia tim bilong

## MOSBI SOFBAL RIPOT

las yia Mazda taim olgeta manmeri na sapot i singaut strong tru olsem Wantoks i mas win.

Ol Wantoks em kepten bilong em Kolis Diap i go pas long ol i pilai gut tru long ol inings bilong ol.

Tupela tim wantaim i soim strongpela pilai tru long sait bilong sanap long fil na tu long sait bilong bat we Wantok i winim ol Mazda long 13-8.

Strongpela pilaia bilong ol Wantok na pitsa Pauline Wakit i mekim planti ol strongpela bal tru i go long ol Mazda we planti bilong



• Tammy Kekedo wantaim brata Micheal i mekim babakiu long Bisini sofbal graun long Mosbi bilong mekim mani bilong Mosbi squad. *Poto Liela Gilchrist.*

ol i paitim ol bal i go antap na outsait long pilaia graun na i mekim isi long ol-Wantok long autim ol.

Ol Wantok i bin winim tos na askim long bet pastaim na dispela i bin helpim ol Wantok stret long winim dispela pilai.


Taim ol i statim pilai tasol, ol Wantok i go pas long skorim ol hom ran. Ol i skorim tupela ron long namba wan ining i kam long kepten Daip na Mal Ewald.

Long namba tu ining bilong pilai, ol i skoa

gen long Diap, Nancy Tokia, Evald, Bernadett Uruna, Dorothy Natera na Theresa Siaguru.

Dispela ol 8-pela tupela ron bilong ol long namba wan na namba 2 inings i planti tumas long ol Mazda

long holim pasim ol. Olsem na Wantoks i winim dispela pilaia isi tasol na bai bungim ol Malagan long grenfainel bilong dispela wiken. Long ol nara-pela pilaia long A gret, Malangan 9 i winim Yokomo 5.



• George Kaue.

fainel bilong Pepsi Op sisen lig.

George husat i save laikim Kakaruk wantaim Sips na Kol dring i save laikim ol Not Sidni Bears

na pilaia bilong em Jason Taylor. Long PNG yet, em i save laikim Philip Boge.

Em i save laikim tu singsing bilong Bon Jovi

na i save driman long bungim Tom Cruise na meri bilong em Nicole Kidman. Driman kar bilong George em Mazda RX7.

## Banz lig resis on dispela wiken

James Sakul i raitim

BANZ Lig bai go het long statim 1996 sison long dispela wik Sarare na Sande long Banz lig pilai graun. Long tride bilong wik i go pinis ol lig eksekutiv wantaim klab delegets i bung long Hotel Banz na paitim dispela toktok na makim ol nupela lain long ronim wok bilong Banz lig long dispela yia.

Ol lain husait ol makim em John Kumie olsem Presiden, John Kulkulo em vais presiden James Yeka Sekretari man bilong wokim pepa wok na Zachery Yesim Tresera man bilong lukautim moni Kaman Banznga bai i go pas long kodine-tim Junia lig long Banz.




Igat 6-pela klabs i sambai pinis long brukim bun long lig resis bilong dispela yia. Magani, KK Bulldogs Brothers na United em ol tim yet bilong Banz Distirk bilong Not Wagi Jiwaka Tigers na Raiders i kamap long Kudjip eria bilong Saut Wagi.

Inap Lig reis i stat las wik pinis tasol sampela liklik hevi i stap long wanwan klab long registresen na medikel sek ap bilong ol pilaias olsem na ol i surukim i kam inap dispela wik.

Nupela lig presiden mista John Kumie i tok tenkyu na amamas i go long ol klab opisols huait i gat bilip long em long kisim dispela wok. John i tok long wok bilong ronim lig em we isi olsem na ol klab opsols i mas wok bung wantaim em na ol arapela lig eksekutivi long mekim owk bilong em isis na lig bilong ron gut. John i tok ol i mas lus tingting long wanem samting i kamap long lukaut bilong ol arapela lain paslain long em. Em i laikim tu olsem olgeta lain husait i gat laik long Banz lig bai ron gut mas wok bung wantaim em long long kamapim gen gutpela nem bilong Banz lig.



# WANTOK SPOT



## Oi Kera bai strong yet long holim Sogeri Veli lig taitel

BIKNEM ragbi lig tim bilong Sogeri Veli Ragbi Lig resis IBS Keras bai soim strong bilong ol gen long dispela yia taim ol i bungim ol TK United long grenfainel bilong ol long dispela wik Sande.

Taim dispela resis i bin stat tasol, ol Kera i bin wanpela strongpela tim tru na save soim pes long olgeta fainels i kam inap nau long long dispela yia, ol bai traim hat tru long holim bek dispela sil em ol i winim long 1993/1994 sisen.

Aninit long lukaut bilong ol nupela Kumul Zackery Kipsy, Steven Kale na Sine Sine, ol lain nogut Kera bilong 14c Mile bai pilaim wanpela strongpela pilai tru egensim ol Kerema bilong TK United taim tupela tim ya i bung long dispela wiken. Oi Kera husat i bin kisim nupela sponsa bilong ol i kam long IBS wanpela skul bilong ol bisnis man bai traim long mekim nupela sponsa bilong ol i amamas long Sande long traim na winim dispela pilai. Stori bilong ol Kera i go olsem ol i bin winim dispela taitel 4-pela taim olgeta na 5-pela taim ol i kamap long grenfainel na lus long pilai. Long las yia, i no bin gat dispela resis olsem na ol Kera em ol sempion tim yet husat i holim dispela taitel na bai traim long strongim yet i stap wantaim ol. Na wanpela gutpela sans em bilong givim long ol IBS Kera em long wanem ol i pilai long as graun bilong ol yet na bai kisim planti gutpela sapot tru we i ken helpim ol long winim dispela pilai bilong ol long Sande.

Tasol long narapela sait tu, ol TK United em ol strongpela tim tru long dispela resis na i winim planti tim na kam longpela rot tru long go insait long dispela grenfainel. Ol TK United husat i bin winim ol planti narapela strongpela tim long kamap long dispela grenfainel bai i no nap givim dispela pilai isi tasol i go long ol Kera. Ol tu bai putim kamap wanpela strongpela pilai tru long rausim dispela taitel long ol Kera bilong 14 Mile.

Long taim bilong dispela pilai tu, Minista bilong Provinsel Afeas David Unagi yet bai kikim op dispela bikpela pilai bilong Sogeri Veli lig. Bipo long dispela bikpela pilai bai i gat ol keten raisa pilai na tu ol fainels bilong risev gret na C gret tu bai kamap. Presiden Peter Inepe i mekim bikpela singaut tru long ol sapota long no ken mekim trabel na bagarapim gutpela apinun bilong ol pilai.

### GREN FAINEL DRO:

Master of ceremony: Nelson Nebare  
Curtain Raiser (Reserve Grade)

10:30 Bomana Warriors vs TK United  
Winner gets K00.

11:30 A Grade: Hugo Canning 7's vs Pukpuk Yades 7's but clubs didn't make it up to the finals so they are playing 7's for both clubs.  
Winner gets K100.

1pm: Reserve Grade: Hella Bros vs IBS Keras. Will be kicked off by EMTV marketing manager.  
2:30pm: The president, welcoming Honourable Minister David Unagi.

3pm: A grade: IBS Keras vs TK United. The game will be kicked off by Mr Unagi.

4:30pm: Fulltime.  
4:45pm: Presentation.

# Tripela Kumul i go long Inglen



□ Stanley Gene, John Okul na Marcus Bai.

## Bai, Gene na Okul kisim wan yia kontrak

TRIPLELA Kumuls beklain pilai long poto ya Stanley Gene, John Okul na Markus bai i lusim kantri pinis long asdei Trinde long go pilai long Inglen wantaim ol klab long hap. Ol tripela pilai wantaim i kisim wanpela yia kontrak long go pilai long Inglen.

Gene, Okul na bai em ol tripela Kumul pilai husat em ol klab long Inglen i bin pasim toktok wantaim ol long las yia taim ol tripela ya i bin pilai long wol kap resis long Papua Niugini tim.

Long Tunde, sponsa bilong ragbi lig insait long kantri Winfield i bin holim

### RODNEY KAMUS i raitim

liklik sindaun long tok gutbai long ol tripela pilai ya.

Ol tripela i bin tok tenkyu long Winfield na PNGFRL logn mekim dispela kontrak bilong ol i kamap tru.

Marcus Bai bilong Mosbi bai pilai wantaim Hull Ragbi Lig Klab long Inglen na Stanley Gene wantaim John Okul bai pilai wantaim Hull Kingston Rovers ragbi lig klab long Hull yet.

Man husat i makim ol tripela pilai

ya Okul i tokaut olsem ol tripela ya bai traim pilai hat tru long dispela resis na soim olsem PNG i gat planti pilai em ol narapela kantri i kisim.

Long wankain taim tu, Okul i tok olsem em i gat bikpela bilip tru olsem ol bai pilai gut tru na ol klab bilong ol i ken surikim kontrak bilong ol i go antap moa yet.

Na tu ol tripela i gat strongpela bilip olsem ol selekta bai makim ol gen long stap insait long Kumul tim long pilaim ol tes pilai egensim ol Briten na Nu Silan long namel bilong dispela yia.

QUALITY SERVICE AT AN AFFORDABLE PRICE.


Single rooms at K58 and twin/double rooms at K72



## Granville Motel

\* 135 rooms & self contained units \* Licensed dining and bar services  
\* Swimming pool/Tennis court \* 24 hour security \* Pokie machines

Ph: 325 7155 Fax: 325 7672





# BENKING NA FAINENS

## Ol benk i autim wari long praim minista

BENKING na fainens industri i no longtaim i go pinis, i bin autim ol samtng hevi bilong lo na oda i ken kamapim long industri, i go long Praim Minista Sir Julius Chan.

Siaman bilong asosiesen bilong ol komesel benk insait long kantri na menesing dairekta bilong Benk ov Saut Pasifik, Noel Smith, i tokaut

olsem ol benking sevis, bikpela tru long ol rurel pipel, i go bagarap bikos long hevi bilong lo na oda.

Benking na fainens industri autim tingting bilong ol na bringim wari bilong ol i go long luksave na han bilong polis. Astingting em long kamapim sampela kain samtng long ol polisman i mas was long ol komesel benk.

### ABBY YADI i raitim

Bikos planti benk i bungim birua pinis long han na wok bilong ol raskol na stilman.

"Long nau yet, taim Papua Niugini wok long develop, ol benking sevis tu i mas develop na go aut long givim gutpela sevis i go long ol pipel. Tasol dispela samtng i no kamap. Ol benking

sevis i wok long go bagarap bikos long pasin nogut bilong sampela liklik lain pipel tasol," Mista Smith i tok.

Mista Smith i tok industri sapatim tingting na plen bilong gavman long pait egensim hevi bilong lo na oda. Tasol ol samtng na wok bilong dispela

plen na tingting i mas ron gut long daunim dispela hevi.

Long sait bilong operesen bilong ol komesel benk, Mista Smith i tokaut olsem bikpela interes reit i wok long kamapim hevi long planti liklik bisnis. Em i tok ol liklik bisnis i wok long traim hat tru long karim aut wok aninit long taim nogut we ekonomi

bilong kantri no gutpela tumas.

Em i tok gavman i wok long yusim bikpela interes reit bilong Benk bilong Papua Niugini (BPNG) kamapim wanpela gutpela na stretpela senis reit.

Em i tok taim gavman i daunim strong bilong Kina long 1994, olgeta benk i kisim salens dispela samtng

i kamapim. Na ol i kamapim ol gutpela rot long sait bilong menesmen, bikpela tru insait long ol eria long foren senis, likuititi na interes reit.

Long sait bilong BSP, Mista Smith i tok, dispela samtng i kamapim gutpela ekspirians. Na benk i yusim ol spesel save na rot long karim aut wok aninit long hevi.

## Ilektronik benking netwok bilong PNGBC

PAPUA Niugini Benking Koporesen (PNGBC) i tok olsem em i bin namba wan benk long tokaut long tingting bilong en long go insait long yusim ilektronik benking wantaim Autometik Teling Masin (ATM) na Ilektronik Transfe long Poin ov Sel (EFTPOS) teminal long mun Novemba long 1994.

Wanpela projek tim i statim dispela samtng na pinisim ol wok aninit long 6-pela mun na lonsim namba wan ATM long mun Mei long las yia (1995) na bihainim i lonsim EFTPOS long mun Julai long las yia.

Wanpela debit kat, we i kisim intanesenel luksave na stended, ol i "Save Card" we i save go wantaim wanpela transekse (Sevings) o wanpela pesenel sek akaun, i bin kamap long yusim ATM's na EFTPOS teminal.

Pastaim long em i statim dispela nupela kain sistem, PNGBC bai go het yet long stap olsem namba wan bikpela ilektronik benking netwok na i gat planti katholda kastoma. PNGBC i holim 50 pesen bilong maket na dispela i kamap ples klia bihain long 6-pela mun long stap long operesen.

Netwok bilong mipela i go het moa yet long 1995 taim mipela i kamapim wanpela intansenis agrimen wantaim ANZ Benking Grup (PNG) Limited we i kamapim moa bisnis wok na ol katholda. Dispela agrimen i givim PNGBC tokorait long

VISA na Mastkat long gutpela bilong ol klain na kastom bilong em.

Long nau yet, PNGBC i gat 200 EFTPOS teminal i stap long operesen long Nesenel Kapital Distrik (NCD), Lae na Maun Hagen. Na i putim oda pinis long arapela 500 moa na bai kam kamap long kantri long arapela mun. Olgeta sevis brens bilong PNGBC insait long kantri i gat EFTPOS teminal i stap long givim gutpela kastoma sevis na kastoma edukesen. Dispela sistem long nau yet i wok long prosesim moa long 20,000 long wanpela mun na namba i wok long surik i go antap yet taim moa senta i go insait long yusim dispela sistem. PNGBC i wok long lukluk nau long putim ol EFTPOS teminal long ol sab brens bilong en na sapos samtng i wok gut ol bai mekim wankain samtng long ol benk ajensi bilong en insait long kantri. Dispela em long traim na kamapim gutpela benking sevis insait long ol rurel eria insait long kantri.

PNGBC long nau yet i gat 5-pela ATM i operet nau insait long NCD na gutpela Ilektronik Benking Lobis. Tripela moa i kam pinis na go stap long NCD na Lae. Wanpela arapela oda, samtng olsem 6-pela, bai kam insait long tripela mun samtng na bai go aut long ol Ilektronik Benking Lobi long Maun Hagen, Goroka, Madang, Kimbe, Kokopo (Rabaul) na

Tabubil na wanpela arapela moa long Lae. ATM insait long NCD long nau yet i wok long prosesim samtng olsem 10,000 transekse long wanwan mun, we i winim industri stended bilong Australia na i moa long haia yusa bilong Yurop, Sweden, wantaim 9,900 long wanpela ATM.

Dispela tupela oda i makim wanpela bikpela odawanpela benk insait long Papua Niugini mekim long EFTPOS teminal na ATM's wantaim ol biknem intanesenel saplaia-AT&T (NCR) na Akyman Fainensal Sevis bilong Australia.

PNGBC long nau yet i gat 25,000 SaveCards. Card Sevis Dipatmen bilong PNGBC i save prosesim moa long 1,000 SaveCard aplikesen long wanpela wik. PNGBC i lukluk long kisim 50,000 kat long pinis bilong dispela yia (1996) na 100,000 long pinis bilong 1997.




## LEASING FINANCE

CONTACT:

PORT MORESBY  
21 7765

RABAUL  
92 2286

*"We speak the Kina language"*



## KINA SECURITIES LIMITED

Offers a Range of Services

PNG's 1st SHAREBROKER, we provide a market for local companies as well as overseas companies.

- \* INVESTMENT MANAGEMENT
- \* FUND MANAGEMENT
- \* SUPERANUATION ADMINISTRATION
- \* CONSULTING

We have an understanding and capacity to assess and evaluate local requirements.

**YOU CAN BE SURE OF A FRIENDLY & PROFESSIONAL SERVICE**

**Call Us on (675) 321 3939 For Equities and ask for Kimrose or Rabbie**



## MASKI WANEMWANEM STUA MI BAIM SAMTING, BENK BILONG MI ISTAP WANTAIM MI.

Taim mi holim Wespak Handycard, maski mi go we benk bilong mi tu i go, mi no ken holim kes moni, mi mekim wok long Handycard tasol long baim.

### NO KEN KARIM KES MONI

Sopos mi laik kisim kes moni kwik taim tru mi ken kisim, i no hatwok, mi no ken go long benk tu. Long wanem mi save long namba bilong PIN bilong mi, em i sef na isi tru.

### LUKLUK LONG MAK BILONG HANDYCARD

Mi ken yusim Handycard bilong mi long ol supamakot, na long ol restauren, na long ol gif stua, na klostu olgeta stua mi baim long en mi lukim mak bilong benk o mak bilong Wespak Handycard.

Nau mi no save go liklik long benk, tasol sapos mi go long benk Handycard i helpim mi isi tru. Mi presim tasol namba bilong mi yet na wantu tasol mi kisim kes moni. Mi no ken sanap wet moa long longpela lain long kisim moni, mi ken mekim wankain tu long ol nara-pela benk bilong mi.

### EM I SEF NA ISI TRU

Em i sef na isi tru long yusim, Handycard long benk bilong mi i olsem benk bilong mi i go wantaim mi maski mi go we.



**my bank**





# While other banks promise you the world - we're putting it at your fingertips.

When you take a close look at the world, you quickly discover that to successfully import, export, establish Bill's of Exchange etc. you need more than just a bank . . . you need the expertise and resources of a trusted international bank. In Papua New Guinea, that bank is ANZ.

First established in the region in 1910, ANZ trades in 42 countries around the world and offers you the best banking network in the Asia/Pacific region. In fact, we've more overseas offices in more countries than any other bank in PNG. And that adds up to more of our people focusing on market trends and looking after your specific needs.

Best of all, when you need international banking services fast; because our friendly staff has more international expertise and a smaller management hierarchy, ANZ gives you answers faster than any other bank in PNG.

So, when you need expert international banking services; talk to the people at ANZ. We may not promise you the world, but we'll certainly put it at your fingertips.

**ANZ Banking Group (PNG) Ltd.**  
PO Box 1152  
Port Moresby  
Papua New Guinea  
Telephone (675) 322 3333  
Fax (675) 322 3253

*Managing Director R.G. (Bob) Jones*  
*Senior Manager Credit D.M. (David) Bell*  
*Manager International R. (Robert) Mirfin*  
*Manager Treasury K. (Kerrin) McPhee*

**ANZ** . . . Papua New Guinea's international bank



# Bank South Pacific



Banking when, where and how you want.

Apply for a **BSP KunduCard** today!

**Bank of South Pacific Limited**

**WAIGANI**  
Ph: 325 6788  
Waigani Dr.  
P.O. Box 9211  
Fax: 325 6712

**KOKOPO**  
Ph: 92 8506  
P.O. Box 1132  
Kokopo  
Fax: 92 8507

**LAE**  
Ph: 42 1944  
6th Street  
P.O. Box 175, Lae  
Fax: 42 2701

**PORT MORESBY**  
Ph: 321 2444  
Douglas Street,  
P.O. Box 173  
Fax: 321 3741

**BOROKO**  
Ph: 325 6466  
Tabari Place  
P.O. Box 1710,  
Boroko

**Mt HAGEN**  
Ph: 52 1299  
Hagen Drive  
P.O. Box 194, Hagen  
Fax: 52 2002

**WABAG**  
Ph: 57 1237  
P.O. Box 1270  
Wabag  
Fax: 57 1270

WORD BND/BSP 2802 JAD

## BENKING NA FAINENS


# Likwiditi stap antap tru

LIKWIDIT insait long benking sistem i stap antap tru long 1995.

Mak bilong ol samting bilong ol bisni em ol komesel benk i save holim i bin surik i go antap long 4.5 pe sen long Septemba 1995 bihain i go antap long 14.5 pe sen na 11.5 pe sen long mun Mas na Jun.

Dispela i surik i go antap long wanem ol samting bilong ol autsait kantri i kam insait long Centrel Benk em K170.9 milien, we i pundaun moa long mani i go long gavman em K58.3 milien, ol komiditi bod i bekim dinau aninit long prais sapot skim long mani K12.8 milien na mani bilong ol praivet kampani i go antap long K40.5 milien. Dispela mani bilong Centrel Benk i go antap long wanem planti mani tru long ol ovasis kantri i kam insait we i go wantaim Strakurel Adjustmen Program bilong gavman, we i mekim ol dinau bilong autsait kantri i go antap tru. Wanem samting i pundaun long mani i go long gavman em ol diposit Centrel Benk i holim. Dispela ol samting i mekim i ol wok bilong ol komesel benk i kisim moa samting na holim bek na i mekim mak bilong dispela ol samting i go antap. Ol Komesel benk i go het yet long holim ol dispela

### Liquidity Ratio



Graph by BSP

samting olsem sekyuriti bilong liklik taim tasol wantaim gavman.

Insait long namba tri kwata bilong 1995, ol komesel benk i go het yet long strongim intabank-maket, ol i soim na holim ol samting long ol yet insait long benking sistem. Dispela namba i surik i go antap bilong ol samting bilong ol komesel benk i go antap tru

bihain long Minumu Likit Asets Rasio (MLAR) long Epril las yia i kamapim wanpela wan wik fi long mak bilong 4.9 pe sen long Septemba 1995 we i egensim 5.7 pe sen na 5.4 pe sen long mun Mas na Jun. Insait long Septemba mak long 1995, Bank of Papua Niugini i mekim wanpela strongpela mani polisi.

## BSP go het wantaim ilektronik benking

MOA long 30 krismas olgeta, Bank bilong Saut Pasifik Limited(BSP) i bin wanpela yangpela. lokel benking industri-wanpela liklik retail benk.

Tudei, bihain long em i woklong kamap bikpela isi isi long las 4-pela yia, em i wanpela benk husat i lukluk nau long ol komesel samting, na mekim bikpela wok long ikononik developmen bilong kantri, givim ol benk prodak na sevis na bungim wanem samting ol kastoma i laikim na tu mitim ol samting em ol staf na ol sea holda i laikim. Long bipo em National Bank of Australasia Limited i bin papa long en, na bihain benk ya i kamap olsem Bank of South Pacific long 1974, bihain long em o opim ol benk long ol narapela senta long kantri.

Long 1993, benk ya i kamap 100 pe sen bilong ol manmeri Papua Niugini taim holding kampani nau ol i save kolim BSP Holdings Limited i kisim 87 pe sen sea em bipo National Australia Bank (NAB) i save holim na ol narapela liklik sea tu. Long ol yia i kam antap, BSP i mekim gutpela wok long givim ol gutpela samting long wok bilong givim mani em bipo NAB i save mekim. Na i no longtaim i go pinis, benk ya tu i go

insait long ilektronik benking maket wantaim nupela prodak "Kundu Card" we i promis long kamapim gutpela na stretpela sevis long ol kastoma bilong em.

Prodak ya em ol i lonsim long Janueri 1996, bihain long BSP i kisim 25 pe sen interes long Banklink-wanpela joint venture namel logn Westpac (PNG)Ltd na Datec (PNG) Pty Ltd, tupela ya i holim 37.5 pe sen interes.

Olsem ol narapela komesel benk kat, KunduCard i mekim wok bilong ol samting i isi, karim raun na givim gutpela na stretpela sevis long ol kastoma long givim mani i go stret long ol guds na sevis long wanem hap ol i laik kisim.



Wantaim KunduCard, ol kastoma i gat rot long go insait long gutpela ilektronik benking sistem netwok insait long PNG. BSP KunduCard kastoma i ken baim samting long ol stoa husat i gat sain bilong Westpac Handycard.

Long operetim wanpela KunduCard long ol BankLink EFTPOS(Electronic Funds Transfer at Point Of Sale) teminel, makim tasol long wanem akaun yu laikim mani i kam autsait long em long baim ol samting na sevis, bihain makim PIN(Personal Identification Number).

# SaveCard

We're making life easier for you!



**PNGBC SaveCard** is **FREE, SAFE** and a convenient way of buying goods and services and withdrawing money.



Electronic Funds Transfer at Point of Sale (EFTPOS).

**Yu Gat Save?**

Automatic Telling Machine (ATM).



For more information on our SaveCard, Please contact us on **180 2333** toll free.



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.